

王艮齋詩集十卷文集四卷

〔清〕王峻撰

吉林大學圖書館藏清乾隆蔣榮刻本

附《四庫全書總目·王艮齋集

十四卷》提要

序

侍御王艮齋先生古
之遺直也余始見之
蔡文勤公所文勤公
于門下士心重艮齋

序一

其揚古摧今議論侃
侃氣骨岸然自異及
為御史直言天下事
初發其端旋丁內艱
服闋而抱貞疾不復

出天下想望丰采咸
惜未罄其藏或比以
木之礪砢多節故得
自全其天是豈良齋
之心哉嗟乎今所傳

序二

者獨其詩文其言之
有闕世道人心不苟
毀譽者可以想見其
人余過蘇知良齋主
紫陽書院雖匆遽必

造之今不可復見矣
撫斯集不勝三太息
云乾隆癸酉孟冬月
下浣年館侍閩汀雷
鎡拜題於澄江使院

序三



王侍御詩文集序

蔣司馬誦先刺王次山侍御詩文遺集既成問序於予予觀朱子序王梅溪集大意謂人秉陽剛之德者君子也秉陰柔之氣者小人也惟陽剛故光明正大如青天白日然唯陰柔故依阿澆忍如鬼蜮狐蠱然而其人發而為文亦無弗肖之予藏之於中久

序一

求立言之本乎陽剛者實難其人乃今於次山先生詩文遇之先生以名進士入詞館改官侍御遇事敢言而於分別邪正之際尤能磊磊落落不避嫌怨時有氣燄芒刃嶽嶽如五鹿充宗者不難直折其角以故天下想望之傳其彈文重其姓名比於朝陽之鳴鳳而先生以居憂歸遂卧病不

復出矣生平無所嗜好喜為文脫口

而出不鬥奇不逞博不矜道學名祇抒寫其胸中所欲言斯於理明辭達而止而鬥奇逞博與夫矜道學名者轉不能及而奏議之凜然凝霜者皆出于忠愛之忱而非有所勉強而為者也詩筆清遠條暢絕不依傍前人少超名人而骨格開張屏去雕飾

序二

一如其文之理明辭達而初無暖暖姝姝之態蓋其賦於天者純乎陽剛之德而陰柔之氣不使稍入而中之宜其流露於言者皆光明正大一如朱子之稱許乎梅溪者也昔梅溪在高孝兩朝論史浩八罪又論史正志及韓仲通俞良弼諸人天下重其諫諍因重其詩文今讀次山先生詩文

者亦俱以直諫重之而蔣司馬之不忘死友刻其遺集尤見其秉彝攸好欲使光明正大之言不隨身沒而俱亾也其氣誼為可感也夫
乾隆十八年癸酉秋七月長洲館後進沈德潛題於靈巖山居

吳趨後學錢襄書

序三

次山既沒令嗣輯遺詩請予序予念次山詩序舍我誰為顧予有不樂序次山詩者中心抑塞難於衆曉夫人生平必有所專心蓄意期以自見之處不欲泯沒於後後死者為之道其甘苦指其短長表而出之斯作者與序者兩無憾也若次山之所專心蓄意期以自見者雅不在詩業已命不從力不稱心貧病交侵中壽殞矣所存殘叢詩稿什百首譬江海之餘波園林之片葉興會偶及不自矜寵顧乃沾沾取而序之而著之不適為淺之乎待次山哉雖然正惟是也故不得不就詩以存次山吾見夫撚鬚聳肩窮老盡氣者之為詩也詩工矣意量不出聯絕之間聲病之細惟不欲以詩自見者不役其性靈於詩不域其才識於詩然而性靈才識往往乘間迸發而不能自掩次山為人疏亮質直骯髒而多威覩彼媿阿洪認善持兩端者唾棄不留餘地故其詩亦軒朗洞達不肯以含餬為溫厚浮淺為風雅而不喜夫雕琢塗澤工夫深而氣骨不足者噫人識吾不樂序次山之詩之意

又識吾就詩以存次山之意則其知次山也亦庶
幾哉友人見復陳祖范序

序一

交道之難自古而然文人面交泛泛若
水上之鷗適狀相值變為莫測絕無
忠信真摯之心以固結之直道既亡
雖交滿天下著作等身曷貴焉間嘗
側聞先生長者言古之能文者勁氣
直達浩狀沛然由其生平以綱常名教
為己任立朝居鄉無一依阿泯忍狀
與人交久而不渝若昌黎眉山至今
讀其文如見其為人其他類狀是言
也心識之弗忘雲山艮齋王先生素
知其耿介拔俗迨至郡主索陽書院
講席一見即與予定交予固服先生
剛直先生以予慙直為可教也自
是數往來有所議論多與世違事闊

倫紀是非尤不少假借如天柱地維
之屹然終古無搖動也如河濟齊流
紫泗泛濫截狀清濁之不混毫芒也
談久出其所著以證所言之無不一
徹
當事重修蘇州府志先生領其事
披遺書採輿論一出入不枉不濫
前志有所未安輒增損之嘗謂予曰

序二

此史事也此直不可書已行世人共
業服之予自得文先生見所見司
所聞每一念及竊嘆古之道直不遏
如是揆諸曩時所識之言信不誣也
先生胸臆多鬱塞久而病且貧
力辭講席歸之昔來別予曰病不
起當訂來生交言已潛狀淚下歸

無何卒予慟哭後從先生令子索遺
稿謀鐫板垂久遠請之 前大中丞
覺羅雅公之是之公故悉先生之直
嘗稱為大江南北之賢者以予為先
生所善故亦不棄予也集既成予何敢
弁其首惟先生不輕許可而獨與予
訂生死交不容然而息也故附見於

序三

此若先生詩文發于直養之氣誠足
輔翼倫常此卷之者可以其為不朽
之業又何待予言為券哉時
乾隆癸酉夏日長洲蔣榮後序



王良齋詩集目錄

常熟王 峻次山著

長洲蔣 榮誦先刊

第一卷

秋夜讀書

讀荆軻傳

原西晚眺

貧女歎

過慧林菴

良齋詩集目錄

述懷

春晚雜述三首

七夕有懷二首

寄題宋玉才樓居時欲北行兼以留別二

首

渡江

東阿道中

曉行

楊令公祠

山行遇雨

自塞北入口

感懷

春寒

得內江叔書因寄

春日偶題

出古北口

久雨初晴夜涼喜作

依韻奉和陳見復夫子寄示詠懷之作四

良齋詩集目錄

首

中秋夜

寄玉才

夜讀玉才所寄詩

寄家眉哲

題孫二酉峨眉山雪騎圖

豐臺芍藥歌

送曾敬之南歸

保和殿御試賦得講易見天心

賦得夜含時雨潤 館課

乙巳冬至南郊禮成恭紀 館課

賦得雲覆蓬萊雨露多 館課

丙午仲春 經筵禮成恭紀 館課

送同年謝次薇之任靈壁二首

題畫扁豆花

雍正四年十二月黃河澄清二千餘里時

逾兩旬為自古未有之嘉瑞羣臣稱賀

恭進四首

良齋詩集錄

賦得敦俗勸耕桑 館課

三

第二卷

題吳眉菴前輩松石小照二首

題亡友宋玉才詩稿

為曾敬之題岑長齡畫梅花冊子

送敬之南歸二首

題同年廖媿荆庶常采芝圖

題錢少伯不如來飲酒小影

題錢修亭前輩母陳夫人夜紡授經圖二

首

題閣學吳懸水先生晚香圖

己酉七月二十一日奉 命赴浙江典試

就道述懷

齊河道中

藩臬兩司糧鹽二副使招遊靈隱寺用東

坡臘日遊孤山詩韻

題同年金繪貞江聲草堂圖三首

送同年范電文之官鄧州二首

良齋詩集錄

題王中安觀察春明需役圖

四

題彭翰文修撰瑞芝圖 并序

題古香叔春宵圖 并序

義士吳鴻錫詩

漳浦蔡梁村房師五十

席渭南生子二首

海昌相國八十

哭歸安奉常房師

第三卷

題張振鷺秋江罷釣圖

題陸龍岡舍人濠梁獨立小影

又題龍岡不負草堂圖五六七言三首

題同年顧稼軒耕讀圖

題鄭丹聲明府試泉圖三首

題王公衡副使觀潮圖

家宗之編修招同館諸君飲芍藥屏下即

席分賦

題同年趙橫山春晚讀書圖

良齋詩集目錄

五

再題五言一首

又五月三日奉 命典試貴州出都述懷

慶都見水稻

宿邯鄲臺驛

由邯鄲南過杜村至磁州北二十里中地

微窪土人穿渠引溢水溉田種秔稻數

千頃芡荷彌望桑柘成雲自畿南來所

僅見也

途中乏紙畢元復戶部兩惠松江箋賦此

以謝

謁岳忠武廟

柴澤渡河

自禹州至襄城一路雨澤霑足黍稷茂盛

甲于他處并憶從前道途所歷詮次成

篇

過昆陽城元復作七言長篇索和余不能

效顰別作五言答之

第四卷

良齋詩集目錄

六

次韻戲答元復見贈

荆門州

元復投長篇自述好棋而棋甚劣作詩亦

然且謂僕為大敵欲奉以為師依韻奉

酬以示不當之意

澧州道中雜書所見

常德太守王槐青惠辟嵐酒色香味皆佳

絕用東坡洞庭春色韻為謝邀元復同

作

公安道中

桃源洞 有序

自桃源新店驛至沅陵界亭驛

自馬底驛至沅陵

沅陵江樓

沅陵道中賦筒車 并序

自懷化驛至羅舊驛

行次沅州寓南寺

玉屏縣

良齋集目錄

七

自焦溪至鎮遠二首

相見坡

黃平道中觀苗人穫稻

自黃平至重安江驛望道左諸山

清平道中

早發楊老驛至平越簡元復

平越道中望張三丰影

雨中發新安村過一嶺名雲停關上下俱

險時嵐霧四塞石滑艱行作禽言二首

紀之

元復既和余禽言復贈二首見示及其意

荅之

聞虞山相國下世

第五卷

九日黔中諸太守邀登東山讌集

贈定番州牧牛待林

留別同年劉完璞參議

飛雲巖用前輩金會公先生韻

良齋集目錄

八

黔中吟

舟行雜詠二十首

再題澧州寓樓

襄陽二詠

峴山

鹿門山

禹州道中

大風中發鄭州次滎澤渡黃河

鄴城懷古

嵇紹廟題壁

渡漳河

過滹沱河

過方順橋小憇樂志園贈主人夏叟

除夕次迓賡若韻

癸丑元日疊前韻

人日再疊前韻兼簡賡若

題宋伊人廣文桃林夜坐圖

輓館師吳文恪公三首

良齋集目錄

九

送海昌相國 予告歸里三首

中秋前一日招吳鳴佩汪謹堂劉爾鈍趙

朗岑四同年寓齋小集謹堂有詩次其

韻二首

中秋後十日同吳鳴佩和叔徐晉叔三同

年暨查奕梁庶常飲謹堂齋中疊前韻

第六卷

甲寅年正月初二日次同年趙橫山韻

送史慎齋少宗伯 予告歸里二首

題石門吳孟舉仿爭坐帖

題靜海勵文恭公家白海棠圖

題戴巨川庶子畫馬

五月三日出都赴漢口占贈鍾仲恒侍御

早發柏鄉

過邯鄲呂仙祠

連夕逆旅中為臭蟲所困

雨後發鄭州至新鄭

陽翟道中

良齋集目錄

十

早發禹州次襄城二首

過昆陽城

登峴山麓觀音閣

苦雨行自宜城至荆門三日行泥濘中作

三首

荆門旅店夜中大雨不止

建陽驛道中晚晴

自江陵至孱陵即事感懷兼示仲恒即用

其發麗陽驛次石橋韻

自張莊涉潦水次順林驛行數里山水漂

沒田廬道路阻絕却至順林無旅店借

驛亭宿

武陵江樓邀仲恒說月三首

仲恒得巨鰢魚作鱠攜酒就江樓共飲次

韻以謝

夜過桃源洞

辰龍關

夜發界亭驛途中口號

良齋集目錄

主

沅陵江樓觀雨

薄暮雨止閒眺

迴龍閣

青溪有感

華嚴洞

行次施秉聞知縣蔡謹守城功為作歌

再遊飛雲巖

新添道中

第七卷

普定道中

白水河觀瀑布

郎岱晤牛待林司馬

自郎岱至列當驛

斗狼箐

庚戌橋

霑益州

馬龍州

小關索嶺

良齋集目錄

主

制府尹元長先生招飲

重九前一日撫軍是齋張公招飲署中酒

半登臺學使孫端人館丈有詩制府尹

公次韻見示依韻奉和

九日孫端人招飲署中尹公疊前韻見示

再和

陳榕門方伯餞飲署中賦此留別兼呈在

座諸公

發平曩至亦資孔

自劉官屯至礪子室

雨中過大小斗狼箐

自列當至郎岱途中口占三首

普定道中戲作

山行苦雨

贈陳密山按察

贈錢野堂副使

鎮遠登舟簡仲恒

舟中書感

良齋詩集目錄

主

夜望山火

舟中遣悶

晚過辰溪

舟中望江岬石壁書所見

曉晴赴辰州

橫石灘

過清浪灘再用赴辰州韻

穿石

漁人得巨魚與仲恒分買而繪之

澧州水閣和壁間張南華韻三首

第八卷

江陵道中大雪用旅店壁間韻

曉發荊門州又遇雨雪

過襄陽再晤魯亮儕副使即日招登峴山

亭賦長歌以贈

大風發新鄭

二月五日鄒慎齋吳穎菴張南華會飲寓

舍南華用杜詩韻作歌見示依韻荅之

良齋詩集目錄

古

慎齋見示和詩慰及沉淪疊前韻奉謝

和慎齋種柳四首

題杭大宗編修松吹讀書堂圖

送陸龍岡戶部之任奉天即次其留別韻

三首

程門姬人沈氏完節詩

題程禹勤工部兄弟春郊聯騎小照二首

題馬毅公草字彙

題梅莊侍御軍中學易圖

乾清宮御試賦得薰風自南來

倪穉疇侍御招同穎菴南華寓齋小集

第九卷

耕田禮成恭進詩三首

送謝梅莊督漕湖南二首

為人題蔣質甫學士仿趙松雪墨蘭

送見復夫子赴雲龍書院

次韻奉酬家西澗先生見贈二首

題魚開封遺像

尺齋詩集錄

簡張叟海南

十五

題丁蕪山梅邊讀易照次韻

依韻答趙謹凡見寄二首

上元後一日見復夫子汪茶圃家東澹眉

替過敝廬分得船字

見復師去冬自雲龍書院歸薦峻代往蕪

修郡志辭不獲已將行安嶽撫軍亦敦

請先生主皖城書院因用去春送行韻

話別

東澹有詩贈行次韻奉答二首

途中感懷三首

糧舟阻行

初到雲龍書院眺覽

彭城懷古二首示同學諸子

哭弟三首

初秋夜坐

中秋雨三首

環彭城皆古蹟然誌乘所載昔人賦詠絕

尺齋詩集錄

十六

少佳者故知東坡在徐三年不專賦一

題爲高也余來雲龍半年以修志蕪多

病未暇賦詩今將歸登黃樓亞父冢放

鶴亭聊作三篇寄意

黃樓

亞父冢

放鶴亭

留題黃茅岡蕪別書院中諸子

由黃河至淮

題鄭叟觀奕小照

第十卷

新年述懷

雨中同見復師茶園飲眉督齋次韻

送陶穉衷太常入都二首

二月十二日見復師招同茶園眉督顧孝

廉備九飲獨樹軒以花朝二字為韻

閒窗

春盡日漫題二首

良齋詩集目錄

主

積雨

萬年橋詩為汪一菴太守作

夜渡江經瓜州城

廣陵雜感四首

偶成

聞門生朱以誠宰漳浦為奸民所殺作詩

傷之

中秋夜

思歸

送汪茶園之宣城訓導任

題商寶意郡丞專城集

覺羅蔚文副使自漳州書來并示紀行詩

文賦此却寄

入春兩月冰雪之後常如冬令春分日梅

花猶未開感而有作

中秋夕東淑至留宿書院有詩次韻

陳和叔示梅花嶺謁史忠靖墓詩因憶昔

年曾過其地亦作一首

良齋詩集目錄

六

輓徐商農太翁

題朱主簿源滄浪寄跡圖

戊辰元旦用東淑韻

都家讀書燈

歲暮用東淑韻

題見復夫子照

自歎

為同年張石鄰題起鰲圖

題沈冠雲太湖圖

午未歲交用東淑韻二首

王艮齋詩集目錄

王艮齋詩集目錄

九

王艮齋詩集卷之一

常熟王 峻次山著

長洲蔣 蔡誦先刊

秋夜讀書

獨坐秋深夜。空堂欲五更。打窗桐葉落。入室草蟲鳴。萬卷何時破。三都浪得名。百年心事在。松月照窗明。

讀荆軻傳

悲歌一曲髮衝冠。遺恨千年易水寒。堪笑荆卿不

王艮齋詩集卷一

十

解事。欲教秦政學齊桓。

原西晚眺

幾日春陰不出門。天晴信足歷郊原。人耕燒色翻新土。樹帶斜陽表遠村。三徑蓬蒿留我住。一編燈火共誰論。莫嫌獨學成孤陋。猶勝塵中盡日昏。

貧女歎

東鄰有貧女。窈窕多容儀。生在蓬門中。羅綺不得施。當年方二八。十指常勻眉。筆墨雖愛弄。舉止能自持。花前有閑情。羞令阿母知。日月忽已過。許嫁

還無時。終年勤紡績。兩手遍生胝。幽懷誰與言。對鏡淚交垂。休言嫁後苦。在家亦難爲。

過慧林菴

地僻門閒絕四鄰。茅齋一入隔紅塵。徑連修竹長含翠。窗列疎梅漸放春。牆外忽驚山似活。堦前時愛鳥能馴。從今認得原西路。來聽鐘聲莫厭頻。

述懷

悵望風塵不自由。細思今昔淚長流。身名已歎同雞肋。世事閒看似蜃樓。萬里關河秋入夢。三春風

晨齋詩集卷一

二

雨夜添愁。何時俗累能粗了。一笑忘機狎野鷗。

春晚雜述

村園春暮草萋萋。桃李成陰覆舊蹊。最是晚來堪徙倚。夕陽池畔小軒西。

鶯老花殘蝶減忙。陰陰竹樹俯迴塘。猶餘風物能消受。紫筍青梅滿徑香。

雲氣西來接草堂。叢篁缺處漏山光。自憐薄俗難酬對。猶得將身伴鳳凰。河陽山一名鳳凰

七夕有懷

仙槎拋去客星沈。銀漢紅牆夜夜心。烏鵲但知飛繞樹。豈能來往代青禽。

寄題宋玉才樓居時欲北行兼以留別

故國京華去住人。君居百尺我風塵。可憐書劍空西笑。辜負平生願卜鄰。

天涯芳草路悠悠。千里關山遠送愁。忽憶宋家牆畔好。綠楊深處起高樓。

渡江

眼望金山不得登。舟行山下浪奔騰。齊鐘初罷山

晨齋詩集卷一

三

僧出。閒看風帆向廣陵。

東阿道中

縣在四山中。山行驛路通。嵐光相掩映。林影遞青蔥。香送棗花氣。涼翻麥浪風。自來齊魯地。雲物恐難同。

曉行

茅店蕭疎曉月明。淒然風露逐人行。江南此際新閨夢。聽到雞鳴第幾聲。

楊令公祠

兒時愛說楊無敵。今見荒祠鎮古關。遺像魁梧猶凜目。諸郎配食自承顏。空山尚想搥膺恨。塞草曾沾戰血殷。若欲比公周子隱。更餘佳話滿人間。蘇黃

門過公祠詩云我欲比君周子隱朱形聊足慰忠魂

山行遇雨

峭壁危峰蜀棧同。行來更苦雨濛濛。前山雲起後山失。人在米家圖畫中。

自塞北入口

九月天寒塞草稀。漁陽歸路簇輪蹄。夜山狼叫行人恐。曉澗冰封渴馬嘶。淡日過雲峰色慘。勁風劈

良齋詩集卷一

四

面帽簷低。豈知一到關城界。煙樹蔥蘢入望迷。

感懷

風獵瓊廬絕塞秋。蕭辰自唱畔牢愁。天涯有夢歸魚艇。雲路無梯幻蜃樓。落葉敢爭聲價重。斷鴻猶爲稻粱謀。百年一夕俱難遣。枉笑吳儂類楚囚。

春寒

臘去寒猶在。連朝故作威。枯林生靄淺。凍雀噪簷稀。雲慘時飄雪。風高慣撼扉。江南物候早。應得試

春衣

得內江叔書因寄

迢遞蠶叢路。書來屢怕沈。一官如遠客。數語足憂心。地瘠征徭急。川溫霧雨深。天涯憔悴意。相望各霑襟。

春日偶題

九十春光不肯留。桃花紅淺柳陰稠。塵霾三月燕京路。減盡春心是客愁。

出古北口

良齋詩集卷一

五

四年五度出邊城。來往多諳塞外程。關吏故應頻笑我。憐君不是棄繻生。

久雨初晴夜涼喜作

天宇澹悠悠。嵐蒸暗覺收。氣清人自健。暑退夜先秋。燈火須增課。蟲聲漸引愁。故鄉千里夢。四載怯回頭。

依韻奉和陳見復夫子寄示詠懷之作

竭來燕塞一吳兒。渺渺歸途悵後期。世味試嘗應已遍。師門重訪又何時。數行悽斷寒窗夢。四韻清

如白雪枝。天籟豈堪蟲響繼。檀盧燈火苦相思。

老矣鷗明挾兩兒。高飛誰共白雲期。齊竿正及爭

鳴日。荆璞依然未剖時。蘭長谷中甘自遠。松生澗

底迴無枝。窮年閉戶知多慨。載酒何人慰所思。

眼對長安輕薄兒。心慙師友問歸期。當年狂簡俱

蒙賞。此日飄零又一時。病憶燕鴻傳舊信。窮如越

鳥夢南枝。連床立雪都陳迹。寂寞空勞別後思。

成名休羨里中兒。潦倒書郎乏遠期。只合荷衣歸

拜日。還如絳帳授經時。重尋舊業巾箱本。淨洗塵

良齋詩集卷一

六

心月窟枝。更撰良辰隨杖屨。桃源拂水話幽思。

中秋夜

絕塞秋光倦眼前。冰輪到此不須圓。天垂寒霧疎

星外。人立清風遠柝邊。青女無情先凜冽。嫦娥易

老減嬋娟。高樓詩酒終宵興。悵望關山隔幾年。

寄王才

浪跡風塵歲月馳。愁腸難報故人知。更堪燕市窮

途日。遠憶漳濱抱病時。四海論交能幾個。三年問

訊媿常遲。腰圍雖減應無恙。珍重加餐慰我思。

夜讀王才所寄詩

醉鄉無路睡魔疎。臥看窗前塞月孤。猶憶唐求兩

瓢在。起來重覓引光奴。

寄家眉哲

兄弟交情十載餘。聯吟鬪酒好相於。三年蓬轉天

涯路。一紙銀鈎病後書。養靜莫論莊叟馬。干時應

笑夏侯驢。黑山秋老思君夜。松竹依然北郭居。

題孫二酉峨眉雪騎圖

圖為王
筆畫

我聞峨眉之山雪千里。五月行人如凍蟻。縱使春

良齋詩集卷一

七

風吹暫消。不教盡作巴江水。羲和假道未許處。惟

有堅冰積寒沍。自古幾人賦壯遊。孫郎跨蹇來茲

路。前峰後峰白插天。誰歟導者騎羊仙。陰崖慘淡

徑蕭瑟。寒風倏起愁吟鞭。歸來乞得耕煙筆。好句

何人霏鋸雪。寄語襄陽孟浩然。孫郎袖有峨眉雪。

豐臺芍藥歌

昔聞芍藥稱揚州。誰為作譜孔與劉。四相筵前金

帶種。韓公一宴猶傳流。數百年來勝事畢。燕郊豐

臺今第一。豐臺之地腴且寬。土人種花如種秫。連

畦接町鋪雲霞。剪束半開含露華。六街侵曉携錢
買。艷態鮮香散萬家。枝枝葉葉皆婀娜。千疊重臺
垂鬟髻。綽約霓裳冰雪膚。淺深紅頰珊瑚朵。亦有
開來徑尺餘。笑他坡老玉盤盂。析津之記何疎淺。
名品無人解著書。嗟予五載塵埃路。花前又見春
光暮。人生富貴何可求。且向豐臺看花去。

送曾敬之南歸

朔風吹燕郊。勸客動歸輪。如何同下第。當此送別
辰。憶昔識君初。乃在庚子春。君性劇溫厚。愚腸怪

長齋詩集卷一

八

輪囷。性情雖少異。契合皆天真。君來如春風。忽忽
吹著人。一日偶不見。動如隔兼旬。中間別二載。離
思難吳陳。今年京兆試。所喜託後塵。同舍多歡娛。
往來忘主賓。方期捷南宮。相繼紆朝紳。一朝聞榜
發。點額俱酸辛。逝將歸故里。高堂奉慈親。嗟我獨
何爲。五年缺昏晨。謀身苦不遂。與人作勞薪。畫餅
豈能飽。虛名不救貧。今君方掉頭。顧我難抽身。君
如赴林鳥。我似離根蘋。鳥倦有時還。蘋浮渺無垠。
後會諒不遠。臨風揮淚頻。

保和殿御試賦得講易見天心限七言排律七陽韻

聖人九五正當陽。講幄韋編仰闡揚。義畫文言
垂象象。周情孔思悟羹牆。泰交啓運賢才盛。復卦
乘爻日月長。乾道每於勤裏見。天心還向動時彰。
理歸易簡原無秘。義備剛柔自有常。數點梅花宣
妙蘊。萬川明月印清光。東西六子皆臣佐。上下三
才統紀綱。茂對總令蒙樂育。健行惟是敕幾康。太
和保合仁風洽。品物咸亨大化翔。遠繼三王垂典
誥。遙傳四聖析微茫。折中萬古懸明曜。斟酌群言

長齋詩集卷一

九

萃縹緲。蠡測小臣慙淺陋。巍巍至德煥文章。

賦得野舍時雨潤館課

好雨清和節。芳郊渥澤涵。流膏融紫陌。餘潤入晴
嵐。草色浮青隴。波痕漲碧潭。紅霞花灑灑。綠重柳
毵毵。濃蔭千村合。新煙萬井含。川原呈沃壤。穰穰
聚丁男。迴野風光麗。神臬土液甘。對時宸賞洽。
占稔老農諳。驗候知豐歲。依旬叶瑞函。良辰宜播
殖。樂事在田蠶。協氣周瀛宇。休徵遍朔南。天時偕
地利。共仰聖恩覃。

乙巳冬至南郊禮成恭紀 館課

帝德超千古。天心眷一人。政成登上治。禮備展明禋。候氣葭灰動。迎陽玉律新。至誠隆報饗。大祀在躬親。夙戒臨三殿。宵興衛百神。龍旂行日月。桂燎燦星辰。金石咸韶盛。犧牲蘭栗陳。紫壇嚴陟降。蒼壁秉精純。對越真無間。居歆儼下賓。升煙靈貺集。受胙厚釐臻。瑞靄凝黃道。祥光護玉宸。思波同協氣。敷作萬方春。

賦得雲覆蓬萊雨露多 館課

蓬萊佳處五雲深。慶澤祥光滿上林。靄靄映空占地勢。恩膏下濟識天心。金莖一氣連霄漢。玉燭三時散暝陰。幸際虞廷紀縵日。長歌湛露賦甘霖。

丙午仲春 經筵禮成恭紀 館課

聖學超隆古。皇猷仰煥文。邇英欣再接。崇政邁前聞。論道宗洙泗。尊經溯典墳。春陽迎翠輦。左个敞彤雲。景麗瑤階日。香飄秘閣芸。東西梯几列。甲乙縹囊分。孔思精微見。周官誥誡殷。馭人先敬信。底績在忠勤。

時進講論語敬事而信三句書經功崇惟志二句

穆穆宸襟靜。洋洋

睿藻芬。槐龍風澹蕩。銅鶴靄氤氳。榮喜天顏

近。恩霑法酒醺。儒臣逢景運。永戴聖明君。

送同年謝次微之任靈壁

春明門外暗垂楊。此去符離路未長。人自閩甌傳理學。地猶楚漢舊爭場。風流花縣移淮海。忠信琴堂近呂梁。他日政成趨帝召。不妨選石壓行裝。

縣產奇石故用陸績事

憶昔同時上玉除。恩深此日會簪裾。兩年鳬舄

連翩去。百里桑陰雅化初。對酒難忘文字飲。因風

良齋詩集卷一

十

莫惜錦鱗書。澤民報國須君等。慙愧樗材玷石渠。

題畫扁豆花

江鄉此物冠園蔬。滋味宜人趣有餘。憶與鄰翁閒奕罷。一棚風露晚涼初。

雍正四年十二月黃河澄清二千餘里時

逾兩旬爲自古未有之嘉瑞群臣稱賀恭

進

崑崙星宿派逶迤。自納群川勢渺瀾。色配中央符土位。支環九曲絡坤維。導從積石洪流遠。滙向滄

溟濁浪馳曠代殊祥今始覲澄瀾千里碧連漪
 榮光遠近發晶熒竹箭桃花衆派渟迴映金隄輝
 五色平鋪玉練鏡千形彩虹綿亘逾淮濟銀漢昭
 回燦日星一望空明涵萬象蔚藍遙共九天青
 苞符自昔媿圖疇中候分明鑿度留慶協隆平昭
 允翕祥徵上治美懷柔千齡偶見綠嘉運三日曾
 聞應大猷開闢至今逢盛世獨超邃古荷 天庥
 河渠 聖代霈恩膏帑藏頻頒飭水曹西北溉田
 滋萬頃東南行艘利千漕烝徒久沐 皇仁溥方

良齋詩集卷一

主

略全憑 睿算勞盛事兩朝歌底定澄流億載息
 洪濤

賦得敦俗勸耕桑 館課

宵旰勤民事農桑軫 睿情三推頻勸導六府遍
 修明無逸 天心徹幽詩 黼座呈疇咨申與命
 茂對協乾行甘雨依旬至和風應律生深林聞布
 穀灌木轉倉庚翳翳芳陰滿漸漸秀隴平青疇良
 耜利綠葉懿筐盈百箔催綠蠶千村謁饁耕耨觀
 登萬寶載績粲三英俗以勤方厚功惟省乃成閭

閭歌 帝力億兆感 皇誠衣食恩膏溥田蠶樂
 育宏敦龐安作息禮讓本豐亨上理超三古深仁
 被八紘巍巍同大造 至德轉難名

良齋詩集卷一

主

王良齋詩集卷之二

常熟王 峻次山著

長洲蔣 際誦先刊

題吳眉菴前輩松石小照

圖仿松雪

彷彿當年松雪翁
鷗波亭下坐松風
緇塵十丈東華路
安得將身入此中

十年鼇署擁青綾
述作群推哲匠能
剩有閑情松石在
風流前後屬吳興

題亡友宋玉才詩稿

良齋詩集卷二

天產菰蘆秀英年
奮筆時東鄰慙陋質
老將畏偏師樂府翻新曲
香奩洗舊詞吟魂殊未已
秋水落霞知

為曾敬之題岑長齡畫梅花冊子

岑生梅花十二幅
鮮妍古勁皆有之
畫成逐幅自題詠
蠅頭細字書參差
長歌短句託寄遠
新枝老幹縱橫宜
最後題云贈知己
可憐宛轉多丰姿
曾君持此歸江郭
珍重欲比淵材索
裝成巨冊乞我詩
我詩慙愧更拙惡
十年京國溷緇塵
萬樹銅坑

阻前約天涯夢斷無尋處
起看參橫月將落

送敬之南歸

盧溝橋畔柳初芽
來慣應輕去路賒
白髮慈親思會面
青春遊子喜還家
奚囊添得房山勝
席帽休嗟上苑花
歸見故交憑話我
王郎今是老京華
西華旅館與南城
屈指流光過眼驚
四度送君交道見
十年為客宦情輕
買山無計難歸隱
載筆何能濫廁名
努力辦香家學在
深慙薄劣負平生

題同年廖規荆庶常采芝圖

時將歸閩

良齋詩集卷二

春風吹長松芳意滿
幽谷巖花開冷艷
澗草鋪新綠中有采芝人
非仙亦非俗衣香帶御煙
藜火餘天祿飄然厭馬韉
永矢在適軸雲根隱靈菌
采采不盈掬夕陽荷鋤歸
嵐翠紛相逐蓬萊隔弱水
閩風渺崑麓不如此山中
可以結茅屋請歌招隱篇
稅駕同所欲

題錢少伯不如來飲酒小影

香山作詩勸人酒欲拋
萬累歸何有錢君寫象書
此詩要與樂天為二友
平生坦率本天性世路風

塵厭奔走床前鬪蟻耳不聞樹上提壺意偏厚得
錢沽酒且酌之萬事不如杯在手高歌七首苦招
人細寫八分聊自負少翁分元和長慶休重陳太平
日月人安阜春光爛熳最可惜速宜約我幣一斗
題錢脩亭前輩母陳夫人夜紡授經圖二

首

辛勤篝火夜分明繞膝書聲和紡聲手執女紅聽
句讀須知慈母是先生

玉堂給札氣凌雲太史聲華迥出群擬託後塵爲

良齋詩集卷三

三

弟子他時絳帳拜宣文

題閣學吳懸水先生晚香圖

黃花開季秋名紀夏小正正氣稟金行凌寒乃其
性卓哉霜下傑淵明有佳評韓公晚香句吟罷起
我敬先生早姱修不與時流競白首登巖廊晚節
名愈盛繪圖名晚香還以菊自鏡兀然手一編秋
林左右映亭亭霜枝榮粲粲孤芳靚保此歲寒姿
儷彼喬松勁

已酉七月二十一日奉 命赴浙江典試

就道述懷

十年前入國西門破帽青衫敝篋存題柱壯心非
我事雕蟲小技荷 君恩人文兩浙由來最 聖
化三年已漸敦前年因查嗣庭獲罪傳
浙人鄉會試今復舉行獨愧不才承大典
恐將燕石誤璵璠

齊河道中

行盡平原到祝阿棗林纂纂柳婆娑車前黛色華
不音注橋下清流古濟河路有蹄涔知積雨野逢
腰鉦起懽歌星軺計日程猶遠長吏何勞禮數多

良齋詩集卷三

四

藩臬兩司糧鹽二副使招遊靈隱寺用東

坡臘日遊孤山詩韻

經蘇堤繞內湖山光水影無處無寺門一逕落葉
滿深林窈窕山禽呼散步不須多僕奴藉草坐石
皆可娛峰高泉冷信清絕翠屏無路緣紫紆道人
相迎到精廬登樓遠望峰更孤丹楓落日耀巖谷
花港曲院涵菰蒲雍容賢主四大夫持尊相勸恐
日晡平時可歎迫公事今夕此會誠良圖觥船飲
盡興有餘清風灑面神遽遽明朝放鶴尋林逋小

詩還擬為公摹

題同年金繪自江聲草堂圖

湖外清江江上山江山深處草堂閑知君厭聽笙歌閑不住西湖住此間

松篁手種已成陰門外潮聲自古今一曲南湖鄉夢遠又來薇省憶江潯

似水交情久益親巷南巷北託比鄰何時却把魚竿去同作江頭踏浪人

送同年范電文之官鄧州二首

范以庶常改大興令忤上官被

良齋詩集卷二

五

誣去任上追思怡賢王嘗稱其能特授是職

三年輦下聽歌詠直節清聲到處留太息賢王勤

薦士重逢恩命畀名州素心未忘青山約綠蟻

休辭大白浮寥落芸籤無所用相逢猶共話瀛洲

龍圖老子怡情處退守當年願再留遺愛人猶祠

古廟傳家君合涖斯州春風堂下紅香滿覽秀亭

前翠黛浮好在政餘尋勝概新詞還繼百花洲

題王中安觀察春明需役圖

時奉旨督治山東河湖俟本

省巡撫覆奏到日始行中安與其同年錢脩亭太史鄰居并舊交二人合繪小影為致閱群書商榷治河之狀故以需役為名

前明罷海運會通實咽喉灌輸泗汶衛控引皆人

謀儲泉備蓄洩水櫃連數州東南歷充濟舊道由

沽頭黃河屢衝決改鑿經滕鄒昭陽十四湖地勢

居下流隄道無所歸泛溢為民憂聖明念民瘼

牧伯前獻籌云此可疏淪沮如變良疇臨軒遣

使者敕吏先咨諏先生家江源才望眉山儔班

心訝長身虬髯映雙眸迴翔臺閣間鬱為濟川舟

河干拜新命春明暫遲留卜鄰得知已過從欣

羊求遍觀河渠書商榷窮根由相於竟日夕彼此

良齋詩集卷二

六

無薰猶繪成四友圖人境俱清幽西園雖雅集但

誇放浪遊豈如此圖中經濟為獻酬人生聚與散

有如水上海惟能利萬世庶足垂千秋不見宋尚

書廟食河之洲仲通有遺跡公其繼前修

題彭翰文脩撰瑞芝圖

并序

翰文家丙午秋庭前香櫟樹下忽產三

芝遂舉於鄉明春會試廷試連擢第

一與其祖訪濂先生科名合轍真吳中

盛事也芝闕四載堅挺如新因繪圖屬

館閣諸公題之

靈芝如賢人出則爲時寶聲華播郊歌採獻窮山
島間亦產人家熾昌而壽考歐陽累世貴崔氏一
門好區區杜荀鶴詩句鬪纖巧一第何足稱尚紀
科名草異哉君家瑞聞者或驚倒維昔君大父宿
擅挾天藻 廷省兩掄元千人獨橫掃名高位不
顯勇退抽身早焚香夜叩天齋心日盥澡門如穎
川荀年比商山皓我生在下邑但聞諸故老爲善
必有後餘慶降蒼昊英英瑚璉器岐嶷自襁褓弱

良齋詩集卷二

七

冠聞四方詞源流渾灝瓊林凝雅度朗月照懷抱
由來天池物豈肯居潢潦庭前枸櫞林土潤和濕
燥下瑞於其間爭觀走里媪熒煌耀朝日葩蓋呈
翠葆三莖齊吐秀歷久不枯槁君時方應舉丹桂
墜秋顥遂冠南宮名首登龍尾道鸞鳳儀大廷騏
驥遊天阜祖孫若合符故事難搜討此芝信左券
此福誰能禱吾 皇秉至德休氣充大造 陵寢
奏神芝耜田滿嘉稻君今際盛運拜手賡天保清
芬家慶綿湛露恩波浩方當佐鴻猷使世登熙皞

古人亦有言志豈在溫飽鄙詞不足錄聊用代贈

稿

題古香叔春宵圖

并序

叔官內江九年俸滿遷紹興同知 命
甫下爲長官所誣坐落職寓成都兩年
時與相識酬唱春宵無事偕孺人暨兒
女翫月坐來禽花下聽外甥沈鶴徵彈
琵琶即事得絕句十章命工仿詩意爲
圖去夏携至京師屬峻題之半年來酬
應紛雜欲作復止今叔又赴西安爲五
言以紀之并以贈行

良齋詩集卷二

八

人生能幾何美景常易過別離念團圓事往愁無
奈夫子在蜀時八年撫惻愼量移不得去反被青
蠅涎全家寄錦城勢屈氣未挫新詩日盈篋高唱
誰能和良宵清興發對月還坐露來禽繞我前新
桐蔭我左茶蘼花濛濛香霧籠四座孺人能安貧
稚子皆有課清言追古人珠玉生咳唾沈甥理檀
槽淒調逾楚些哀樂感中宵詩成衆口播遂令繪

長圖萬里隨征馱去年來京師相見悲坎軻挑燈
話流年所至遭弄簌隨身餘卷軸結束牛腰大示
我春宵圖笑指為奇貨山林計未遂有 詔起高
臥羽書方交馳小醜猶未破廟堂急求賢丈夫豈
常餓勿為兒女戀行作棟梁佐小子愧無成半生
付情情猶能吉甫頌佇向長筵賀

義士吳鴻錫詩

鴻錫閩之晉江人羈旅早孤育於父友
郎中鳴某所及鳴老子幼族人環謝害
之鴻錫挺身持正卒定其家撫鳴三子成立
同年李立侯作傳詳其事又屬予為之詩

忠臣不食言義士報知己由來臨大節家國無二

良齋詩集卷十

九

理程嬰立趙孤王成存李氏在困志彌堅出險名
乃峙世俗日澆漓舊恩棄如屣卓哉吳君事高義
繼前史聞君七歲時隨翁到浙水邂逅賢主人相
依自茲始一朝痛終天哀此故人子嵇紹為不孤
文季信足恃提携迨長成報德固應爾惟是值艱
危庸夫多畏憚况當蕭牆內禍且旦夕起伶俜藐
諸孤迫此衰暮齒有肆如鴟張有強如虎視主人
徒周章親故隨波靡誰知羈旅身長城在於是君
誠至性人兼亦無雙士相持一慟後全家舉相委

挺身介其間兇謀竟消弭延師訓諸孤常恐墮紈
綺直從襁褓中教誨到金紫報 國振窮黎賢聲
馳遠邇九原定含笑生者不愧死君猶恐負託臨
沒懷未已平生好施與善行不勝紀吉人天所佑
有子早登仕吾友李君言茲事信如此嗚呼今之
人翻覆不知恥作詩發幽光庶以垂千祀

漳浦蔡梁邱房師五十

良齋詩集卷十

十

惟道在宇宙行之待其人惟天生大賢修道於一
身緬懷宋中葉濂洛披荆榛及乎南渡後儒風振
七閩煌煌紫陽書皦日懸秋旻同時得季通講論
情最親牧堂實開先仲默繼後塵名德享眉壽微
言覺斯民餘慶及苗裔不絕如傳薪篤生我夫子
乃在漳海濱自少陳俎豆天資粹而純欽承過庭
訓早探洙泗津謹身始灑掃敦本先人倫三才與
萬物方寸涵無垠下視章句輩培塿於峨岷何嘗
志科舉要自言彌醇登第未三十賢聲聳朝紳人
方羨通籍師獨理歸輪辛勤奉甘旨匪因戀鱸尊
仁心化宗黨禮讓興比鄰維時賢大吏掃室延嘉

賓鰲峰古書院講席敷重茵四方來學者負篋如
雲臻湖州體用具白鹿源流真至今閩中士文質
多彬彬恭惟 聖皇初慎選保傅臣我師首應召
授經來 紫宸 天家珪璋資啓沃日以新巖巖
氣象正欵欵丹誠申出入垂九年無間風雨晨
帝曰此正士嘉爾夙夜勤清班踐歷遍 御膳分
頒頻 國家鄉會試往者多有因吾 皇誠至公
賢俊無沉淪師惟懸藻鑑真才皆躍鱗蒐羅及樗
材感念還酸辛年來造門下常領座上春謂言士
有志毋役於賤貧讀書審所重身心及經綸玉卮
苟無當縱美安足珍薄質雖懦下聞言敢逡巡群
書經手定粹然歸雅馴豈徒託空言要使風俗淳
文筆固餘事力猶挽萬鈞掃除綺麗語馳驟風雷
神諸郎暨群從一一皆鳳麟登堂時握手器度何
恂恂猗歟我夫子盛德難具陳光明見肺腑堅白
無緇磷洪河挹浩瀚大岳標嶙峋如草有芝蘭如
木有松筠聞風尚奮起何況親陶甄行當佐吾
后展此胞與仁蒼生盡得所四海安平均三春曜

桃李覽揆逢芳辰願同舞雩詠持以祝大椿

席渭南生子

三千里外報懸弧老蚌新生照乘珠廿載舊交聞
起舞羨君真似魯商瞿

佳氣虞山接具區此時湯餅會何如當筵且誦坡
翁句阿大中郎喜有餘

海昌相國八十
生辰先萬壽節一日

正值虹流節先歌嶽降神 兩朝推大老一德共

長春舊澤傳沙路高門冠海濱五雲科第重三接

主恩頻文采驚殊俗裁成遍後塵律回冰署暖
氣迴玉堂新開府專旌節還 朝領搢紳日南留
佐兩北斗佐鴻鈞 先帝橋山路惟公玉案臣禮
嚴隆孝治官重掌明經投老甘閒地懷賢眷舊人
白麻中外賀黃髮典型真灑落能容量康強大耋
身盈庭皆晚進盛德若為鄰風月吟來遍雲煙世
所珍位雖文富似興與白蘇親和氣鍾陽月榮光
接 紫宸祝 君還祝相又慶甫生申

今詞方大太史與公同生日

哭歸安吳奉常房師

難將黑水洗沉寃萬里層冰慘鬼門魑魅有知應
下淚文章無處與招魂名高止竟爲身累罰重誰
能巧 主恩望斷尚陽邊外路幾時歸櫬赦虞翻

王良齋詩集卷之三

常熟王 峻次山著

長洲蔣 蔡誦先刊

題張鷟洲秋江罷釣圖

君非垂釣人黃閣早登仕胡爲慕浮家自比元真
子秋江風蕭蕭舴艋蘆中艤漁竿伴箬笠人坐柳
陰裏得酒且烹魚小童亦歡喜平生號柳漁寄情
乃在此我愧不如韓昌黎君才有過侯叔起他年
湖上棹歌聲裏或相逢好笑如今正似韓侯釣溫

水

題陸龍岡舍人濠梁獨立小影

至樂不在言言樂樂已淺此義出蒙莊常歎知者
鮮奈何濠梁遊機心仍未免鯈魚自從容人語徒
曼衍何如兩相忘解之以不辨看君獨立意庶矣
泠然善

寓言寄莊周寓形乞虎頭鴻濛一搏土便作濠梁
遊垂虹亘千尋渺臨滄洲相彼濠上人眼界空
九州不知金門裏曾有此樂不遽然成夢覺一笑

方悠悠

又題龍岡不負草堂圖五六七言三首

君家傍九龍我家在烏目相望百里遙同少數間屋

好境先愁易盡此圖已自堪傳待爾真成不負扁舟直到門前

如君豈合老樵漁只恐他年願易虛識得濠梁秋水意何妨天地作蘆

題顧稼軒同年耕讀圖

東齋書集卷五

二

羨君平生能讀書笑君學稼計轉迂良田每每在何許只有經史誇膏腴憶昔相偕入中秘摘毫握槩三年俱君先持節荷恩遇全齊六郡領轉輸使君惻惻吏民愛自稱識字耕田夫方思勸農興學校一朝去此緣何辜蜚樓變幻竟烏有蕙苾雖明先受誣家徒四壁不得住又携書卷來皇都頃者相見驚且喜襟情灑落猶故吾自言已辦終老計屬我題此耕讀圖我戲謂君何自污無田已坐逋官租

顧任山東糧儲副使時本籍有司劾其家抗糧坐降調而顧實無田也

倘令按圖責所

有只恐有口難支吾君因撫掌還語我我若有田肯出乎九龍山下五湖畔下溪百畝宅一區他年此願或能遂荷鋤敢謝爲農劬公家賦稅最先納柴門庶免相追呼樵山漁水奉甘旨晝耘夜織勤妻孥聖明高厚那可報且共野老歌唐虞新苗油油滿阡陌野田漠漠飛鷗鳬耕餘坐我柳陰下此時開卷誠堪娛此時開卷誠堪娛我亦願作耦耕徒爲君書此當左券莫成畫餅空描摹

題鄭丹聲明府試泉圖

東齋書集卷五

三

公餘獨上妙高峯要試煎茶第一功人似列仙遊島上水如瓊液出江中衛公別得終難信桑苧分來詎可聽爭似宦遊京口近不勞水遞自携餅瀟湘迴棹又金焦邂逅僧房借一瓢兩腋風生開眼界萬山凝黛海門遙

題王公衡副使觀潮圖

人生何境最堪娛我聞錢塘之潮天下無八月十八是其日乘高眺者無賢愚太原公子雄虬鬚前

身無乃眉山蘇幾年持節泣此都洋洋惠澤歌載
塗約東海若排天吳整頓舊觀還西湖平時官居
若蓬壺秋來望海興不孤飄飄飛蓋臨翠嶠不冠
而屨藉草跌江天停午琉璃鋪海門一線來須臾
雷霆奮迅萬馬趨旌旗組練紛長驅玉山倒却不
可扶又見銀闕凌空虛弄潮漁子爭譟呼去如投
梭漾若鳬觀者心悸汗浹膚使君坐嘯顏何愉胸
吞雲夢八九餘豪氣正要相宣輸憶昔試院會面
初森嚴禮數形神拘當時壯觀期已逾白袍鵠立
心煩紆別來三載歲月徂君亦赴 召迴天衢升
堂西湖挂座隅橫卷展此觀潮圖掀髯一笑指示
吾此景此行如此夫

良齋詩集卷三

四

家宗之編修招同館諸君飲芍藥屏下即
事分賦

今年閏夏花稍遲芍藥開時已炎燠豐臺欲往苦
無暇膽瓶數朶聊寓目忽聞吾宗發奇興神仙舉
動驚流俗娉婷買盡燕地種約客先期走僮僕升
堂乍見萬靈妃長短穠纖羅眷屬紅紅白白高下

映綴以軍持編以竹琉璃碧葉承寵光瑤井清泉
賜湯沐微陰喜遇養花天況有涼棚覆深屋雲蒸
霞蔚闢彩艷璧合珠聯巧攢簇紛如霓裳會大羅
燦如纓絡垂天竺皎如夜月照璇宮爛如朝曦挂
若木珊瑚交結金帶重寶髻欲墮瓊樓矗絲絲絳
縷鏤仙冠皓皓盤孟琢崑玉奇姿眩眼難諦視香
霧薰人醉芬郁酡顏相並殊淺深玉貌駢呈總清
淑陽臺過雨烟景麗姑射出遊年穀熟嬋娟窈窕
盛雲茶綵繚繚紛紛揚霧縠層層密比豈有數各
爭妍凡幾族得非吳宮教戰時合隊分行受約束
又疑秦使訪蓬萊三千少女隨徐福中央一片白
地錦好作仙家玉棋局丹書雲篆誰所揮垂露分
明盈一幅屏妙哉此舉奪天工盡日徘徊看不足
主人有酒期共醉佳客齊來不須速賓筵兩兩對
花排左右分曹徐射覆酒酣起舞燈影亂艷態玲
瓏光倒燭霏霏薌澤惱狂魂直欲將身花下宿人
生此會不易覲勝事應須埒金谷維揚席上迎四
相東閣筵前賀當軸豈如我輩皆散仙鞭鸞笞鳳

良齋詩集卷三

五

相追逐歸來酩酊倒床臥夢裏吟詩醒還續仙姬
香御在何處但覺衣襟帶餘馥

題趙橫山同年春曉讀書圖

吳山春早花冥冥晨光雲氣籠西泠誰歎築室寄
翠屏書聲夜光驚山靈惟君少壯弗敢寧鑽研故
紙窮六經山中面壁垂卅齡時來挾策登帝廷
仙才自合依仙冀天書獨校筆不停編摩充棟付
汗青歸來却舍天已暝一編向夜燈青熒衆人憐
君瘦伶俜勸而寶書神與形君言此語豈可聽吾

良齋詩集卷三

本

方望古慙先型九年溷跡承明庭韶光過眼風
花零衝寒待漏趁曉星黃沙似海車雷霆昏昏終
日何由惺少來腹笥遺豹鼯縱有翰墨堪覆瓶幾
時得告歸巖扃重尋舊業再發硯焚籠既脫免使
令心如止水初澄渟幽堂虛白生窻櫺山禽喚起
勞丁寧坐看朝旭升東溟牙籤迴映光瓏玲丹黃
在手別渭涇扶植嘉穀驅蝗螟巡簷一笑羅娉婷
天風吹動花間鈴下視闌闌夢未醒此圖此境含
餘馨請子作詩當座銘伊余學問初識丁廿年浪

跡同浮萍詩書與旨久不聆如入鮑肆忘膾脰君
今有意斲茯苓我亦歸去營茅亭他時問字來湖
汀勿笑巨鐘撞寸莛

再題五言一首

春山籠曉霧碧海瞰朝陽朦朧煙樹中著此讀書
堂書聲出林杪驚起百鳥翔問此是何境似在吳
山旁君爲諸生日籍甚聞餘抗力學三十年始得
登廟廊編摩遍三館著作羅琳琅神疲眼眩暗
短檠常近床乃知書生事性命寄縹緲君猶不自

良齋詩集卷三

七

足懷古情彌長六橋煙景好一畝儒宮藏十年勞
夢想妙畫憑髯張圖成名讀書所以誌無忘讀書
實不易令我增慨慷人生天地內百歲如風狂所
賴少壯時勵志不敢荒古人雖云遠遺法未盡亡
六經及百氏一一窮毫芒初如春氣至萬彙揚芬
芳又如日始出煌煌上扶桑華者歛成實微者漸
以彰學成而名立歷久道益光如何今世士舍去
甘面牆經書束高閣名利爭奔忙略知事剽賊遂
登風雅場剪綵爲春花安得有真香可憐竟不悟

白首猶俛俛嗟予少失業及壯馳四方飢寒廢書
本鬢髮忽已蒼古人不可到掩卷空自傷君今雖
較長精力比我強從茲至耄耄所得未可量春光
方爛熳塵海茫茫何時手一編共老江湖鄉

又五月三日奉 命典試貴州出都述懷

又上星輅出國門七千餘里發今晨從知行轍半

天下敢道量才似古人友人趙夢亭以
虞道園相勗入夢玉芽憐稚

子出都前三日妻生一男名點兒
余今年三十九始舉此子也前途山箐識苗民 皇圖

文治超千古直使侏離變指紳

慶都見水稻

髣髴江南五月中秧針刺水綠茸茸十年拋却西
園夢竟母陵邊愧老農

宿邯鄲叢臺驛

七雄始爭勝趙氏亦巨擘長城築未已叢臺復興
役可憐老主父不免雀穀厄子孫弱且愚秦兵圍
日迫徒合一時從未展百年策當時戰守地何處
指陳跡故墟傳漢縣臺名記今驛獨有回先生

夢猶籍籍

由邯鄲南過杜村至磁州北二十里中地
微窪土人穿渠引溢水溉田種稻數千
頃芰荷彌望桑柘成雲自畿南來所僅見
也

磁州城北二十里控引清流環溢水新苗舞浪綠
成雲荷菱迎風香吐蕊村村桑柘護穠陰夾路垂
楊深復深故鄉風景北方見停車暫憇關煩襟
途中乏紙單元復戶部兩惠松江箋賦此
以謝

徑尺華箋五色施廿番珍重再相貽只慚日日縈
春蚓不是襄陽播柘詞

滑於研綃好揮毫遠比澄心與薛濤但得小詩傳
畢曜雲間聲價洛陽高

謁岳忠武廟

強弓手挽雅歌嫺未許韓劉伯仲間誰使朱仙回
玉帳轉愁雪窖有刀環長城自壞天難問半壁偏
安主厚顏遺廟近隣嵇紹墓靈旗風靜古碑閒

榮澤渡河

侵晨發亢村前行到滎澤黃河從天來對岸十里
隔西瞻廣武山東眺平沙磧蕭蕭野風號洶洶濁
浪赤星馳奉王命渡此敢跼蹐揚帆泝中流直
抵蛟龍宅船頭怒撞春進寸退轉尺榜人爭喧
從者恐失魄移時乃到岸默語謝河伯平生好圖
史粗知神禹迹龍門至大伾北折循地脉滎波得
安流淮黃豈相齟如何百世後二瀆遂交迫自從
元明來爲患日益劇金錢揮百萬但有築堤策安
得禹再生其魚憂始釋

東齊書卷之

十

自禹州至襄城一路雨澤霑足黍稷茂盛
甲于他處并憶從前道途所歷詮次成篇
南行決二旬踪跡等鴻爪惟有憂時心夙昔在懷
抱初程歷幾輔赫曦燦晴昊中田龜坼繇下澤魚
愁蕘非無數寸苗困悴勢將槁滢陽景獨佳廿里
盈香稻地沃饒山泉雖旱庶可保從茲入豫界曠
野亦高燥湯陰始逢雨新鄉遇泥潦良苗已改觀
餘種惜不早渡河歷鄭州禾黍日益好昨從新鄭
來滂沱阻行道崎嶇宿禹州湫濕患蠅蚤嚴裝趁

曉發蛙聲喧水草天明覽四郊稼穡呈萬寶黍高
如新篁稷茂旣方皂莖肥挺丰茸穗重相顛倒土
膏潤油油黃茂紛浩浩香風起平疇對此已可飽

過昆陽城元復作七言長篇索和余不能
效顰別作五言答之

炎漢運中否真人起南陽少小好稼穡謹厚聞於
鄉莽惡旣貫盈咸思斧其吭伯升實雄才半途命
可傷更始與盆子沐猴而冠裳赤眉何爲者蠹蠹
纏餘殃公孫井蛙耳倔強坐待亡太陽麗中天燭

東齊書卷之

士

火無留光配天還舊物功德齊高皇昆陽昔戰處
至今表舊坊我來適過此懷古情茫茫鴻才揮巨
筆觸目皆琳琅天人共殲賊尸積百里強扛鼎有
餘勇數言了鋪張忽慕鄧高密自歎鬢已蒼人生
各有命遲早無相妨不見矍鑠翁銅柱立大荒幸
生太平朝報國惟文章古云三不朽何必親戎行
願君共努力無爲徒慨慷

王良齋詩集卷之四

常熟王 峻次山著

長洲蔣 棨誦先刊

次韻戲荅元復見贈

君如滿靶青冥縱一路風生萬目送我如雌霓伴
雄虹欲現還藏向雲夢猶嫌無翅難奮飛未免有
人潛侮弄僮如生鹿喚不應錢似良朋散難共行
隨高軒狼戾尾坐吟佳句牛鳴甕唱酬每怯螭弧
先酒饌時欣食指動勞勞行役朝夕同凜凜朝廷

王良齋詩集卷四

一

典禮重驚心前度陪大官堪賀此行猶伯仲念君
坦白無瑕疵愧我褊心煩勸諷如親公瑾飲醇酒
何異爰居儷丹鳳連朝策馬來荆襄大篇落筆兼
唐宋始知鴛足難追攀仰視龍媒騁飛鞚

荆門州

州在荆門下峰巒匝環城傳象山績地控虎牙
關驛路懸星漢嵐光擁髻鬢下和泣玉處千載淚
猶潛

元復投長篇自述好棋而棋甚劣作詩亦

然且謂僕爲大敵欲奉以爲師依韻奉酬
以示不當之意

平生讀書外癖嗜惟圍棋旁觀每技癢當局常迷
離時或遇強敵倔強諱守雌十戰九大敗披靡焉
能持旁人多大笑自顧無寸基尤慚多所好少來
頗學詩源流初不辨剽賊聊自欺正如五伎鼠何
異群兒嬉邇來皆罷去能事不復期庶幾晚聞道
萬事甘鈍遲詩奕雖異理好勝同一非夫君故自
貶實以解我疑豁然沈痼去針砭逢盧醫

王良齋詩集卷四

十

渡江

我生歷數幾渡江金陵揚子波春撞今來江陵上
游地晨發旅店過石杠循行江潝到官渡有船平
底無蓬窗天晴風細澄萬頃挂帆齊動篙一雙溯
流西上並灘去漁竿植水森如幢明霞倒映晃金
碧漣漪徐漾舞藻荇迴船捩柁向南岸兩槳劃波
聲淙淙中流四望渺無際遠見鳬鴨浮千艘須臾
已到虎渡口循良異事留此邦

雄化虎 渡江處 人生滄海渺一粟暫時何必誇旌幢朝發白

上岸處曰虎渡口水曰虎渡河相傳即後漢郡守法

帝夕到此名利自古奔愚蠢今我勞勞行未已江
神應笑如顛危欲待有田恐無日不如把釣尋魚
石

公安道中

昨日發江陵高原繁黍稷往來半商賈風氣雜南
北今朝過公安一望成水國陂湖相灌注積雨道
路塞循堤千轉折汪洋兩旁逼彳亍魚貫行惴惴
懼顛踣中田無他種萬頃稻一色火耕而水耨一
歲兩播植一年兩種稻惟公安一帶多湖
陂之處有之稍亢者即不能也早禾半登場秋稼

東坡詩集卷四

三

又翼翼遙空白鷺飛近水紅渠直吳儂居北久快
若遇舊識有一老農夫試問以稼穡云此楚中農
多貧少富殖當其豐稔時穀賤鮮所得一或遇旱
澇終年困無食頃過黃茅屋上漏下逼仄編葦不
蔽風日光射壁側始知楚民苦使我心惻惻吾吳
多情民不知耕與織乃食鮮衣華游談亂白黑皇
天德甚大生此實蠹賊何不移此地使彼觀作力
今我即其儔其可不自克書此當風謠長吟增太
息

澧州道中雜書所見

雞鳴發澧州澧水繞城曲撐州渡雙流廿里走平
陸天明過道溪上下四山麓曠覽心眼開縱橫森
萬木青松拔地起鬱鬱彌頂腹桐梓及榆柘盤根
互結局遠望密如薺經行黝若屋自從北方來塵
海困喧濁有山赤如赭有嶺兀然秃今朝喜見此
逢人問風俗云此州人產寸壤各有屬國賦出其
中誰敢縱樵牧道傍草木花繁英照人目或翠如
牽牛或紅若躑躅就中有紫薇形狀素所熟此花楚
人名寶

東坡詩集卷四

四

蟠花即紫薇惟
枝幹較硬耳開落澗水邊嫣然媚幽獨尤憐蘭蕙叢
披荆得一簇想當春花時芳馨滿空谷靈均述香
草覩此知實錄後人強分疏都梁豈其族緬維騷
人鄉即事多感觸蘭芷與蕭艾有時迭榮辱吾生
固有涯游歷亦易足何時入深林超然返初服
常德王槐青太守惠辟嵐酒色香味皆佳
絕用東坡洞庭春色韻為謝邀元復同作
南行五千里杯盞倦入手時因畏嵐蒸勉強嘗惡
酒感君從事賢憫我夸父走搗香投上藥辟瘴且

延壽清光浮琥珀芳氣達戶牖可憐狂畢卓抱甕
徑嘔嗅遂令老無功持杓爭升斗從茲歷千山喜
得掃嵐帚力祛南徼癘勇過北宮黜歸時拜郡庭
再乞澆饒口

桃源洞 有序

前在武陵槐青太守為余言桃源遺跡
非真郡界異境自有此不足數今日發
桃源縣渡朗江行山中十里許道左有
門題曰桃源洞即地志所稱秦人洞也

良齋詩集卷四

五

山上有屋數椽黃冠居之左旁翠竹萬
竿幽澗屈曲詩石頗多皆明以來俗人
筆也再上有石梁橫澗湫滑難登上有
洞相傳明時封閉遂去前行渡一水俗
名水溪志云桃花溪也唐劉夢得有游
桃源百韻未知即此境否余嘗謂桃源
事陶公偶述所聞或因武陵地近五溪
漢時猶屬蠻徼多山險可避世聊寄寓
言耳後人必欲求其地實之道家者流

又假撰漁人姓名附於列仙之儔豈不
愚哉爰紀以詩

白馬渡頭渡朗江白波青嶂煙蒼茫峰迴路轉十
餘里仙洞乃在大道傍下車入門步石磴依然崖
廣開軒廊潺潺澗水曲流處翠竹萬个林千章俚
俗點綴殊可笑差喜絕境橫石梁我時欲上足力
倦登車速去愁夕陽前行一里渡溪水謂是漁人
此捨航紛紛傳會何足信古來茲事誠荒唐憶昔
伏波定南服其時此地猶蠻鄉羸顛劉蹶本不恤

良齋詩集卷四

六

當塗典午誰能詳戶口尚多圖版外耕鑿何怪深
山藏自從後世闢土宇遂令絕境成康莊愚人謬
見強穿鑿刻舟繪影求毫芒武陵太守不好事拊
掌直欲嗤柴桑今來到此始親見乃知太守言非
狂題詩更憶韓公語只好作畫垂中堂

自桃源新店驛至沅陵界亭驛

蒼山去無極鳥道始今朝曉月明郵店行人視斗
杓籃輿坐兀兀驛馬聽蕭蕭漸覺朝曦啓徐看宿
霧消有林皆鬱鬱無嶺不岌岌石确能傷足溪深

欲沒腰僕夫行惴惴村店苦寥寥脫粟吾能飽前
程興轉饒峰迴障日影樹密裏山椒黯黯懸崖冷
紅鮮厥草天清泉響環佩山鳥奏咸韶隱隱藏茅
舍油油徧稻苗快心逢曠野開抱納涼廳方喜平
田穩誰知險境邀羊腸通一綫箭枯上層霄鐵壁
誰鑿鑿龍關特建標隘口曰辰龍關鑿石通路下臨千丈迴勢扼五
溪遙屈曲循山徑潺湲歷板橋荒亭分界處土堠
向人招破屋仍逢雨無眠過此宵

自馬底驛至沅陵

長壽詩集卷四

七

群山錯列勢巉巖怪石當前孰敢剽驛路上穿千
坂過籃輿懸度兩繩銜桃源我已窮仙境酉穴誰
能啓玉函歷盡崎嶇到沅水扁舟可羨信輕帆

沅陵江樓

千家山郭帶江流勝概憑高聚客樓南控五溪蠻
笮遠西瞻二酉亂峯稠城頭日落嵐光熱水面風
來爽氣秋天遣吳儂飽山水名山不斷又滄洲

沅陵道中賦筒車并序

筒車桔槔類也採木爲輪內外兩層圓

徑丈餘兩面厚尺餘中聯直木爲間架
編竹片三十餘方釘四周截竹爲筒斜
縛其間前後植木以安軸置輪水中壅
上流之水使急下激輪旋轉岸上架木
溝受筒水入大竹中注於田不勞人力
而晝夜不息楚南人名爲筒車於沅陵
麻溪中見之蓋急溜中用此事逸而功
倍也

古來有水碓江南惟水車筒車之狀今始見圓圓

長壽詩集卷四

八

非鴉亦非蛇

東坡水車詩翻翻聯聯銜尾鴉給給角角蛇骨蛇

風輪圓徑一丈外

編竹爲版筒交加驚湍壅使怒奔赴左旋右轉聲
呶呶銀河倒瀉飛瀑灑坐使高亢成卑窪木牛流
馬制莫考楚人小智亦可誇漢陰丈人若見此不
知何限含悲嗟

自懷化驛至羅舊驛

連日陟危險甚欲饒疊嶂今朝得夷塗原野亦清
曠却愛遠近峯屋歷歷供眺望長林翳山腰脩竹出
牆上秋蟬嘒淒急山鳥聲圓亮豈惟耳目清頓覺

懷抱暢經過漁水灣沅川流滉漾涼風浮波來披
拂更蕭爽黃雲割萬頃擔負相呼唱墟烟藹相接
雞羃任閒放旅舍既清幽間閤亦仁讓居然楚南
陽有此好風尚日來歷荒程可憫亦堪悵那知數
驛間苦樂各殊狀聊書目所經一醉付村釀

行次沅州寓南寺

朝行沅水濱午次沅州南州居黔楚界土風樸且
慙頗愛山水佳繞城環翠嵐明山峙西北幽境古
鮮探我行既勞瘁信宿謀停驂其如地遐僻旅店

良齋集卷四

九

尤不堪叩門入梵宇清靜信所耽前堂何高煥西
院藏精藍窻虛地爽塏燦燦花叢蓼老僧不世情
自去開經函香來磬聲靜猛向初心叅我生困塵
海端坐愛與貪奔波千萬里世味亦飽諳終當返
巖壑彌勒還同龕

玉屏縣

舊為平溪衛屬湖南今改縣屬貴州設有驛通黔
楚接壤居萬山之中民風淳厚餘僕稱幽僻甚
治

孤城遠寄萬山中北楚南黔路僅通一自聖皇
開郡縣遂令荒戍釋兵戎居民落落千家聚旅店

蕭蕭四壁風惟有溪流最清絕灘聲永夜響如洪
自焦溪至鎮遠二首

今朝初入黔徑險賴開鑿連山漸皆童危嶂盡如
削行經深溪傍湍急喧噴薄呀然見堂皇有郡無
城郭長橋屬山根巨石立大壑石屏何巍巍形勢
重鎖鑰閭閻三四千夾水爭附託琳宮構懸崖窅
兀跨樓閣長官何自豪鼓吹晝夜作邊關衝要區
中土一村落

良齋集卷四

十

吁嗟椎髻族狀貌何猙獰穿環插鳥尾跣足猿猱
行依然爲我僕牽輿上崢嶸始知聖化遠異類
歸編氓方將教之道設學開庠黌所恨衣冠士風
俗日就傾澆漓失天性何以服夷情拙哉爾長官
慎毋太驕盈

相見坡

雞鳴度文德名關僕夫足已繭崎嶇三高嶺上下千
迴轉磴道互相望行人影可辨終朝出沒間往蹇
來復連上俗以相見名語俚意匪淺惶恐舊名灘
喜懼亦號獻他時見親知一笑相慰勉

黃平道中觀苗人穫稻

舊聞黔中最磽塉恒雨少晴苗不碩我來幾驛異
所聞秋陽杲晝月皎夕偏橋昨日所經處已見香
稷滿阡陌今朝山程喜非險飛雲欲訪阻行役東
坡迤邐入黃平萬派清泉流瀼瀼田塍高下分千
層下至溪邊上山脊黃雲舞動香風起想見浮浮
達甌隙腰鎌者誰推耨種太古以來茲所宅自逢
聖世齊稽首偕我婦子登帝籍田中力作相
依依大環掛耳釵一尺由來血氣皆可化吳楚自

良齋集卷四

十

自黃平至重安江驛望道左諸山

凌晨出山郭西轉勢何陡綠雲窮躋攀上盡乃如
阜平看道左山萬狀無不有遙青與近綠盤互疊
前後爭雄各崢嶸分脉殊牝牡或如相追逐或若
聯鑣走威疑蹲虎豹並類坐夫婦堆者列几案凹
者掘窠臼方田紛布郛斜麓獨垂肘巔平真帶幘
崖豁忽開牖連延三十里迴環抵江口石形森玲

瓏峯勢結樞紐裁裁雄雞冠號為金鳳首金鳳山名其南即重安江
嘗聞諸人言黔山盡頑醜日來山中行異境不勝
取人顧未知耳山川豈受垢安得官此方皆如柳
州柳

清平道中

重安江過陟崔嵬半日山行亦快哉巖作香爐紫
篆霧崖藏仙洞貯風雷道傍有雙明洞俗名大風深三四里其中常若風雷相近有香爐山
眠道上山城寂猿嘯雲間縣廨開縣廨在山上城中居民僅百餘家茅
屋幾家迎驛吏清平路穩使星來

良齋集卷四

主

早發楊老驛至平越簡元復

殘月照我行曉霧起我前忽如跨汗漫不辨群山
巔危哉斗青嶺當路高插天上下幾迴轉千于時
懼顛崎嶇三十里豁然見平田山城露樓堞一簇
羅人煙尖峯八九堆矗矗頭相駢循崖渡長橋險
仄輿難旋翠壁削千仞深溪黝澄淵經過毛骨聳
天地皆杳然惜哉真異境不聞隱神仙但云有葛
公名與橋俱傳橋為葛鏡所造事見通志橋下水名麻哈即重安江上流也黎峨古荒徼
山險尤綿聯自從置邊郡道剗虎豹遷近復起賓

館高垣可安眠仰惟我 聖主威德暢八埏吾儕
奉使至詩句方流連豈知跋涉苦且欲窮山川

平越道中望張三丰影

黎峨城南四五里千仞蒼崖臨碧水輿夫指點令
我觀仙人奇跡留在此崖巔猿鳥不到處面目未
辨人影似手携筇杖頭戴笠彷彿樵夫非道士神
留宇宙四大字結構天成尺有咫誰人好事鑿其
傍無乃公輸受役使神留宇宙四字郭青
標書作詩時未及考我聞三丰洪
永間出入隱現難揣擬文皇物色歎徒勞蠻獍何

見齊詩集卷四

主

爲肯投止當日市上吹都盧至今城內崇廟祀廟
中老桂傳手植石罅涵泉清且泚猶于崖壁寄此
影嗟尔邇邇何弔詭神仙之說在縱有自古未聞
終不死王喬錢鏗安在哉豈若吾儒信常理黔中
昔本號鬼方地遠怪集俗頑鄙水銀丹砂足土產
金馬碧雞難誇舊史固知不少煙霞徒神異恍惚何
足紀愚氓好怪競流傳幻妄誰能究源委安得長
劍刻此跡萬古水流山自峙

雨中發新安村過一嶺名雲停關上下俱

險時嵐霧四塞石滑艱行作禽言二首紀
之

泥滑滑泥滑滑霧雨暗空山君車底輕發前峯雲
起高如天哀猿杜宇聲相連君縱能上却難下不
如及早思迴旋

行不得也哥哥汝今到此柰何前望萬仞之高山
下臨不測之深溪峯當車路兮石碎馬蹄又况嵐
蒸瀕洞天昏昏兮雨淒淒君行到此將毋迷

元復既和余禽言復增二首見示反其意

見齊詩集卷四

主

荅之

提壺盧提壺何處沽黔山水濁雨淋漓幾度鋪糟
更啜醪君不見菜把難叨地主恩安能琥珀照芳
樽項龍里今送疏
菜不敢受也

不如歸去歸去先愁來路來經赫暑抵清秋歸去
嚴風正打頭天寒暑短長安遠日暮勞勞未敢休
君言歸去豈不好爭知念此令人老

聞虞山相國下世

廿年待從禁闈身六載公孤輔相臣才大舉朝誰

可並 恩深同輩迴難隣
臨分猶記丁寧語一晤
那知永訣辰回首却傷門下士
少時無賴吐車茵

王艮齋詩集卷之五

常熟王 峻次山著

長洲蔣 榮誦先刊

九日黔中諸太守邀登東山讌集

勝地知名久良辰嘉會同
傍城高翠嶺入霧啓琳
宮翳翳秋林繞攀緣鳥徑通
俯臨峯陡峭幽折石
玲瓏帶水縈芳杜

山下即芳杜洲
南明河繞之

環橋卧彩虹間閣羅

萬井雉堞抱雙弓煙靄虛無裏
笙歌縹緲中峻嶒

聳銅鼓瀟灑御金風勝槩看無盡
登臨興不窮重

煩賢太守來作主人翁開府勲名盛
藩侯筆陣雄
絳紗推雅度蘭省亦宗工自顧粗疎甚
叨陪禮數
隆玳筵張紫岫仙樂振丹楓
漱灑傾奠酒馨香把
菊叢閒談聆政要偕樂慶年豐
醉卧籃輿穩長吟
蠟炬紅西南得朋好他日憶諸公

贈定番州牧牛待林

十年邊徼宰官身載作州侯政益醇
乍見便能捐
俗態數言更喜激吾真人同陽子甘遲拙
歌到春
陵自苦辛安得如君千百輩布爲牧伯慰斯民

留別同年劉完璞叅議時因事解任

殊方相見各悽然回首瀛洲共比肩
三折肱中更世事一彈指頃數流年
要知无妄終須喜只是前途尚慎旃
別後思君明月夜隨風還到夜郎天

飛雲巖用前輩金會公先生韻

黔山多洞穴氣化所凝輳茲巖更奇
絕如堂乃非竇強名以飛雲殊狀誰
悉窺穹然俯而臨天然樸且秀想當
鴻濛初于此幻傑構鎔鑄百物形舞
空作懸雷如翼張左偏似背折而右
玲瓏王母宮幽

良齋詩集卷五

二

邃天帝殿亭臺踵人工曲折上層甃
諦觀諸怪石巧匠窮授受蛟龍戲爪
牙獅象怒角鬥盤摩秋隼閒倜儻天
馬驟金華走羊群溟海褰鵬味又如
老樹根出入穿猱狖平看到壁間天
矯掛蜺蜺惜哉荒陬中有此巧攢簇
奇章詎能移仇池輸此富規模雖約
畧記憶旋誤繆下臺歷幽窟滴乳飲
之壽樞衣步中亭萬景來奔就天籟
奏遙泉脩林藹深園亭前太古柏濃
綠奪新耐俗人殊可恨鑿石紛楷籀
無文漫題名有句僅成讀遂令今天
全境瘡垢

多釘鉅金公詩稍佳描畫半能副我
無古人才敢與爭珠鏤聊以告來人
茲巖冠宇宙

黔中吟時次偏橋聞苗警作

黔中分東西鳥道僅一綫地荒林箐
深山險溪流浞編氓十一二本自他
方轉餘皆椎髻族頑蠢古所賤粵自
漢唐來羈縻置郡縣夜郎常自大流
官出譴譴明時路始通大小劇百戰
謂此滇咽喉鷄肋能不戀金錢糜轉
餉羽檄疲馳傳所得纔數衛太半委
荒甸國家暢聲靈化暨蠻方適當年
水

良齋詩集卷五

三

西征千里震雷電至今沐教澤秀良
儼登薦我皇德冠古赫矣仁風扇舊
日長官司納土爭舞抃文教日以廣
武衛多精練蠢爾九股種獸心而人
面刼殺爲生涯强弩毒刀箭聖人憫
民深咨汝在廷彥曰余于天下物物
使安莫如何黔粵間伏莽乃數見于
時詔元戎授以幾宜便元戎吉甫才
麾下皆妙選統師分勦撫逆者戈先
剗兇苗始喪膽稽首歸耕佃兩鎮旣
屹立一隅賀清燕胡爲僅一年餘孽
潛相煽蜂蟻二萬餘乘我城未繕攻

圍越兩旬軍中告絕膳羊腸極崎嶇魚貫難救援
可憐裨將羅前行血已濺昨余過偏橋洶洶相弔
唁逢人捉從軍號哭淚如霰嗚呼此方民軀命輕
螺蛸干戈甫云息疆場又告變爾苗終撲滅我民
禍再纏誰能將此情一一陳 丹殿

舟行雜詠

山行困乏自鎮遠乘秋船由青溪玉屏
出黔入楚之沅辰經桃源武陵登陸凡
十一日水程千五百餘里舟中無事坐

良齋詩集卷五

四

覽山川遇有會心率爾成詠不計工拙
以當俚人棹歌而已

灘溪清淺出黔山五里灣環三里灘買得秋船如
釣艇乘流兩槳去無難

大王灘惡石嵯峨

灘在鎮遠北

挾柁迴頭纜倒拖還有麻

陽船不怕隨灘上下捷如梭

五更蓬外聽淋浪驚醒孤眠客夢長彷彿廿年鄉
國事一帆秋雨卧吳航

山遠波平樹渺茫一江紅日射晴光龍標景物騷

人地橋似垂虹水似湘

高粱桐木

名

重灘過短短青山曲曲塘已別黔陽

二千里今朝依舊過黔陽

而黔中亦名黔陽故戲云

白馬灘來廿里長石如頽土水如湯山頭黃色繁

星爛共道油桐新插秧

楚人以油桐爲業桐老則結子稀故歲歲種之謂之桐秧

忽然數里盡杉林轟轟成行黯黯深正是晚來堪

畫處夕陽萬樹暮山沉

千家燈火射船窗短笛橫吹信口腔誰道黔中諸

良齋詩集卷五

五

大郡不如南楚一洪江

洪江巡司有人家千餘貨物業集黔中諸郡戶口尚有不和者

山如截鐵石如礮十里頻江草木稀檢得坡陀堪

坐處便應呼作釣魚磯

舟行盡日少人家遠見荒山一徑斜茅屋兩間風

雨裏伐薪採蠟是生涯

東來一道會雙龍崖壁崢嶸地勢雄喚作大江名

未稱江流只與大溪同

瀕江峭壁斷猿猱怪底何年結構牢歷歷蜂房懸

石竅舟人指點是仙巢

山半人家燈火明漁舟欸乃送歌聲上弦新月辰
江路水濶灘平好夜行

橫石灘來險莫當驚濤悍石震礪破百夫曳得商
船過一綫中流幾破航

去時四槳若乘空來者篙工又緯工兩岸漁船閒
曬網夕陽風靜半江紅

清浪灘前禱賽來年年此地怕罹災驚濤不讓黃
牛峽亂石多于灘瀕堆

依然浮樸此山川稚子張罾叟刺船撥刺滿筐纔

良齋詩集卷五

六

出水但知換米不須錢

陸行憎嶺水憎灘忽見山稀喜動顏直是人心難

足處北來一路愛青山

幾疊遙山拱翠嵐綠蘿如畫抱西南長官便合稱

仙吏何必花源始足探

武陵勝槩信名區北枕陽山東傍湖桃洞萬家仙

作佃橘州千樹木爲奴

再題澧州寓樓

巖風打面日銜山傑閣重臨一望寬水落岸邊膠

野艇林空雲際露青巒去來鴻爪留塵壁迢遞
王程閱歲寒沅芷澧蘭忙裏過霜天短景路漫漫

襄陽二詠

峴山

峴山高不極名以羊公傳羊公去千載太傅祠巋
然同時杜元凱兩碑勞自鏤公碑人所爲觀者淚
漣漣竭來過山下慷慨懷昔賢山光暎漢水朝暮
含雲煙喧喧大堤上士女徒駢填誰爲後來者已
矣讓公專

良齋詩集卷五

七

鹿門山

鹿門在何處天寒隱雲霧車中引領望微茫辨煙
樹藹藹幾家村閒閒沙際鷺龐公昔隱此榮祿遂
不顧復有孟夫子流傳盡佳句寤寐千載後何人
繼高步我欲往從之一水不得渡歎息風塵中終
年走道路

禹州道中

茫茫四野寒蕭騷朔風動地聲怒號車帷卷破馬
蹢躅夕陽慘淡橫平臯行人瑟縮帽簷側手脚凍

冷面如墨晚來投店滿衣塵童僕相看不相識

大風中發鄭州次滎澤渡黃河

北風終夜號空庭寒鷄喚客行戴星荒郊莽蒼路
不辨霜飈割面濁酒醒晨過滎澤望風色黃塵瀕
洞連青冥驅車河干誓欲渡僕夫搖手勸我停須
吏勢解陰翳卷榜人邪許齊揚舲濁波撞舂猛于
礮橫風助送疾若霆冰澌激流散漫沙路土軟
行伶俚回看千人始爭渡此舉豈我能通靈幸逢
聖人方有道河伯效順江海寧黃昏且到亢村

見齊詩集卷五

八

宿頽然一醉忘郵亭

鄴城懷古

肩摩轂擊日喧阗樓閣崢嶸亦壯哉一代英雄爭
霸統千年樂府怨高臺河山剩有漳流濁文字猶
推鄴下才可歎前人誇作記老瞞去後季龍來

嵇紹廟題壁

父爲人所殺子乃忠其孫此事吾不取當共王裒
論

渡漳河

漳河水未堅無梁又無船淺深不可知車馱須人
肩詰朝到河干號呼使來前皮視圍及胸股足相
纏連十夫舁一車人馬負且牽入水能拔淖履水
若行天惴惴懼傾陷遙遙苦迴遘五里得登岸吾
心始安然嗟哉爾小民生計誠可憐耐此兩脛寒
博取一囊錢所怪爲長吏黃紬忍高眠成梁當十
月王政夏令傳乘此水落候長堤詎難填籍藉傳
以土便作虹蜿蜒行人免徒涉輿馬亦安便何爲
勞此輩終日往復旋

見齊詩集卷五

九

過漳沱河

漳沱水落亘長堤十里飛塵四望迷岐路橫分并
豫界河南山西兩省大
路分于河之南岸羽書遙自雍涼西日斜大野嚴
風急冰沍寒沙渴馬嘶可惜常山形勝地蕭條間
井雜輪蹄

過方順橋小憩樂志園贈主人夏叟

擾擾黃塵裏和光獨葆真問年逾絳老居市類嚴
遵花藥分畦整葡萄出甕新時嚴冬出所藏葡
萄遺余如新熟者似君誠
大隱閑盡道途人

除夕次逯賡若韻

萬里洋舸半載游歸來不作賈胡留山河放眼窮
燕楚鄉國關心望斗牛往事蹉跎難屈指明朝四
十又平頭燈前却笑妻孥話阿囡他年早覓侯

癸丑元旦疊前韻

十年冰署抵閒游鉛槧無能尚滯留鴛鴦充廷容
野鵠觸蠻分國寄蝸牛招尋酒伴持藍尾排遣風
光向陌頭情興不殊人事異揮戈誰是魯陽侯

人日再疊前韻兼簡賡若

良齋詩集卷五

十

春來半月已堪游何處林間囀栗留帝里韶華忙
剪綵故園田土事耕牛牽情草木梅迎笑入夢庭
闌雪滿頭念爾高才猶未遇東西南北歷諸侯

題宋伊人廣文桃林夜坐圖

舍南舍北皆桃花春來遠近蒸紅霞蜂喧鳥語太
無思月姊夜造幽人家幽人生長山水窟呼吸花
光弄明月官居亦慕芙蓉仙幻作綺大千樹發花
時却愛春宵靜坐對嬋娟舞交影天風香霧渺無
涯惟覺一庭涵藻荇回看下界煙濛濛金烏欲上

飛埃紅仙家日月去塵遠花開花落空山中

輓館師吳文恪公

秩宗方進位元老遽云亡一代文星隕中吳藝苑
荒哀榮崇典禮涕淚遍門墻丹旆東郊路秋風落
日黃

遠憶諸生日論文坐里間四方尊月旦一紙重璫
璵壇墀誰能繼津梁信不虛自憐頑鈍質早歲讀
公書

九載陪東觀公為一絕志樂歲與纂脩相聚凡九年三年侍絳紗光風周茂

良齋詩集卷五

十一

叔弘獎李西涯顧我才誠忝從公跡未賒孫陽今
已去誰與憫鹽車

送海昌相國予告歸里

十行恩詔層霄下千載光榮祖帳前列公孤
遭盛世學兼仙佛享長年沙隄不改春明路雲樹
遙迎潞水船佳話故應逾漢史一時贈別盡詩篇
鶴髮飄蕭八十餘中間四紀總官居詞垣故事傳
吾黨桂管輿歌記下車道直不嫌卿月冷心清常
似玉壺虛十年兩誦宜休詠今日真成賦遂初公七十八

十歲時有宜
休堂自述詩

張丈殷兄少舊人後生相見眼中新揮金樂共疏
公子訪道名高賀季真榮戟久推星聚里蒼松獨
挺歲寒身天教位業超仙籍長向東南領搢紳

中秋前一日招吳鳴佩汪謹堂劉爾鈍趙

朗岑四同年寓齋小集謹堂有詩次其韻

二首

秋蠅如掃月將圓風露娟娟欲暮天有限杯盤燕
市近無多室宇虎坊邊人來南徼聲名遠鳴佩視學堂
南明冬視學

良齋詩集卷五

十三

粵西皆以官轉西清地望連謹堂獨銓四月
間同陸侍講獨笑樗材仍

落拓良宵投轄漫相牽

新詩清麗孰如君却話鴻泥憶校文

謹堂詩中述去年中
秋余與諸君各費

及視學
于外門外白袍猶昨夢眼前青瑣亦浮雲且看蟾

影當三五合對觥船盡百分過此塵踪何足記人

生要自有離羣

中秋後十日同吳鳴佩和村徐晉村三同

年暨查奕梁庶常飲謹堂齋中疊前韵

雁唳長空菊蕊圓風光已近九秋天西山翠落晴

窗外北海樽開幕露邊物味好于逢子美交情樂
似遇成連酒酣忘却襲襲鼓頑僕催歸衣屢牽

良齋詩集卷五

十三

王良齋詩集卷之六

常熟王 峻次山著

長洲蔣 蔡誦先刊

甲寅年正月初二日次同年趙橫山韻

塵編堪笑久羈身過眼流光已十春憶自復蒸陪

謝傳謂總裁將文肅公初從綾餅賜徐寅初進館時六登第未成濫竽但坐

觀英俊鑿空還教破渾淪余分修邊外多無舊稿可稽楮葉雕殘何

所用即今花樣又增新

送史慎齋少宗伯 予告歸里二首

良齋詩集卷六

青門又見藹羣公聲望由來冠浙東十載承 恩

馳使節一朝抗疏出南宮鑑湖勝概雲霞裏通路

歸程烟樹中只恐前身為賀監官資鄉里訝相同

頻年卿月照秦關惠利名應鄭白間馬首雲連鷄

鹿塞卷中詩說賀蘭山勞臣老覺朝衫重 聖主

恩容畫錦還記取耆英高會處海昌祗隔一烟鬟

題石門吳孟舉仿爭坐帖

顏公書法變歐褚細筋入骨力透楮爭坐一帖尤

入神氣奪姦諛筆騰舞軍容僕射爾何人關冗么

麼那足數英風想見空當時遺跡猶能重千古流

傳墨妙到宋代四家分派尊一祖近來能者稱數

家誰敢與公為接武吳君善書人未知僅有此帖

家藏弄忽驚光怪照我室滿紙蛟蛇挾風雨淋漓

頓挫中有稜脫畧筌蹄自合矩聞翁詩文擅海內

此道研精乃如許始知前輩不自炫能事深藏若

良賈東坡之言不余欺書有顏柳詩李杜嗚呼此

意誰能知世俗方誇京兆嫵

題靜海勵文恭公家白海棠圖

公家居時手植海棠二株於庭

良齋詩集卷六

垂二十年公以尚書卒官靈輿歸里時方秋忽聞白花滿樹那元褒編修為繪圖諸人作詩紀之

公昔來今故鄉植雙樹今華堂神仙安兮超衆卉

承盼睐今被榮光自公遊今 帝所抱孤芳兮獨

處待公不來今春復秋花開花落兮從風雨忽傳

語今公歸辛夷車兮桂為旗持絳節兮朝天扉白

鶴哀鳴兮雁南飛斜陽掩曖兮百草萎悵芳心兮

誰訴悲舊思兮難遇乃屏霞裾易縞素凌金颼溥

玉露留冰霜之潔白兮罷粉脂而不御思昔日之

燕衍兮對几筵而哀慕於時巫陽與司花之神亦

泣然有感也重爲歌曰瀛滄之北今日月之旁渤
海泱泱兮河水湯湯唯公盛德兮子孫其昌草木
懷恩兮人何可忘千秋萬歲兮視此甘棠

題戴巨川庶子畫馬

自題曰
稱德圖

先生畫馬如畫牛不著鞍韉不絡頭超遙肯與駕
駘伍放曠還同麋鹿遊先生相馬如相士德合剛
柔比君子神閒氣靜在平時電激飈馳日千里拈
毫十日又五日慘澹經營能事畢恍疑貌出古纖
驪直壓開元卅萬匹君不見黃金之勒錦障泥多
少款段當風嘶安能借汝載飛將層冰蹴裂交河
西

良齋詩集卷六

三

五月三日出都赴滇口占贈鍾仲恒侍御

牂牁西去是滇南大半山川舊所諳萬里王程天
渺渺一條官路柳毵毵君恩首荷臨軒遣文柄
重司顧影慙侍御聲名今第一此行何幸伴星驂

早發柏鄉

三更喚僮僕畏暑趁早行車中殘夢醒吹面微風
清黑雲接新月時射一罅明疎星漸滅沒四野霧

氣盈

過邯鄲呂仙祠

聖人占六夢清明故在躬未聞借夢幻一舉萬境
空有唐以來誌仙怪技能多者數呂翁揭來邯鄲
化俗士俄頃枕上該窮通虛生之事沈君記千年
佳話傳兒童叢臺遺跡久茫昧歸然道左留仙宮
風雷隆一表宸翰規模重敝明世宗廢興閱世又
百載摧頽無復能鳩工遊人歌詠不知幾蛇蚓塗
滿垣西東當年一夢亦偶爾遂今後世夢中說夢
皆夢夢我今馳驅再過此神仙應笑真愚蒙不願
相隨丹竈學不死亦不願登台鼎爲三公但願空
山了我此生事何必跳身入枕中

良齋詩集卷六

四

連夕逆旅中爲臭蟲所困

自我來北方聞汝便踉蹌居恒選高燥潔清理床
席家人雖惡汝相戒勿指斥連日觸暑行停午困
行役所喜投旅店倒身過半昔咄哉鷄肋軀擇肉
何太劇惟汝之窟穴詭秘善緣隙當晝不敢見其
出必以夕旣寔繁有徒又去來無迹巧伺逾隙

噴最甚蛇螫俄頃果腹去爬搔血狼籍墳瘡遍肌
膚臭穢入肝膈肥者漸成瘠瘠者幾成腊可憐容
舍中夜夜遭此厄皇天生萬類蠕羶各自適蠅蚊
雖可憎猶能帷帳隔蚤蝨雖善嚙捕取尚易獲汝
誠賊之尤驅除竟無策譬彼巧譖人吹毛工指摘
譬彼姦貪者蠹國自營宅天實假其時於汝又何
責涼風起高秋恐汝亦褫魄忍之在須臾作詩示
行客

雨後發鄭州至新鄭

良齋詩集卷六

五

晝行畏烈日夜起恐不早昨者渡黃河風氣殊曠
潦崎嶇赴管城淋浪透征皂天明始能發泥濘滿
官道肩輿度高隴轉側慮傾倒經過郭店驛糲食
不能飽梅山亘道左黛色淡如掃茲實鄭國都古
蹟莫能討頗喜適野宜停驂散襟抱微雲倚疎林
餘潤著纖縞涼來禦寇風詩似裨謔草且暫駐時
門洧淵龍莫惱

時南門外湊洧水頗大以船渡

陽翟道中

潺湲清潁繞城流劇郡今爲中下州千載漢庭推

治行至今留得鳳凰樓

早發禹州次襄城

三更催就道風露渺無涯燈火千林月笙簧兩部
蛙高堂念鄉國數口憶京華恍惚車中夢驚聞噪
曙鴉

七聖皆迷地征軒又駐留首山橫作案汝水淥於
油貨物通淮海禾麻甲豫州當年李元禮何不早
歸休

過昆陽城

良齋詩集卷六

六

秦亡由鉅鹿莽敗自昆陽百萬成京觀千秋此戰
塲廢城當孔道遺廟識真王自笑成何事重來奔
走忙

登峴山麓觀音閣

朝行峴山麓東望鹿門山漢水隔衣帶嵐光香靄
間山形漸西折幽澗流潺潺危坡插江澦傑閣凌
屏巔登臨貴得要矧不勞躋攀憑高一回首勝概
超人寰沙頭漾帆影天際連烟鬟隔江望樊城漠
漠混市闌叔子不可見懷之淚空潛不如從龐老

躬耕常自閒

苦雨行自宜城至荆門三日行泥濘中作
荆門三百里鳥道千屈盤值此久霪雨吁嗟寸步
難高岸盡泥淖平疇漲狂瀾陰雲不肯散后土何
時乾我歌苦雨行喟然起長歎

輿人舁我行泥深路湮塞盡力拔前脛後脛又如
植違淖走叢莽頻傷胃荆棘連連上高嶺號呼助
登陟俯身下長坂千仞懼顛踣凹間聚行潦洶湧
更不測幸得出重險相慶各喘息我實奉王命

良齋詩集卷六

七

不敢淹晷刻嗟哉爾與人徒使我心惻

今朝詣荆門衝泥行更苦登高復入坎動足成險
阻斜風吹我衣涼氣挾細雨浮雲失荆山瀕洞連
三楚從茲入漏天陽烏幾時吐

荆門旅店夜中大雨不止

中宵又聽雨翻盆鷄失鳴晨八表昏明日前行恐
無路真看萬壑赴荆門

建陽驛道中晚晴

羲和睡去晝乍醒蛟龍歸海天還青平田沆漭水

泱泱林間鳥雀閒梳翎行人悠悠頻策馬我亦蹇
惟眺四野只愁礎潤未全收夜來仍作銀河瀉

自江陵至孱陵卽事感懷兼示仲恒卽用
其發麗陽驛次石橋韻

我行奉簡書不憚千萬里胡爲走泥中搔首問天
咫自從鄢城來輿馬俱難恃艱危抵江陵彌望皆
積水高牆泊柳梢小舟撐屋裏禾黍半已空中田
但清泚澤國鴻可哀使臣衣亦滓賴有同心人相
忘我與爾同舟濟江來片帆凌渺瀰和我渡江篇
待我於水涘前途雖舊經夷險難逆揣去年君適
粵所遇寧有此懸水尚可屬忠信固如是請君堅
其心叱馭今方始

良齋詩集卷六

八

自張莊涉潦水次順林驛行數里山水漂
沒田廬道路阻絕却至順林無旅店借驛
亭宿

張莊南指順林驛出入深湍幾遭厄登高遠望四
山間浩渺烟波一片白王程晷刻安可誤策馬重
行不暖席倉皇忽見前驅回云此再去卽大澤人

家宛在水中央樹杪游魚屋呈脊不知遠近幾十里已聞三日斷行客我為躊躇且還幾日不可輕一擲蕭條旅店更卑濕驛吏相招過今夕三間茅舍頗楚楚潔淨未許污塵跡幽篁蕭疎梔子肥萱草花繁古苔碧迴思數日走泥塗欲說人知舌猶昨吁嗟名利復何為羨爾微官有安宅何時稅駕遂初心歸卧茅簷夢魂適

武陵江樓邀仲恒詠月

帆檣樓下不停喧隔岸雲林護幾村君看西南無

良齋詩集卷六

九

盡處青山隱隱是桃源

千頃琉璃漾碧潯清風時起一披襟長安何處浮雲外明月依然遠照臨

三宿斯樓我已多一杯相屬子當歌從茲漸近黔中路野草荒燐又若何

仲恒得巨鮓魚作鱠攜酒就江樓共飲次

韻以謝

堆盤二尺喜腮紅

鮓魚以腮紅為鮮

風味東吳約略同嘉會

感君攜榼至良宵勸我舉杯空波光一片澄闌外

月色三分照座中清景暫時畱客住明朝又屬馬牛風

夜過桃源洞

我來桃源縣炎暑汗如雨二更便登車覓路沅江澍經過白馬渡靜聽呬啞櫓舍舟入山中風露灑竹樹洞門響流泉洞外人高戶鷄犬寂無聲千山月卓午

辰龍關

驛程走山中到此忽一鎖偏仄兩崖間上下愁傾

良齋詩集卷六

十

墮誰剗天一綫鐵壁立帖妥居然小劍門一夫守自可聞昔逆臣吳蜂蟻亦云夥雲屯據此關數載連烽火時清不恃險行者歌且坐山木盛扶疎野花開婀娜題詩聊記行來憤莫如我

夜發界亭驛途中口號

二更發界亭團團月初上峯迴徑幽黑時與月背向人語響空山溪聲瀉重嶂掉臂不知愁賴爾興夫壯

沅陵江樓觀雨

再到真如夢登樓憶舊遊同經千里險非復一江
秋雲壓山城暗煙迷客艇收滂沱宜晚稻行路却
添愁

薄暮雨止閒眺

雨過江天豁涼風入座來炊煙山郭暝渡口野航
開半嶺屯餘霧遙空剩隱雷此時機慮淨默坐亦
悠哉

迴龍閣

在使水驛
北三里

山迴龍盤盤瘦脊高倚空瀕江一綫通烏道轉側

良齋詩集卷六

士

閣下穿瓊瓏水迴龍漱灑自南折而東危灘峭岬
抱兩腋巋然下瞰撐穹窿川流山峙由造物結構
扼要須人功不然萬象各偃蹇縱有千疊萬棟何
能雄

青溪有感

禍患來時豈偶然良由人事亦由天守城羸卒無
三十椎髻克苗有萬千厝火積薪安肯信焦頭爛
額更誰前而今莫笑前人拙一衛能安三百年

華嚴洞

在施東縣東北二十餘里中
有石幢大士像皆石乳所成

石壁撐霄立仙巖入地藏幡幢供大士乳液落輝
牀蠻獫多靈異兵戈足感傷兩廊焚燬盡猶護
空王

行次施秉聞知縣蔡謹守城功爲作歌

偏橋三面皆苗鄉苗來如蟻勢莫當殺人到處付
一炬山爲焦赤天昏黃居民相對惟號慟蔡侯智
勇聲不動開門納民誓堅守三百鄉兵敵萬衆手
燃巨礮發無失血戰大小三十七羣苗膽落始遁
逃屈指被圍將百日吁嗟乎同時鄰境陷沒無完
堵獨保孤城賴明府誰能爲奏 聖明君便授旌
旄鎮黔土

再遊飛雲巖

去年苗亂廬舍寺觀悉遭焚毀
惟巖下月潭寺及亭臺尚存

閒雲一墮留終古可惜靈奇落蠻部亭臺僧舍故
依然神物護持賊莫侮長林蔚蒼飛泉鳴劫外風
光分外清雲山無主客再至對此踟躕空復情
新添道中

行經幾驛歎邱墟安穩新添過使輿雲護秋陽那
苦喝風來遠嶺欲憑虛長官邂逅情偏洽旅館清

幽趣有餘便愛清泉試佳茗分來陽寶是雲腴

陽寶山產茶宰官
分送少許絕佳

王良齋詩集卷之七

常熟王 峻次山著

長洲蔣 榮誦先刊

普定道中

我行貴筑西三日就平路黔山亦坦腹曠然得安
步雞鳴發平壩咫尺迷昏霧晴明望諸峯恰與幽
興遇廉尖螺髻聳繚繞煙鬟護雲根琢彩翠瘦骨
嶄然露連延峙道旁令我屢回顧蠻人見我來牽
牛入深樹此方服化久法令尚不迂鳴笳振山阿
要地軍門駐前途有奇險到此宜小住

白水河觀瀑布

安莊驛路懸崔嵬流泉時見穿蒼苔白虹一道天
半來峽束湍怒聲喧阗長橋橫空怪石排有徑偏
仄緣山隈懸崖斷處地劃開飛空百丈轟晴雷天
山雪壓一角顏晶簾搖蕩鏘瓊瑰玉龍爭下攬作
堆跳珠濺碧紛碎摧風吹欲散俄收回霏霏霧雨
如黃梅既落猶作千漩洄老蛟吐沫鯨鼓腮道旁
驚見憩石臺胸襟濯盡萬斛埃金烏西走驛騎催

欲去未忍還徘徊徒聞匡廬與天台銀河倒瀉傾
仙才此間異境有如此蠻鄉荒僻供疑猜

郎岱晤牛待林司馬

愛國嘉謨昔猷聞誰知荒徼再逢君地當四面蠻
夷窟身與千山麋鹿羣高嶺插天還置驛羽書堆
案未收軍從來司馬官閒冷辛苦偏將一路分

自郎岱至列當驛

早聞郎岱南新路險且長鷄鳴赴前途崖高月無
光風號天忽晦悄見山雄張登降幾百折始得十

長壽寺集卷七

二

里强成卒拜且言此去慎自將盡力上石磴俄焉

陟其岡絕頂曰大鐵關其南十里曰那邦坡萬山入平揖矗立如劍鉞俯

視下山路足慄神倉皇欲南且北轉將西反東望

盤迴萬千級無由辨四方天晴恐蹉跎况乃雨淋

浪躑躅二十里人馬汗且僵力疲不得住又到毛

口旁四山環擁一水中源地常燠多瘴毛口水深急惴惴一葦杭艱危

上那貢坡名葡匐抵列當終日風雨中投身瘴癘鄉

茲程半人鬼險絕言難詳

斗狼箐

斗狼高插霄萬木蒙龍蔽循途繞山麓壁暗天無
際輿夫喘不前號呼兩繩曳盤紆至山胥身已入
雲際回觀所經山帖地皆瑣細是時煙雨中寒帷
試一睇灌木不知名山花開自麗芭蕉葉拂衣翠
竹陰交翳羣猿競來窺野雉止不逝行行造其巔
惜哉難暫憩蠻荒故多奇天地亦護閑此方山更
雄物產佐國計丹黃及鉛鐵採取有定制而此深
箐中材木衆仰濟自來阻幽險兼亦畏瘴癘一朝
成大路見者恣芟薙我知十年後山童地且敝感

長壽寺集卷七

三

此遂成詩山靈庶相契

庚戌橋土名藍溪兩山夾水曰羅盤河橋跨其上成於雍正八年故名

昔聞滇黔路鐵橋施鬼工自從新道開舍棄難爲

功昨經毛口河祇用一船通大書西林渡謂與山

川終今來普安北奇險逾蠶叢攀緣及萬仞有水

西向東傍水路一綫驚湍耳爲聾兩崖漸相束不

見朝暾紅深林嘯猿狖怪石攢虬龍崖轉路絕處

有橋亘長虹斷鰲鎮鼉窟填鵲移龍宮貞碑屹其

西華坊兩頭崇名之曰庚戌詎與丁卯同用碑中語我觀

碑上文作者誠豪雄鑿山人跡外置驛蠻巢中指
揮役萬夫號令如雷風山神亦俯首幽憂惟所窮
寄言後來者登茲須憶公

霑益州

新州舊交水井邑聚千家地沃九宜稻山平解用
車溪流通八達驛路接三岔辭却黔中險誰知天
一涯

馬龍州

蜀相南征置郡還千年荒穢落羣蠻升平六詔咽

東齋詩集卷七

四

喉地斗大孤城匝山石燕不飛行客喜

州北舊烏

龍無警戍兵閒

烏龍箐州境戍守地

獨憐羽檄馳東北長吏初

來鬢已斑

小關索嶺

大關索嶺路不行小關索嶺猶崢嶸盤迴陟降數
十里氣勢俯瞰羣山平蠻稱揚磨人不識漢家將
相留威名傳聞諸葛曾會此道旁片石標南征我
來滇陽四五驛山如土阜徒縱橫翻思黔中山水
異陟降雖苦難忘情今朝登此稍相似耳目開爽

足力輕安行又到易龍堡驛吏灑掃樓臺清從茲
直抵滇池畔碧鷄金馬煩相迎

制府尹元長先生招飲

風清祭戟靜無譁堂下羅生四季花壘得小山如
太華疏成曲沼映晴霞無何日飲過三爵未絕風
流敏人義一事更令顛米拜點蒼持贈壓歸車

重九前一日撫軍是齋張公招飲署中酒

半登臺學使孫端人館丈有詩制府尹公

次韻見示依韻奉和

東齋詩集卷七

五

授几賓筵次第開公餘勝賞忝招陪花間屐齒無
塵跡天際風光入酒杯曲徑引人衝暮靄遠山延
客竚層臺芳辰賢主情何限愧乏登高作賦才

九日孫端人招飲署中尹公疊前韻見示

再和

五華秋靜絳帷開佳節仍來盡日陪禮數喜寬從
脫帽酒腸元窄怕深杯經旬似作平原客故國常
懷蕭統臺

昭明讀書臺在虞山爲邑中登高處

吉甫詩篇真肆好九天咳

唾羨仙才

陳榕門方伯餞飲署中賦此留別兼呈在座諸公

秋蘭揚芳馨軒宇清且曠再登君子堂惜別轉惻
愴長筵羅佳羞旨酒期盡量主人意彌勤肅揖毋
固讓酒行杯無停情洽言更暢天涯一再會此後
遙相望明朝別諸公風雨歷千嶂

發平糴至亦資孔

秋山嵐洗秋風清薄寒中人曉衣輕吟蟲無聲草
木冷眼界但餘天日晶滇南勝境已辭却羊腸上

下黔山迎可憐籃輿昇殘卒云自征苗歸故營新
開險路無人處每日須夫幾百名

自劉官屯至碓子窰

平旦發新驛山險路益遙天陰釀初寒微雨風蕭
蕭經過楊松驛下望庚戌橋清溪夾萬仞茂樹籠
山椒林中聞人語道上有墮樵寒蟲響不輟紅葉
色未凋危途雖可畏佳處時相要

雨中過大小斗狼箐

小斗狼箐七八折大斗狼路更險絕蜿蜒十里幾

十盤雞公關索敢齊列蒙龍萬樹翳天日釀雨蒸
雲失秋烈人從天半下林杪欲留不能氣鬱結平
看對面山萬重如瞰如折鬥截累我行半日雨已
收忽衝雲脚又噴泄與夫踣躅情人助泥滑兼之
石凹凸況逢大木當路卧性命須臾懼傾跌山下
居民三四家伐薪採斲衣破裂行人再過不勝愁
爾來家此一何拙嗟哉苦樂天難均蓼蟲食辛性
亦別

自列當至郎岱途中口占

蹣跚一路上高峯四顧羣山角立雄朝旭幾回穿
樹出爭如雲氣萬重蒙

毛口河邊瘴癘多西林渡口一航過青山四塞天
常煥六月行人將奈何

前途險絕更無雙捷似猿猱氣亦降四十三盤關
索嶺何如二十里那邦

普定道中戲作

簇簇尖峯夾道旁駢肩離立鬥雄強可知椎髻由
天性能使羣山也學粧

山行苦寒

天寒走山中雲慘風聲苦草木淒以腓巖石冷太古燦燦野菊叢幽芳誰復數蘆荻隨風翻飄搖不自主饑鴉啄空田鳴噪時相聚行人怯衣單瑟縮成偃僂陽鳥雖可愛三日翳不吐遙看東北隅白霧亘停午兵氣與災青纏綿哀此土

贈陳密山按察

憶昔東山共舉觴德星今又照蠻鄉律身直具三千禮繞指誰知百鍊剛蠹類難除宜化導殘黎有

良齋詩集卷七

八

限半流亡知公觸目痼瘵在不要人歌六月霜

贈錢野堂副使

快馬走千里快人了萬事先生昔在都賢愚知姓字孟公擅尺牘廣文多蒼萃三絕誰不珍與到特其寄一麾出柳州子厚讓席避理煩移桂林報最擢黔使廿年羨高名一朝逢此地屬當蠻蠢動軍國劇勞勩遺我繞朝策莫罄囊底智還轅再經過欸留荷高致寸莛得春容深感不余棄投詩誌傾倒知已良不易

鎮遠登舟簡仲恒

陸行倦登陟放舟下潯水風和天日晴溪淺灘流駛寒山多剌峭霜葉時旖旎賞奇憶舊題結伴誌新喜客路就浮家經旬亦樂矣

舟中書感

迢迢鎮陽溪下與辰沅通紆回幾千曲流轉山峽中湍急石攢立舟楫須人功有船類釣艇十石僅足容篙工盡楚產貨物來江東黔中處絕徼道險過蠶叢賴茲衣帶水銜尾聯帆蓬自從用兵來轉

良齋詩集卷七

九

輸人力窮載士裹草返饋糧資冠戎至今楚南地

民貧府庫空

夜望山火

波州村前夜泊舟遙看夜火燔林邱電光一線自地起金蛇百丈橫山頭炎官熱屬施吐燄絳幡赤幟從風浮山後一隊來燧象林中羣起突火牛連連奔奔亘數里膈膈膊膊延四周爛然光彩到江面江心夜半驚潛蚪羲和睡去望舒隱百蟲不敢鳴冤讎題詩豈爲誇壯觀聊解遠道風波愁

舟中遣悶

前年到武陵順流十日耳今年秋少雨水落石齒
齒舟人棹不停日行僅百里小艇才容身欠伸防
觸抵况逢石尤風閉戶不敢起愁心念長途計日
但屈指悶若繭中蠶澁如磨上蠟青山自逶迤江
水長渺瀰婉彼垂竿翁浩蕩煙波裏

晚過辰溪

岸濶江天豁波平返照明四山凝暮靄小市散孤
城長吏黃紬卧郵亭白鳥迎異時曾羨此水宿一

良齋詩集卷七

十

開情

舟中望江岸石壁書所見

在辰溪澁溪二縣間

危崖壁江濱瞰臨幾百丈舟行過其下人語山峇
響石形門璣瓏洞穴赫宏敞俯探魂已驚仰睇神
俱蕩忽看崖隙間結構絕人想架空木縱橫插罅
椽三兩連延綴蜂房漂搖冒蛛網鳥飛不可過當
日如何上舟人頻指點使我彌惆恍云昔三桂時
居民苦擾攘相攜逃此中不爾罹賊黨聞言轉愀
然前行去沅渚

晚晴赴辰州

輝輝曉日滿晴川風定灘平好刺船沙際鳬鷗衝
宿霧山頭村落起炊煙舟過江口無迂路水出沅
陵別有天記取仙源圖畫裏重經爲證五年前

此去吾能識真自沅陵到武陵壬子舊句也

橫石灘

沅陵北有橫石灘水落灘高勢逾壯篙工行慣等
兒戲兩槳橫衝拍天浪崩騰徑造水仙府簸蕩疑
聽小海唱有如鳬鴨浴盤渦忽然滅沒瞥又颺又

良齋詩集卷七

土

如錢唐八月中船從潮底下復上衣裝浸灌何足
計性命幾成魚腹葬天公小試意不惡萬事應須
齊得喪明朝清浪行再經出險胸襟轉虛曠

過清浪灘再用赴辰州韻

巘岈怪石峙清川一綫分流上下船廟祀尚傳銅
柱烈舟人齊薰紙錢煙驚濤噴作空中雪急槳飛
過浪裏天從此安流武陵去一尊聊慰晚山前

穿石

伏波征蠻時病勢已危急曳足望蠻軍萬衆爲感

泣至今壺頭北石壁傍江立呀然一洞啓兩頭通
出入雲煙常往來陰陽自噓吸傳聞卧疴時鑒此
避暑濕古人不妄動用兵在安輯爲國不謀身讒
言尚叢集舟中望遺跡懷古欲高揖忽憶少游言
回頭念鄉邑

漁人得巨魚與仲恒分買而鱠之

銳頭霜鱗五尺强味鮮不數鯉與魴漁人夜起截
江網跳梁力盡橫其航經過清浪出重坎對此流
涎思一噉攜來猶疑勢倔强劃破還憐氣悽惻持
刀縷切玉肪潔搗香作鱠味芬烈君不見楚人飼
犬且用魚一飽何嫌近饕餮惜無斗酒向誰謀不
爾還同赤壁游

澧州水閣和壁間張南華韻

紅蕖照水曾迎我白鷺凌空慣避人一遇髯張便
多思尋常花鳥盡翻新
潺湲澧水遶沙洲杜若江離何處求落日蒼茫無
限思賓鴻嘹唳向南州
沅浦經行又澧浦西風老柳尚依依長安日近雖

堪戀只是投林鳥倦飛

王良齋詩集卷之八

常熟王 峻次山著

長洲蔣 榮誦先刊

江陵道中大雪用旅店壁間韻

昨日東風急寒威夜半添蔽空花似掌灑面凍黏
髯已飽山川險還逢雨雪兼江陵城外路猶記水
齊簷

茫茫平野外不見去來蹤詩思歸驢背郵程認馬
蹄煙橫荆嶠遠雲壓楚天低向晚消融盡歸鴉自

良齋詩集卷八

在啼

曉發荆門州又遇雨雪

雲暗風號雨雪稠荆門山路阻仍修來時萬壑奔
潢潦此日千巖盡白頭躡躅籃輿防滑磴支離鈴
馱困泥溝石橋驛市荒涼甚得借茅簷睡即休

過襄陽再晤魯亮儕副使卽日招登峴山

亭賦長歌以贈

我昔遊京城人道先生名先生姓魯亮儕字其人
磊落才縱橫歲寒松柏晚乃遇庚子賢書推獨步

孤羆傲兀騰深叢老驥長鳴騁王路盤錯試盡歷

刺郡大吏忌之羣小愠 天顏再覩披膽陳是日

連城重聲聞遂來襄鄖擁旄節江漢秋陽方皎潔

星軺曩者投樊城夜半訪余不忍別雄談時見霜

髯張壯志堪令唾壺缺遺我詩文前後編長路相

攜吟不絕歸途重過漢江曲握手謂當留信宿此

去三十里隆中故址我所復別有新構峴山亭相

其形勢當年羊公定於此遊囑二公遺跡重天壤

到此不一觀終日馳驅毋乃太局促吁嗟先生氣

良齋詩集卷八

二

誼如邱山而我未免俗與頑聊就其間動遠之思

廬不敢顧峴首且躋攀躋攀力盡出宇宙落日蒼

茫沉遠岫襄陽樊城一氣不可辨但見江頭漁火

時隱顯此時賓主意氣俱浩浩談諧間出驚絕倒

酒酣慷慨發浩歌俯仰今古當如何吁嗟如公今

無有二古豈多

大風發新鄭

朦朧殘月走鄭郊大塊一噫聲怒號吹來沙海幾
百里卷盡野屋三重茅我與簾蕩不得進我馬辟

易驚欲逃驛亭借憇久乃醒口含沙礫耳若熬僮僕顧我訝且笑搏土作人混鬢毛陽烏當晝匿精景凍木向北鳴蕭騷野田飢禽時自噪雲中孤雁求其曹昔人對此思猛士徘徊周道中心勞

二月五日鄒慎齋吳穎菴張南華會飲敝寓南華用杜詩韻作歌見示依韻答之

十年書館誌郡縣筆硯塵封客不見一朝棄去理殘編似遇故人重叙面二三知己數晨夕詩酒連場歡飲宴蓬門漫枉長者車草具聊供野人饌鄒

吳詩集卷八

王

吳溫雅如飲醇髯也絕倫喜挑戰圍棋百局詩千篇興到雲烟揮素練自言南郭濫齊竽也效東方登漢殿疎身汗漫追前賢落筆驪珠捷飛箭欣然惠我雲錦裳何由乞得天孫綫

慎齋見示和詩慰及沉淪疊前韻奉謝

飢驅廿載辭鄉縣夜夜高堂夢中見海鳥安知金奏音寒花不作春風面居然久竊太倉粟且復頻叨鄉舉宴憶初通籍陪履綦

余初爲廩常先生以前輩教習事

幾回操

翰分堂饌先生愛才良獨切下士聞道苦交戰歲

月堂堂似逝川風塵擾擾紛採練羣賢今滿黃金臺散材豈稱凌雲殿深慙慰藉話積薪却喜追遊消漏箭詩書倘可收桑榆此道真憂繫如綫

和慎齋種柳

倒插生根隔歲枝種來已見吐青絲自從韋白歐

陽後不屬先生更屬誰

三公皆有種柳詩

披煙抹月向天涯此物由來少在家分付東風好擡舉從今不傍陌頭花

裊裊依依得氣初輕盈舊態未能除如何便與黃

吳詩集卷八

四

鸛坐

元詩有使請黃鸛到我家句

且養清陰伴讀書

詩家清景恨寥寥不說蛾眉卽細腰佳句傳來心眼淨好風吹我過溪橋

題杭大宗編修松吹讀書堂圖

杜老種四松愛護如小友崎嶇梓閭間念之不置口豈無閒草木天艷非吾耦君昔植雙松幾年伴左右亭亭翠掃空謾謾風入牖託根一畝宮奚啻依二酉牙籤三萬軸披拂絕纖垢有時海濤音靜和蛟龍吼自登鸞坡來憶爾屢回首傳以韋偃筆

補以營邱手結習未盡除索題到粗醜自慚懶讀
書廿載事奔走君才真武庫腹笥無不有平生所
披閱辨析難稂莠時或奏英韶天籟發深叩卽今
館閣中如星有北斗書堂舊松林藤蔓恐纏糾良
時每相思猿鶴爲君守彼木雖後彫未若典墳壽
願君勤著書金石志不朽

送陸龍岡戶部之任奉天卽次其留別韻

三首

興王重地控神州陸走榆關海可浮風土尚傳箕

良齋詩集卷八

五

子舊曹郎不比管寧留 英雄草昧天開祚 原

廟衣冠月出遊述德歌功臣子事此行休作旅人

愁

長白山邊黑水前清時絕塞靜烽烟幅員遠接俄

羅界郡邑紛從大氏年耶律東京無幹朶完顏故

國委毛憐憑君公暇旁蒐討破暗端須寶炬然

威京

地志古今沿革傳聞失實紀載多訛余承修此
書訂正累年猶以地非親歷未能盡信故云

幾載摘毫直紫微襟情灑落似君稀分司自昔娛
詩老遠宦從知少世機野獵黃羊跳兔美盤飧香

稻細鱗肥只愁官滿當遷日心戀茲鄉未忍歸

程門姪人沈氏完節詩

明月麗中天小星三五陳貴賤分雖異從一道則
均婉彼名家姬隨騰侍盟巾一承君子恩玉雪凜
此身白日忽西匿冰天永辭春斷指拒非議長齋
歷艱辛歲年處空房皓首無緇磷餘芬傳子孫貞
操感鄉隣吁嗟世道喪節義多亂真金錢買衆口
綽楔高嶙峋虛聲復何益恐媿青衣人

題程禹勤工部兄弟春郊聯騎小照

良齋詩集卷八

六

綠楊紅杏照芳津何處風光不可人十里皂林盤

馬地羨君兄弟共探春

伏波浪泊征蠻日款段終思弟少游春草池塘知

入夢秋風鱸膾早回頭

題馬文毅公草字彙

六書亦小技人傑道自尊丈夫履憂危卽事足討
論戔戔文毅公忠義自性敦橐筆入禁近手可星
辰捫西南天萬里出布 明主恩便宜飭兵格飛
鳥避戟轅詎知肘腋禍翻從虎豹蹲拜表請出師

慟哭蒼煙根別館幽四年死事聚一門逆豎未授
首責志排九閼史臣有直筆野老猶聲吞當其就
義時俗慮百不存臨池手一編情至時復援此心
未卽死此腕猶孤騫上窮漢晉體下參唐宋元飄
如驚鷺逝屹若連山奔分爲十二部字字窮真源
光焰燭青漢神明護幽昏至今展遺翰正氣橫乾
坤匪惟草聖秘皆是公精魂侍姬標正書秋勁含
春溫刑于洵無忝奕世留芳藻我觀張王後妙筆
如雲屯如公稟間氣庶幾追平原

良齋集卷八

七

題謝梅莊侍御軍中學易圖

謝以雍正丙午冬由編修改御史尋

以勅河南巡撫田雯鏡得羅漢城北路軍營十三年冬召還臺中作此圖自序云振武將軍駐防處在杭甯山下地名陀羅海過瀚海三千里去京師六千里樹木爲城三城並峙背山面水城南爲市街漢官効力者居之冬極寒南客無敢出門者時維首夏河水始涸洋岸柳方舒孤憤狼塞西北最高處選石跌坐玩河洛先後天諸圖俯視三城猶方野也

燕然瀚海連金微

嘗考史塞外山川燕然瀚海即杭甯金微則阿爾泰也

漢家征討無

留碑神廬北過寶憲壘匈奴柔然疊盛衰烏德韃

東又移帳

唐回鶻徙牙烏德韃山東亦卽杭甯山也

和林一路遂肇基至元屯

田置郵站杭海之名到今垂

元太祖始居和林杭海在其西至元中屯田于此瀚海杭海杭

之轉也

國家威德被元裔九白貢獻常先期呼韓

良齋集卷八

八

邪悞郵支悍款關內附請六師天戈一掃大漠靜
葉街懸首子女羈五十三部感再造世世保塞同
藩維溫禺遺業恃荒遠寄巢蒲類窺西伊連年用
兵疲士馬天山瀚海勞奔馳先生直節真御史手
搏豺虎攫窮奇謫來漠北事征戍丹心報國詎
肯移三城排柵傍杭甯將軍樹纛萬騎隨萬里層
冰夏方泮千山積雪春不知健兒白骨在沙野先
生處此甘如飴穹廬呵凍點周易置身太古叅皇
義先天消息悟象外不用羊胛心爲著四月維夏
塞草長流澌散水楊生美山高地迥可眺望神州
雖遠同襟犁狼塞狐帽稍和暖韋編在手心神怡
餐糲屬國節誠苦當時可惜但牧羝豈知先生事
更好端坐玩易忘憂危伯安龍場悟性體正叔傳
易遷浚時昔賢見道由患難所貴實歷非空辭先
生學問本躬踐雕蟲小技何足窺臺端獨立抱霜
簡卽今聲望重四夷斯圖豈比聚米爲山畫絕域
要使觀者頑廉懦立卓然思自持

乾清宮御試賦得薰風自南來

七言排律得來字

炎天景物麗蓬萊長養風從南極來頽末起時新
雨過林端動處晚涼回飄飄複殿通青瑣披拂重
簾掃綠苔吹到堯堦常穆若韻傳舜樂更悠哉液
池荷放香初遠御甸秧分浪自開解喝蠲煩調節
序宣幽達滯暢栽培虞廷至理今方見唐殿微吟
意未該共仰 聖皇勤庶政還緣茂對覽恢台卷
阿豈弟孚羣品渙汗絲綸遍九垓豈美新聲傳沛
里非因快意上蘭臺求言不棄誠懸諫作頌還收
吉甫才正是齊賡魚藻日小臣何幸柏梁陪

良齋詩集卷八

元

倪穉疇侍御招同穎菴南華寓齋小集

閨秋天氣正晴和來款清齋似邵窩庭菊飽開霜
未下棋枰閒對客無多新詩合共題黃絹小戶頻
驚卷白波日暮花前拚醉倒嚴城更鼓奈催何

王良齋詩集卷之九

常熟王 峻次山著

長洲蔣 榮誦先刊

藉田禮成恭進詩

靈壇遽豆禮 先農鞭耒親持傍袞龍芳甸乍融
春雨細彩旗徐轉瑞煙重健行欲倍三推數庭贊
同時百職從稽首臺前奏終畝如雲亞旅洽歡悰
春滿乾坤二月天桑麻樂利溥無邊愚民但願豐
登繼 聖主常懷率作先草印金根浮玉露林搖

良齋詩集卷九

一

豹尾裊爐煙倉庚布穀知人意百疇催迎大有年
霰霖如酥秉耒時天心真與 帝心期太平有象
安耕鑿大造無私眷緝熙 主德儉勤超漢景民
風淳厚似幽詩從茲盛典年年舉不羨開元但具
儀

送謝梅莊督漕湖南

謝陳情乞降近地州縣
養母 特旨授是職

乞外古來有於今例不行唯公憑直節將毋獨陳
情事或驚時俗思真荷 聖明長沙到家近書鵲
早相迎

楚塞連黔徽頻年苦用兵籌兵才不易督漕職非輕轉益丹心炯寧誇終節榮相逢曾幾度話別遠

合情

爲人題蔣質甫學士仿趙松雪墨蘭

吳興寫蘭如作字神妙意不在形似小南沙筆亦清絕分作三叢石齒齒墨華浮動影蕭疎花葉參差芬旖旎臨摹遺跡四百載擺脫時蹊幾千里憶昔初遊相國門親看妙手追承旨瑤環珥茁蘭芽揮翰玉堂今學士廿年兩世閱人寰過眼雲煙驚迅駛爲君題此還自嗤可似樓頭吾晤子

東齋詩集卷九

二

送唐莪洲提刑廣西

又作提刑赴桂林油幢冒雨去駸駸我慚桓典青聽馬君得韓公碧玉簪唐拜命時余適改御史庚癸諾來經虎口太常齋久剩冰心唐先爲山東按察時以請賑江南迂總督田雯鏡改太常寺少卿霜威好散蠻鄉瘴灘水難方惠澤深

送陳見復夫子赴雲龍書院

廿年遠別爲浮名舊學新知愧此生繞奉音塵歸故里又看書劍赴彭城二三同社題詩送千里賢

侯擁篲迎寂寞棘人誰共語春風坐上不勝情

次韻奉酬家西澗先生見贈

歸然耆德寓東吳望重明初嚴大夫嚴食都德珉事見明史海內

卽今誰輩行臺端自昔仰謀謨澗松肯逐迎風草野鶴閒看繞樹烏得見老成眞幸事降階况荷禮偏殊

擾擾塵中過半生傷心風木返江城養親何計營甘旨報國空懷辨濁清薄宦長公乖夙願端居皇甫歎難行深慚宗老相期厚薇蕨安能佐太羹

東齋詩集卷九

三

題魚開封遺像

公節誠矯矯公貌何溫溫身爲開封守無業貽子孫城東有橋尚名魚云是清官之所居前朝富貴故不少至今磨滅多無餘緬清風揖遺像虞山高百丈公名在斯壤

簡張叟海南

猶記樞衣總角時別來三紀健如斯臯比坐破燕禪定博士歸休又塾師世外煙霞常獨往人間詩酒少相知何當數見呼張丈杖屨過從二老宜家君

書德及
翁故云

題丁兼山梅邊讀易照次韻

看君真作自由身，宦海風波等劫塵。
傀儡上場元是戲，雲山獨往也從人。
澄心一卷先天秘，生意孤根雪後春。
如此桑榆良不惡，何愁白髮鏡中新。

依韻答趙謹凡見寄

忘形廿載得相從，徧性達時近更慵。
若問別來成底事，無田苦說欲爲農。

百尺樓頭漫置身，眼前不見葛天民。
飢驅敢比陶

良齋詩集卷九

四

元亮遠客長懷趙景真

上元後一日見復夫子汪茶圃家東淑眉
暫過敝廬分得船字

雨雪久不止，塊然過新年。
深巷足泥濘，閒門少喧闐。
平生素心人，久隔吳與燕。
旣歸不數見，何異各一天。
又茲訂良覲，惠我來翩然。
卜居在闌闕，有室如虛船。
庭前一株梅，帶雪呈孤妍。
卽事會心遠，析疑叩腹便。
陶然永今日，快若遊斜川。
伊余本薄劣，半生困塵緣。
招隱愧師友，知幾緬曩賢。
衡門尚可

樂從今其勉旃

見復師去冬自雲龍書院歸，薦峻代往兼修郡志，辭不獲已，將行，安徽撫軍亦敦請

先生主皖城書院，因用去春送行韻話別

未別雲龍早，薦名芳踪難繼。愧門生欲辭函丈，向

淮海忽報幣書來，皖城道重遞需新教澤，禮隆應

似舊將迎

江蘇撫軍邵公昔延先生爲紫陽書院山長

江河相望千餘里，夢裏

春風倍有情

東淑有詩贈行次韻奉答

良齋詩集卷九

五

忽漫登程就主人，龍山招我上嶙峋。
也知講席元非分，猥以門生繼後塵。
舊雨未酬晨夕約，勞薪猶作道途輪。
多君詩好增余愧，鄭重相期意倍真。
鄉園暫別首重回，難把愁腸付酒杯。
薄宦無成慙飲啄，虛名浪竊說風裁。
書城枕藉歸良友，塵網拘牽役下才。
前路茫茫念身世，爲多感慨怕登臺。

途中感懷三首

我生困奇窮，寄命若疣贅。
憂患與艱難，併迫當此際。
行役赴彭城，暫勞非久計。
堂上辭嚴親，牀前別

病弟吞聲不能言強憫還拭涕人生作此別何以居人世

馳驅廿餘年亦爲甘旨地徒抱固窮節不知逐時利微祿未及親慈幃遽我棄歸來撫柩捲一慟漬血淚中夜夢形容驚呼太憔悴哀哉寸草心泉臺願終事

連朝東南風吹我到曲阿出門一日餘道已三百多平生運逢塞淹留飽風波茲行欲遲遲念弟方沉疴天又速我去不得少逶迤惟有覓夢中依依

相撫摩

良齋詩集卷九

六

糧舟阻行

連檣萬艘貢京師自吳邦溝達淮圻百夫牽挽日幾里後者銜尾前始移橫塘絕港更無路小舟宛轉那得度強尋剩水欲爭前處處長絙懼觸忤神京百萬方資食朝廷亦藉此輩力時來斲力皆豪橫嗟爾小舟且屏息君不見江邊漁父叩舷歌海濶天空奈爾何

初到雲龍書院眺覽

其地卽黃茅岡

峻嶒亂石黃茅岡屹然雄踞徐城陽人煙萬井瞰亞父亞父家在城南登之盡見城中屏幃九里睨子房九里子房皆河北山名西來崑

崑崙衣帶水到此一束趨呂梁前臨石狗湖名寬百頃漱灑積水宜稻梁齊州幾點傍落日大環缺處當金方近收衆妙在几席遠憶古來生慨慷重瞳遺跡已泯沒交流汴泗成滄桑流傳近事頗烜赫太守玉局山人張紛紛鐫勒豈公意徒使山谷增癢創頃歲賢侯相繼至架巖結屋開軒廊岡茅翦盡桃李長霸俗化作詩書鄉我來講席心膽怯周旋

良齋詩集卷九

七

彭城懷古二首示同學諸子

恐負居諸長貪觀美境且自慰山頭月出烟蒼茫彭城雖霸俗文學亦冠古緬惟漢儒林楚沛比鄒魯元王本敦詩子政大其緒暨乎南北代劉到爭接武後來居巢里六子繼名父堂堂眉山公來此啓文府維時顏與陳亦各振毛羽如何五百年人才遂難數科甲晨星如功名半卒伍藏舟雖云深大力自能取前修雖已遠陳編有遺矩豪傑貴自勉無爲限風土

我慕楚兩龔並峙西漢季高節振當年清風被百
世又憐劉穎叔五經終掃地區區國師公不直一
土簣士生流俗中立身苦不易燕雀笑鸞鳳是非
或倒置所以中材人磬折不自悔自非聖賢徒焉
能保節義我欲訪廉里立石重表識擾擾黃塵間
不知何所詣

哭弟

別來三月多驚夢一紙凶書到已遲腸斷逍遙堂
上客對牀尋約更何時

良齋詩集卷九

八

寡妻穉子兼孤女四口嗷嗷十畝無待我頗中含
食到還愁前路足窮途
閒來顧影便傷神兀兀昏昏半死身欲倒黃河爲
我淚恐驚堂上白頭人

初秋夜坐

西風捲雨晚涼侵秋到山中一夕深慚負雲龍淹
病體愁先社燕動歸心生涯困苦迷行止書卷撩
人感古今筆札漫勞何所補流光過眼一沉吟

中秋雨

連宵陰雨咽秋蟲剩有詩情東野窮天爲愁人無
意緒免教搔首仰瓊宮

生別何如死別悲去年庭際共看時可憐今夜蕭

蕭雨助我思君淚縷縷

二首俱用東坡中秋月詩意傷亡弟

千里相思兩地深故園朋好句重吟不知百子山

頭月曾照先生冰雪心

去年中秋見復先生在雲龍賦詩憶余及西澗句云故園朋好近如何烏府雙

清得句多今年余在雲龍而先生在皖城因憶及之

環彭城皆古蹟然誌乘所載昔人賦詠絕

少佳者故知東坡在徐三年不專賦一題

良齋詩集卷九

九

爲高也余來雲龍半年以修志兼多病未

暇賦詩今將歸登黃樓亞父冢放鶴亭聊

作三篇寄感

拆得霸王廳高建十丈樓狂遊王鞏挾妙妓作賦

太虛與子由先生豪氣蓋一世羽衣月夜坐上頭

自言直繼太白後三百年來有此不樂極哀來事

難料中間黃州後海嶠至今論者爲公歎我謂熙

寧網猶寬不然三載治徐日何事不可供糾彈

右黃樓

鴻門走真龍若屬果為虜此後強周旋豈曰猶可
輔徒緣逼幕苗安用再擇主嗟哉陳孺子陰賊我
不取區區四萬金天下遂一賭以成敗論人非愚
則已瞽事過得失齊名乃留千古君看高冢在不
作漢家土

右亞父冢

鶴飛去兮西山暮來歸兮亭間太守作記兮山人
解顏爾鶴何心兮飲啄自閒忽俱去兮千秋空有
亭兮山頭涼風起兮木颺颺聊遠睇兮動予愁彭
城簇簇兮迫洪流四野蕭條兮禾黍無收鴈嗷嗷
而南逝兮不見鶴之來遊興罷兮歸休山中兮不
可以久留

右放鶴亭

留題黃茅崗兼別書院中諸子

半年鴻跡寄茲山坐聽書聲日閒聞覽勝每慚才
力薄多愁更覺鬢毛斑黃泥抱郭浮星漢翠嶽迎
人繞玦環朝暮倚闌吟不盡西風吹我又將還
楚漢興亡幾劫灰韓蘇文字自昭回浮雲事業前

良齋詩集卷九

十

人去故紙鑽研我輩來白日堂堂看聚散青春衰
袞出賢才懸知別後相思處常向岡邊掃石苔

由黃河至淮

乘流坐商舶三日抵淮壩濁浪逢灣怒早提仗婦
堅帆隨風起落船與水迴旋

船隨水勢湍急則以尾為頭亦或橫行隨時變易

欲問

河防事滔滔正接天

題鄭叟觀弈小照

雞窠年紀李八百橘中人數梁四公一笑拍肩殘
劫解長松吹起若耶風

良齋詩集卷九

士

王艮齋詩集卷之十

常熟王峻次山著

長洲蔣榮誦先刊

新年述懷

料量薪米侍高堂寂寂門庭春自長夢繞牛眠猶

待寔去年買置莫母地以術者言猶緩葬期心傷雁影更無行幸逢孝治

容臣養能守貧窮亦士常聞道京華多盛事故人

大半作山王

雨中同見復師茶園飲省暫齋次韻

良齋詩集卷十

擾擾吾生類轉蓬一樽猶喜隔年同論文看畫幽

蘭畔感舊懷人今雨中雅令未收拚到暝愁顏少

酌已成紅從今準作牆東隱與子時須約兩翁

送陶穉衷太常入都

直節如君有幾人清卿拜罷僅淹旬菟裘未辦歸

休計宣室仍看再召辰大隱市朝皆樂土坦懷泰

越易相親嗟余漢落誰同調執手臨岐倍愴神

三載江湖望日邊升沈變態若雲煙頻來書札憑

雙鯉猶坐飢寒守一羶身隱尚期知已用交疎免

受貴人憐感君風義還相勗好在前途各勉旃拜太常謝恩時召見上詢當世人材首以峻對尋以言觀尚書廷珍不當罷失旨錫秩余自甲辰通籍前後十五年間足不及公卿門為當軸所嫉惟

乾會元年高安朱文端公嘗因試差列薦余亦不知也今稱袁初見上即言及余名其高誼有足感者然余本無官情厭標榜恐累吾友故詩中不及

二月十二日見復夫子招同茶園省暫齋

孝廉備九飲獨樹軒以花朝二字為韻時先

生將赴皖城次章即送行

春陰潤柱礎春雨驚雷車藹藹君子堂雨中留亦

嘉獨樹秀孤幹幽蘭吐奇花後生添逋翁顧况字逋翁謂備九

老友來乘槎謂茶園酒行歡既洽齒坐言無譁考古極

良齋詩集卷十

墳索析疑到流沙此真文字飲撲蝶焉足誇古人於花朝為撲蝶會

齷齪遍當世古風日以凋矧茲鄉曲中同心自寥

寥幸有舊師友相對鄙吝消奈何三年來會面無

幾朝先生誨不倦難却諸侯招嗟我守寂寞生計

不自聊再賦送行詩離情逐江橈

閒窗

冥冥春雨帶春愁病起閒窗擁敝裘伴我五窮無

計遣困人二豎幾時休平原食粥聊行乞漳水沉

病不廢謳但使此身猶健在百尋竿上肯迴頭

春盡日漫題

關門擁絮貧兼病聽雨挑燈夜向晨一事也應天
下獨歸來三載不知春
多謝相知折簡招牡丹雨後正嬌饒自慚無福能
看此祇許幽蘭伴寂寥

積雨

去年秋冬早春夏乃霪雨一雨四閱月花事委泥
土陰陽錯昏曉雷電失威武滔滔浸坤軸莽莽暗
天宇乾鵲噪不靈鵲鳩聲亦苦豈惟蠶麥妨兼恐
害禾黍我病怕酬荅藉雨常閉戶典衣買濕薪炊
煙起亭午已矣且勿憂三餘聊自補

萬年橋詩爲汪一菴太守作

滔滔胥江吳城外隍萬室鱗集津通四方厥初有
梁旣毀莫續渡人以舟行者駐足舟人招招索錢
以驕日百迎送載笑載嗽遂使此方劃如鄂沔嗟
爾丞徒往蹇來連卓哉汪公仁者之勇政在必行
不難不疎乃鳩工匠乃庀木石如雲子來邪許助

役宛宛長虹鼉負而出朱欄畫柱天半霞葩羣公

臨會小大偕走萬姓懽呼擁公馬首始議造橋人
言孔艱公曰非艱我躬是有惟公獨肩衆不敢撓
惟誠與勤奏此實效在昔河梁歸美元凱矧此橋
成費大功倍僉謂斯橋非公不有公不自居但願
橋壽巍巍豐碑紀名萬年惟公之功永與橋傳

夜渡江經瓜洲城

爭潮出京口豁達臨長空日落月初出波平不驚
風月光和夕照煜燦玻璃紅揚帆指洲渚瞥過金
焦峯葦間望漁火延緣路初逢屈曲入江郭如行
谿澗中犬吠爲我引林香暗相通茲行樂復樂願
作江邊翁

廣陵雜感

夷齊飲食泉不易薇蕨旨蓼蟲甘食辛豈羨蜜脾
美喧喧繁華邦舟車所萃止平生數經過曾未入
城市胡爲歛來遊對此都人士章甫強適越未用
先遭毀欲陳古經義如以石投水深愧賢使君爲
余虛倒屣

吳淠卽山鑄驕侈俗始開荒哉隋家帝拋却中原
來花月醉不醒連天架樓臺榮華若螢火光耀得
幾回猶令杜牧輩費盡輕薄才雷塘一抔土泯滅
惟荒苔豈如賢太守遺堂鬱崔嵬

夷吾理鹽筴齊國日以富咸陽擢大農牢盆自官
授言利析秋毫吏道亦雜糅淮海事熬波此焉實
輻輳擊鐘擬程卓氣勢凌世胄嗟爾宦遊子褰裳
造門候未同而與言無乃顏之厚已矣世皆然捫
心幸無愧

長齋詩集卷十

五

元明河患始南徙吞淮滙禹跡久泯沒宋道亦已
堙擾擾四百載滄桑難具陳比歲禍逾劇洪波俯
城闌堤防忽報潰千里同沉淪田廬那暇問存者
多子身陰沴雖有數厲階豈無因塞口止兒啼我
聞諸古人一觀稽天浸哀此數郡民

偶成

滔滔洪水渺無垠四野流移望拊循未見治河來
賈讓猶聞告糴有城辰羣情似燕安巢幕達識何
人勸徙薪安得桃源成獨往巖花澗草樂長春

聞門生朱以誠宰漳浦爲姦民所殺作詩
傷之

承平法令繁民俗日以斁升堂殺長官此事非細
故憐君少孤窮挾策來京寓性行比朱繩文章美
韶護十年困羈旅登第荷恩遇榜下卽授官話
別幾回聚閩風本剽悍漳郡號難馭到官甫一朞
頗喜歌來暮大吏愛君才調繁資展布此禍復何
因聞之爲驚仆傷哉禮教廢國法竟不顧我願
當事者毋徒諳碎務

長齋詩集卷十

六

中秋夜

圓光初露漸朦朧坐看陰雲塞太空應怕天公眸
子朗不教今夜照淮東
何處吹簫廿四橋無情鉦鼓鬧連宵空傳唐宋風
流事髣髴金陵說六朝
辛苦年來半菽供江南一水夢魂通懸知此夕癡
兒穉庭際燒香伴太翁

思歸

江上涼風起思歸歲又闌逢時高位易守拙買山

難鄉邑欣偏稔家門幸稍安却慚多病體來此但眠餐

送汪茶圃之宣城訓導任

送君宣城去官閒地更好素心四五人投贈申友道或言君詩人到彼暢懷抱敬亭與雙溪靈境恣幽討或言訓導官雖小職難了世俗競苟得賢者肯草草丁寧多古義惜別增懊惱江干一分手宛水登程早臨風懷謝公造士憶梅老去矣慎所從榮名永相保

良齋詩集卷十

七

題商寶意郡丞專城集

才名早冠玉堂仙乞外無端得左遷薄宦已周江左右好詩如食蜜中邊百城南面真能擁千騎東方漫自憐卧病七年書卷廢爲君揩眼讀斯編覺羅蔚文副使自漳州書來并示紀行詩文賦此却寄

清香燕寢憶追陪閩海迢遙信乍回寄我詩篇有神助知公懷抱得時開朝端 袞職須歸補吳下輿歌望再來衰病獨慚勤問訊數行聊代嶺頭梅

入春兩月冰雪常如冬今春分日梅花猶未開感而有作

春分花信尚茫茫憔悴南枝怯吐芳豈爲雪霜摧勁節漫隨桃李鬥時粧箕疇未識恒寒意夏正先愁首種傷衰病總無遊賞興憂時一爲問東皇

中秋夕東淑至留宿書院有詩次韻

抱病經年滯郡城連宵對月軫離情幽人忽枉訪僧權因訪怡賢僧父芳至郡羈鳥喜聞求友聲濁酒爲君聊破戒

殘生笑我未忘名可憐知己疎良會談到更深夢

良齋詩集卷十

八

亦清

陳和叔示梅花嶺謁史忠靖墓詩因憶昔年曾過其地亦作一首

大厦徒憐一木支孤忠盡瘁欲何施官隣金虎終殘劫猿鶴蟲沙只片時豈有空坑容竄跡更無柴市可收尸嶺頭虛冢衣冠在月落參橫萬古悲

輓徐商農太翁

廿年漫忝紀羣交得拜龐公鄙吝消圖史百城常坐擁山川兩浙入詩歌齋心近結松喬契健筆仍

分蘇陸鑣慚愧士安猶負託遺編重讀雨瀟瀟

以所著詩集屬
序因病未果

題朱主簿源滄浪寄跡圖

一飲身長廢千秋亭獨名還將禹貢水移入闔閭

城論出之名葉少
蘊富議其失風月信無價畫圖猶有情美君真吏

隱異代結同盟

戊辰元旦用東淑韻

昨日猶寒今日暄新年好語道途喧岱宗方迓

重華駕闕里仍邀漢帝恩敢謂周南留太史却

東齊詩集卷十

愁山左半空村

時山東大荒
流民過江南

衰殘已分甘邱壑一卷陳

編且自溫

都家讀書燈

都卿中歲舉進士未老掛冠歸故里蕭然四壁何

所儲金薤琳琅富圖史有時終日爨無煙自笑都

生不餓死南濠喧闐幾萬家財雄相矜閑無比身

居閑閒似深山手把丹黃鑽故紙六時矻矻夜未

休坐對青燐時吐藥更深郊外無人行風雨連天

迷尺咫誰家百輛迎新人燭滅呼號昏黑裏此時

共道都卿家定有明燈照書几叩門乞火果得之

佳話流傳三百禩吁嗟今人懶讀書三商早卧高

春起此心營營自有求恨不日坐南濠市南濠市

上樂莫樂翻笑一燈勞繼晷今人何智古人愚太

息人心皆若此

歲暮用東淑韻

早見寒梅吐玉英春先半月入嘉平塵緣未遂山

林計時序徒傷老病情朋舊如星當曉在生涯似

艇逆風行欲將一醉拋千慮無奈愁城拒酒兵

東齊詩集卷十

吾年五十又加六海內恬熙值久安自卧滄江垂

一紀每思丹陛厠千官諸蕃稽首邊方靜蟒式開

筵恩禮寬蟒式國初樂名以象創業之事新年
大宴則於太和殿前奏之設書兩預焉今日持盈終

不易從來王業本艱難

題見復夫子照

詩書氣雖華有道神乃全神全在所養非禪亦非

仙先生真養到不為外物牽瞭然兩眸子終日晤

聖賢憶昔相從初屈指四十年昔如冰雪清今作

蒼松堅蒼松長落落先生亦翛然再拜題此詩梅

花照窗前

自歎

槁木形骸半死身舊愁難遣又增新貧非所病今
長病壯不如人老畏人驛角食殘難薦廟黃楊閨
退莫爭春向平婚嫁猶多累容易山中作隱淪

爲同年張石隣題起蟄圖

黑雲如墨西南湧木葉翻翻勢呼洶須臾怪風捲
地來變作太陰迷瀕洞蜿蜒初見雲中升到此但
聞龍氣腥銀河倒傾海水立金蛇四走轟雷霆在

良齋詩集卷十

三

昔天助昆陽戰虎豹象犀皆股弁淫川漲溢屋瓦
飛神龍此際功尤顯震坎相交初作難人生遇險
休驚歎憑他茅屋捲三重少選雲開如撒幔龍歸
雨歇風勢寂遙空一碧如新滌知君閱世飽風波
故把此圖常掛壁

題沈冠雲太湖圖

讀君記太湖如觀太湖圖太湖三萬六千頃波瀾
浩渺誰能摹并州快剪在筆下閒窗理稿足自娛
君嫌自娛猶未廣更假畫卷求唱嘯短調長篇盡

奇妙續貂何爲到病夫嗟予一病垂一紀此身空
愧生吳郡年來紙上覓山水卧遊雖好終模糊
君家去湖不數里垂虹清景天下無痿人思起
興猶在扁舟相訪緣菰蒲未能登臨縹緲窮浩蕩
且看月明如鏡波平鋪

午未歲交用東淑韻

伏枕驚心節序馳呼兒扶起拜先祠持盃強試賢
人酒拈筆難成幼婦辭歲儉相逢惟感額病深咸
勸且舒眉此身以外非我事休把流年更細推

良齋詩集卷一

三

陰寒歲旦轉增嚴瘦骨難支絮倍添頗畏鞠躬堅
閉戶時緣調息靜垂簾養生家以兩目下視爲垂簾梅知欽萼迎

巖輅山亦凝煙擁畫簷自歎小臣偏病廢不能道
左預觀瞻上於春初迎幸江浙在葛嶺紳俱往迎駕獨峻病不能赴

王艮齋文集目錄

常熟王 峻次山著

長洲蔣 榮誦先刊

第一卷

浙江鄉試錄後序

貴州鄉試錄後序

雲南鄉試錄前序

讀春秋記疑序

新脩徐州府志序

朱子言行錄序

瞿壽名粵行紀事序

雲南齒錄序

沈冠雲文集序

宋玉才遺詩序

姚鐵崖詩集序

第二卷

趙聲倍雲海詩集序

李鑑湖詩集序

吳樓坪讀史臆語序

金石圖序

送蘇州守覺羅雅公之汀漳道任序

陞任福建汀漳道前蘇州郡侯覺羅雅公

去思碑記

潯陽義莊記

復園嘉會圖記

重建崇教興福寺塔碑記

第三卷

楊維斗傳

錢牧齋傳

顧亭林傳

徐俟齋傳

黃端木傳

徐立齋傳

汪鈍翁傳

韓慕廬傳

何義門傳

陳氏兩世孝行傳

勿藥居士小傳

府君健修先生行狀

第四卷

聖主躬耕藉田頌 有序

聖駕臨雍頌 有序

廣東道監察御史見南顧先生墓表

陶退菴墓誌銘

陳少章先生墓誌銘

跋米元章墨蹟

跋趙松雪畫蘭

跋董思翁臨顏魯公裴將軍詩橫卷

跋何義門摹樂毅論

跋何義門摹褚河南陰符經

艮齋文集目錄

王艮齋文集卷之一

常熟王 峻次山著

長洲蔣 榮誦先刊

序

浙江鄉試錄後序

欽惟我 皇上秉道綏猷執中建極牖民訓俗

興賢育才文教覃敷仁風翔洽茲雍正七年秋鄉

試屆期各省考試官先後掣籤恭請 欽定惟

浙江實人文重地復蒙 皇上訓誨周詳士風

丕變加 恩樂育鼓舞日新 特簡大僚以

重其事臣任蘭枝奉 命為正主考大學士以

所掣名籤上 請臣峻蒙 恩為之副伏念臣

江左庸材知識淺陋膺茲重任實切悚惶惟齋被

一心矢公矢慎以圖仰報 天恩于萬一爰星

馳就道夙夜寅恭祇服厥事取士如額刻錄恭呈

御覽臣以職得綴言簡末臣竊惟 國家取士以

備公卿有司百執事之用敬養之道既極其詳錄

用之途又極其重所冀得才守兼優之士以裨實

用非徒以文辭之末技博科目之榮名已也浙地素稱才藪秉性既多聰慧重沐 聖天子天地父母之宏仁教誨生成之大德 恩膏廣沛

獎諭頻頒諸生今日既惕然動覺愧悔之天良而盡化其浮僞翫凌之陋習曉然知天經地義之大道而共遵乎蕩平正直之休風矣是以命題構藝各展所長其佳者理粹而辭醇氣和而格正彬彬郁郁庶幾所謂和其聲以鳴 國家之盛者仰見 聖天子深仁厚澤涵濡煦育感名所孚禮

良齋文集卷一

二

陶樂淑化導轉移神速之效上以慶 國家人文之盛下以慶兩浙多士之能仰承 德意也夫聖賢實學本於一誠舉心動念天地鬼神臨之在上質之在旁上以誠求者下必以實應臣等身依關廷親承 訓誨愷摯諄諄指示開導之方一本於推誠布公之至意為兩浙士民而發者尤不啻至再至三是固多士所熟聞也夫以 聖主待下之誠如此其至而應之者猶是文詞之末技塗飾觀聽以為弋取科名之具不能實體之於身

心念慮之微以奉為立品脩身居官體國之要撫已何安問心奚忍諸生幸際 昌期得以茂美之才與賢書之選從此策名 天府宣力 皇家惟願本實學以裨實政勵實心以濟實用益自濯磨時加儆省以不負 聖天子多方訓迪之殷懷則諸生之仰酬 高厚者在是而臣亦藉是以報 聖主任使之鉅典有榮施焉已

貴州鄉試錄後序

欽惟我 皇上法天出治建極用中聲教覃敷

良齋文集卷一

三

人文蔚起山陬海澨之士無不奮興鼓舞志切觀光文治之隆振古所未有也雍正十年壬子雲貴鄉試屆期大學士以所掣名籤上 請臣峻恭膺簡命貳郎中臣畢誼往典貴州試事伏念臣謏陋庸材遭逢 聖明叨中甲科由中書選為翰林已酉科浙江鄉試奉 命為副考官茲復蒙 恩畀以掄材重任三年之間疊荷 寵榮再司文柄雖竭盡駑駘何能仰報萬一爰星馳就道閱二月抵貴陽比入闈與臣誼率同考諸臣並矢公

慎悉力蒐羅取士如額刻錄成例得颺言簡末臣
惟自古人才之盛皆由氣運之隆唐虞明良喜起
其時萬邦黎獻共惟帝臣成湯咸有一德立賢無
方周時棧樸菁莪之化南北東西無思不服國
家重熙累洽久道化成厚澤深仁淪浹海寓我
皇上備君師之道宏教養之恩至德光昭無遠
弗届而聖心樂育人材推恩士類有加無已
御極以來開科廣額博選旁蒐訓誨周詳甄
錄備至宜乎普天率土瞻雲就日咸思獻蓋於

良齋文集卷一

四

帝廷效能於當世也黔省僻處西南自漢屬牂柯
郡歷唐宋元明疆圉有限風氣未開惟我聖
朝德化遠敷仁風翔洽苗民歸化向學日多比年
來聖天子湛恩廣被土司率服改就流官古
州都江上下延袤五六千里版圖式廓數倍於前
是則黔中士庶前此之沐浴乎膏澤者既深繼此
之漸摩乎教化者愈廣蓋天地之氣運待聖
人而開人才之奮興遇至治而出臣用是益爲黔
人士慶也夫黔爲滇南之門戶楚蜀之藩籬山川

環亘風俗樸茂扶輿清淑之氣當有賢人應運而
生者今歲雨暘時若稌黍倍收人和年豐之慶徧
於遠近太平之景象如是懷瑾握瑜之士固宜乘
此時出而和其聲以鳴國家之盛矣況聖

主崇儒重道至誠感格卿雲現於闕里特沛

殊恩加廣是科解額黔省之額遞增士之橐筆入
闈者亦愈多今其文之佳者理純詞雅格正氣和
彬彬郁郁信所謂質有其文者視中土人文何讓
焉洪範曰皇建其有極會其有極歸其有極又曰

良齋文集卷一

五

凡厥庶民極之敷言是訓是行以近天子之光惟
皇建極于上而九州萬國之民會歸於下不以遠
近而異近光所以會歸也訓行所以爲會歸之道
也諸生幸際昌期以遠方之才得與賢書之選
從此觀光上國奏對大廷惟願仰承
聖主之敷言以自勵其身心不徒以文詞之末技
博科目之榮名而本實學以發爲經濟由有守而
進以猷爲且倡率遠近之庶民共遵乎蕩平正直
之大道庶無負我皇上教誨生成之大德而

臣等今日之奉 命斯役者亦與有榮施也已

雲南鄉試錄前序

欽惟我 皇上以至仁大孝之德膺圖繼統

恩澤覃敷於九有文思光被乎八埏既 詔

中外增廣鄉會中額又 特開恩科以旁求俊

乂海內懷瑾握瑜之士莫不聞風思奮輻輳鱗集

千載昌期在於今日元年四月禮臣列雲南考官

名上請 皇上特命臣峻偕御史臣鍾衡典厥

事伏念臣一介庸愚荷蒙 世宗憲皇帝深

良齋文集卷六

六

恩拔置翰林己酉壬子兩經奉 命衡文浙

黔恭逢 皇上御極先以考試一等得蒙引

見旋承 寵命畀以是役臣自媿菲材遭逢

盛世叨荷 兩朝高厚之恩疊膺三省掄才之

任苟不竭盡此心何以仰酬萬一爰星馳就道閱

三月抵雲南境比入闈臣峻與臣衡恪遵 聖

訓共矢和衷公溥虛心採擇以襄茲大典率同考

官洗心滌慮昭告神明乃進學臣所選士五千有

奇鎖院三試之焚膏繼晷悉力蒐羅凡披閱二十

晝夜得士六十九人貢成均者十一人錄其文之

尤雅者二十二篇恭呈 御覽臣例得颺言簡

端臣竊惟自古帝王聲教所訖皆由近以及遠尚

書禹貢曰東漸于海西被于流沙朔南暨先三方

而後南者以四海之內莫遠於南也滇省僻處西

南天末漢嘗開置郡縣僅屬羈縻唐宋兩代沒於

蒙段迨元明始疆理之如中土然求其人材文學

之媲美上國足傳於後者寥寥無幾 國家重熙

累洽仁漸義靡聲教誕敷洋溢方外雲南自我

良齋文集卷七

七

聖祖仁皇帝天威蕩平之後涵濡既久俗美

風淳 世宗憲皇帝至德廣運化洽邊方數

十年來滇之人文蔚起士人之登科甲顯朝宁者

後先繼踵蓋開闢以來未之有也臣竊以為遠方

之人生長荒陬僻壤於古聖賢之經籍儒先之緒

論得之也難則守之有力紛華靡麗可欣可羨之

外誘引之者少則其心不遷東南人士不乏聰明

才俊然溺於詞采者每遺根柢逐於外慕者終鮮

篤實以滇南之地山川清淑風土冲和誠得天地

秀靈之氣而充之以學力無紛於他好無役於浮
華根之茂者其實遂庶幾有體有用可以開此方
之正學爲太平之輔佐僅區區文詞之末科目之
榮已哉臣曩者祇役黔閩所得華實兼茂之文與
論翕服竊喜文運光昭施及邊徼今我 皇上
崇儒重道稽古右文求賢籲俊之盛心無分遐邇
地方大吏能仰承 聖主樂育懷遠之恩建立

書院鼓舞而造就之臣等奉 命來滇校閱試

卷觀其氣和詞雅格正理醇無媿賢書之選者視

良齋文集卷一

八

黔又多焉於此仰見 國家人文之盛 聖天

子德化之隆振古莫及也多士旣歌鹿鳴與計偕

從此馳驛萬里策名 天府益勵其忠蓋之忱有

本之學以自效 聖明之世此多士之所以報

國家者而臣亦得藉以人事 君之義以對揚

休命所拜手而欣忭者也

讀春秋記疑序

傳春秋之學者自漢以後專宗三傳各仞師說至
唐啖趙始舍傳求經宋元以來說經之家無慮數

百有明永樂中命儒臣纂輯大全獨取胡傳爲宗
頒之學官用以取士顧春秋一經爲聖人所手定
其褒貶予奪微言奧義雖竭後人之鑽研一知半
解豈能盡當於聖心胡氏綜三傳參諸說勒成一
家之書義正辭嚴論者謂於春秋大旨能十得其
六七朱子亦謂且從胡氏說去然其穿鑿傳會幾
如酷吏之深文周內其於聖人筆削之旨果盡合
乎我 聖祖仁皇帝天縱好學表章六經

御定周易折中之後即命儒臣彙纂書詩春秋三

良齋文集卷一

九

經傳說其於春秋兼采四傳薈萃羣言凡與經旨
合者留不合者去遇有異同每加辨正然後是經
之竅突大開諸家之曲說一掃視前明大全誠遠
過之矣長洲蔣公表先生 國初以明經老余於
近年纂修郡乘見舊志稱先生偕弟進士公遜先
生好善樂施有德於鄉未知先生之邃於經學也
頃詰嗣子儋持先生所著讀春秋記疑一書來眎
余展讀之既不專主胡氏之說又博采諸家疏通
證明以期至當其言辨而晰其筆健而達以

欽頒春秋傳說彙纂校之大抵脗合而牴牾少竊歎康熙中合在廷諸臣之長祕府藏書之富始成彙纂一書先生以一老書生先得之於數十年之前蓋國家當經學昌明之會必有先路之導如朝日之前有啓明惜乎先生含章不曜垂及百年而猶未甚顯也子儋以家藏僅有鈔本亟謀梓行請余爲序末學孤陋於春秋愧非專門之業辭之不獲粗述大概以識嚮往先生又有易經纂註彭仁簡先生爲之序其書先有鈔本今將並行於世

云

新修徐州府志序

嘉禾石公再守徐之四年人和政浹百廢具修喟然曰予前之治徐州也今之治徐府也疆境旣增官制亦異烏可以無志以余讀禮家居不遠千里請任是事兼主雲龍書院余方遜謝不敏而書幣在門又念曩者承乏一統志館十有四年嘗獨肩八省暨諸邊外今公屬以一郡志必堅却之非情也遂於暮春抵徐彙諸舊志斟酌損益晝夜排纂

凡五閱月而橐成撮其大旨以序之曰州郡之有志也自宋范致能吳郡志而後駸駸漸盛有明至今凡天下府州縣莫不有志余在館中所見各處府志不下數百本然而無一可觀者其故在於無筆無書無識以村學究腐爛時文之手使之操紀述之事支離拙俗開卷令人憎厭是謂無筆目不覩唐宋以前諸家地志公謠襲謬稱引不出傳聞事蹟頗多傳會是謂無書閒有手筆稍可而平昔不明地理體裁終苦鮮當宜詳及略當輕反重是

謂無識以此三無而修志如盲人之索途如寐者之囁語其於古今地理人事疵病尚可勝言哉昔崑山徐司寇奉詔修一統志備四庫藏書廣徵海內博學洽聞之士而無錫顧景范常熟黃子鴻太原閻百詩德清胡朏明四先生者尤精地志山經水注之書爲司寇所尊信故其書博大精確一洗向來諸志之陋近雖重脩無能出其範圍余幸得十餘年厠身館局稍窺見前人之卓識苦心今於是書建置山川古蹟諸類亦仿其意以爲之

所慮討論無人書籍無多向所云三者或自蹈之而不知也若夫茲郡之山河形勢古來控守之大要與我國家太平一統升州爲府之善制公之序與志中已詳余不復贅

朱子言行錄序

彭城舒君敬亭今之篤行碩儒也余初至雲龍即耳其名近者惠然來顧出所輯朱子言行錄若干卷示余余盥手展觀既卒業喟然歎曰卓哉舒君之爲是書乎昔文公朱子以至大至精至正之學

良齋文集卷一

三

集有宋諸儒之大成紹孔孟之道統其在於今如雲漢之章天江河之行地矣顧朱子一生所以自治與所以教人者未嘗泛鶩高遠也由小學而成德自灑掃應對進退之末以至格致誠正之要修齊治平之方莫不循序漸進兼綜條貫其言不離乎切近其行總歸於篤實事不越乎倫常道必原於性命此朱子之學所以本末兼該小大畢備而非諸儒所能及也無如人心好異學術易岐自當時象山陸氏已不能無異伺其間元明以來其傳

不絕如綫方其盛時人以朱子爲宗士習正而真儒間出焉及其末也人以背朱爲能放縱無忌士習壞而人材亦衰歟矣我聖祖仁皇帝以

天縱聖神尊尚正學表章全書躋祀堂上所以崇重朱子者至矣乃近日溺於科舉之學者雖日誦其言止以爲干祿求進之具未嘗一體驗於身心而一二高明之士又或左袒陸王傲然自是豈徒學術之患亦世道之隱憂舒君一老諸生獨毅然以朱子爲必當法沈潛玩索於全集者有年因首

良齋文集卷一

三

列遺像以誌仰止之私乃考定年譜上溯淵源詳錄言行條理井然如親炙朱子而得其一生之大槪使愚者觀之可以憬然內省賢者觀之可以希踪先哲其有補於學術人心豈淺鮮哉峻少習程朱之書分心俗學長而倖獲一第浮沉世路年將五十自考身心茫無所得所爲三復是編而汗流浹背者也

瞿壽名與行紀事序

自古父爲忠臣子爲孝子如唐顏常山之子泉明

遭禍亂冒鋒刃瀕死亡而卒購父遺骸歸葬故里
史家紀之以爲難宜矣然天寶之亂危而復存常
山之節當時已顯朝廷有褒揚史官有實錄故其
事易著而不沒今觀壽名先生粵行紀事一書竊
歎其事與顏泉明相類而以孫代子職與其所值
之時所歷之境爲尤難也方留守公之守桂林也
明之祚已盡矣故主流離人心瓦解公社稷臣自
宜爲社稷死先生以弱冠冢孫不忍祖側之無人
潛結死友代父往省自家赴粵轉側閩海九死一

良齋文集卷一

古

生僅而得至及其求公尸而歸也懸命於大帥之
手婉轉得脫匍匐萬里出刀途血路卒達故鄉又
可謂萬死一生者矣夫以九死一生而得至萬死
一生而得歸尚能於其間裂裳刺血述所經歷紀
所見聞家事可徵國事亦可考豈非難之又難者
乎嗚呼臣各忠其主子各孝其親今留守公忠節
與日月爭光而先生之事表彰或未及此編存可
以爲萬世爲人臣子者勸區區紀行筆札云乎哉

雲南齒錄序

上即位之元年 特開恩科廣羅俊乂余奉

命往主漢闈得士六十有九榜發來謁多恂恂醇
謹讀書自守者也既上春官會於都下相與謀餒
齒錄請序於余余惟齒錄之故昉於唐人之金蘭
簿其紀姓名叙年齒詳及里居先世敦同年之分
誼正以重朝廷之恩遇也傳曰不信乎朋友不獲
乎上平時散處鄉邑一旦並列賢書而或覲面不
識名字不存朋友之情薄而望他日之能忠於國
難矣滇去京師萬里地極邊徼東西遼遠士庶或
終年不能相往來異地相思時一展觀亦人情之
所難忍者余嘗見宋紹興同年小錄朱子年甫十
九名在五甲而是冊之傳以此諸君其益考道進
德師法朱子使是編爲他日滇南之紹興錄其足
重又豈特區區科名之事哉

良齋文集卷一

五

沈冠雲文集序

余往在都門少宗伯方望溪先生每爲余稱吳江
沈君冠雲之著述能守樸學不事浮藻時余以書
館事繁僅獲觀一二未遑多索也今年余在紫陽

書院冠雲亦授徒郡城因出其所著古文一編視余展讀既竟乃歎曰甚矣望溪之能知冠雲之文也夫人之有文猶草木之有花草木之花其成實者率不艷麗艷麗者多不成實不成實而徒艷麗雖一時可玩不久飄落遂消歸無有矣近世之傑然以古文名者其才情爛熳筆力雄肆非不足以震盪人之耳目顧拾華棄寔止屬外眩之具而非堅貞不朽之業是猶草木之花之徒能艷麗者耳今冠雲之學篤古窮經尤精三禮其解經諸文于羣疑聚訟之處疏通證明一句一字必獲其指歸而後已其記序碑銘諸作亦皆具古人之法而立義醇懿蓋凡在茲編無不有用而可久非猶草木之花之能成其實者乎望溪之稱其守樸學而舍浮藻其知之深矣抑吾觀冠雲之為人行高而心寬不以貧賤得失撓其慮即之溫溫然而未嘗不栗以肅詩曰惟其有之是以似之然則冠雲之文所以能不事浮藻者固以其學之樸而冠雲之學所以能守樸者又寧可不知其所自耶

宋王才遺詩序

王才少余一歲與余同受業于見復陳先生先生一見即命與之交性穎悟下筆神駿傑出儕輩自為童子補諸生食廩餼每試未嘗不冠不數年而大江以南宿儒雋士皆知常熟有宋王才矣其為詩才情婉麗氣韻天成始猶規步義山飛卿既而研精樂府薈萃諸家七言長短句多出新意近體風骨超雋有言外之味詩餘小詞亦不減耆卿風致余昔評其詩以為得之胎性他人雖劇目鉢心不免刻畫無鹽使天假之以年進而益上必能傳世行遠奈何年不滿三十而遽夭折哉余少無才譽賦性鈍直顧王才與余交獨厚己亥春北遊京師相與握別其後兩接郵函寄余別後所作詩數十首懷贈者十之三時方奔走風塵未暇酬答距今七載始獲一第碌碌隨人後而王才歿者已二年矣近得吾師書曰王才遺稿若干卷子素厚盍序之余自愧何足以重王才顧念吾友平日事親孝與人交有始終該涉書史以風雅自任其可稱

者不獨詩也今已矣豈忍遂聽其泯沒因為述其梗概仍寄吾師是正焉

姚鐵崖詩集序

桐城姚鐵崖先生讀禮家居哀其生平所為詩曰客遊宦遊遷粵念劬四集緘以示余余受而讀之歎曰善哉先生之詩其得三百篇之本旨者乎四牡之勞使臣也曰不遑將母皇華之遣使臣也曰每懷靡及古賢者幸際休明使於四方其矢念無時不在君親為之上者能曲體其心而代之言此

良齋文集卷一

木

三代盛時君臣相遇如家人父子其播之詩歌者使之讀之忠孝之心油然而生也先生天稟純粹居家孝友壯歲遊覽山川客所親慕經國牧民之具早能鍊達及舉孝廉遭逢聖主自縣令郡守洊歷監司凡采風訓俗為上為民之意與夫望雲陟岵之懷悉寓之於詩其調和平而不涉怨懟其辭真率而不屑藻繪非有得于詩人之本旨而能然乎當先生之駐節吾虞也太夫人春秋高主上重其才猷俾兩弟先歸侍養迨移官

嶺表尋即乞歸今念劬集中諸作猶以不得奉親終為憾此在先生純孝之心則然然朝廷恩意之厚固與四牡皇華同然非北山蓼莪所得並論者矣余不知詩辱先生之教為論其大者如此

良齋文集卷之一

良齋文集卷一

无

王良齋文集卷之二

常熟王 峻次山著

長洲蔣 榮誦先刊

序

趙聲倍雲海詩集序

荀卿子曰藝之至者不兩能文藝中之難兼者莫如詩與書唐以前不概見惟宋蘇長公以詩文凌跨一代之其書亦追配古人元則趙承旨亦能兼妙自明來如文待詔董尚書輩文章翰墨非不並

王良齋文集卷二

一

馳美譽然稱其書者卒鮮道其詩蓋二者難兼雖兼而或相掩者多矣吾鄉趙聲倍先生少以名家子博學多能琴棋醫術無不精通而尤工於詩與書壯歲游京師與給諫吳西齋王西亭諸公相倡和當其刻燭賦詩揮毫對客鏘金戛玉之句龍跳虎臥之筆踔厲風發卓絕輩流澤州陳相國有當今第一人之目其為巨公推許如此顧才雖高而命不偶既無所遇遂謝病歸里杜門不出者數十年余早歲入都未與先生相識及歸而先生已歿

今令嗣志行哀遺集若干卷屬序于余余受而讀

之歎其風骨軒昂詞采壯麗大抵宗唐該宋出入

義山眉山之間而得其神理以視其書之開拓派

逸不屑屑于規撫而自成一家者信所謂二者兼

工能不相掩者也嗟乎以先生之才使得遇於時

上可希踪蘇趙次亦不失為文董乃扼塞終老鄉

里中尚有但稱其書不知其詩者豈非命耶余又

聞前明王伯穀以布衣受知宰相袁公晚居吳門

擅詞翰之席者三十餘年其聲望至與申少師相

王良齋文集卷二

二

埒先生初為澤州所知大與伯穀相似乃其里居喧寂不同若此豈耿介與通方異趣抑時世使然也讀先生之詩并不能無慨然云

李鑑湖詩集序

昔雍正癸卯夏京兆榜發同人集怡園時海陽李兄鑑湖年最長羣相齒讓自後隔闊君歿余不聞也頃者令嗣沛尹景南訪余雲龍書院遂故外出所刻遺詩一編屬余為序大都古體豪宕奇麗馳驟太白長吉間而不襲其貌近體清新峭拔出入

三唐要皆抒寫性情絕無摹擬拘苦之跡詩雖不多卓然可以傳矣余惟山左自明季至我朝詞人繼出其間多有以文章登大位負重名主壇坫者君名卿子自少讀書清行無統綺習長而博通經史與海內知名士為文字交聲馳南北宜乎早登清顯和其聲以鳴國家之盛乃久困場屋垂老始獲鄉薦才不用於世學不施於時生平游跡僅寄之于詩嗟乎人固有幸不幸歟豈庸者遇而才之真者每多不遇歟今景南克紹家訓為政字

民師古良吏所謂身不食報將在子孫歟余忝忝契讀君之詩追念昔游深悵當年之僅一會而未及與之論文也

吳樓坪讀史臆語序

詠史詩有二體一為借古人往事以抒己之懷抱左太冲之詠史是也一為隱括其事而以詠歎出之張景陽之詠二疏盧子諒之詠蘭生是也太冲之體後世效之者往往不拘一格興之所至則為之乃體之變也張盧之體唐以後用之於律則為

義山西崑用之於絕則為胡曾高啓乃體之正也顧變者可以惟我意之所寄無拘牽之苦正者或事之不明力之不振意之無餘每使人讀未終而輒欲棄去此劉彦和所謂意翻空而易奇言微實而難巧古來作者雖多膾炙人口者寥寥也樓坪先生以大雅宏達之才讀書之暇取自漢迄元史書中事作絕句二百餘首凡一事之曲折能於四句中摠括其要領時或別出新解又能鏗鏘工麗使讀之者得其意于語言之外自有詠史詩以來求如此之多而且佳者殆未見其比蓋先生自少深於史學暨登館閣歷中外閱歷深而見聞廣尚論古人之識既非兔園學究所及及得告家居胸有感觸借古發抒惟其意在事先力餘事外此所以昔人之所為難者而先生獨見其易也先生顧自謙曰臆語余謂臆非懸度之謂有我在焉不然彼廿一史彈詞何嘗不引據確核其體既下雖不臆烏足論哉

金石圖序

郇陽褚千峰既合今世所存周秦兩漢古文字為金石經眼錄以傳人間復自三國至唐擇其碑碣之最有名與夫晦於昔而出於今者撫其字體約其碑形紀其尺寸名曰金石圖俾觀者一室之中恍如坐卧其下供我摩挲撫玩宜乎好之者之衆也余獨嘉褚君此舉非徒博耳目之玩且深入好古之思焉夫百聞不如一見古人右史而左圖所以代見也近代車服禮器鼎彝凡古來法物莫不有圖獨金石文字有記而無圖耶好古多藏之家

亦祇裝潢成帙便於觀覽而其圭跌之式廣狹短長之數能留心者鮮矣故今日之碑碣多不合於古者豈不以未見古制哉今得褚君繪而傳之合之前經眼錄所載古來碑碣之規模略備後有作者皆可取法於斯則是圖之足重豈在宣和博古之下余故書其大者以諗當世嗜古之君子

送蘇州守覺羅雅公蔚文之汀漳道任序

覺羅雅公以天揖英賢自大銀臺左官郡守由龍安松江調籙蘇州以明勗吏以仁育衆奸蠹罔不

燭廢墜靡不舉禮賢愛士廣建義學甄陶造就之方無所不至自郡之士大夫下至販夫走蓋善者敬而慕之不肖者畏而服之越三年當京察大計之期在廷卿貳奉 詔舉公自代不謀而同者

三人江南制撫亦卓異特薦

天子素知公賢

不特入覲即擢汀漳道副使遠近聞者皆悵若有失謂吳中數十年來始得一賢太守今又舍吾民而去乎不敏如余忝跡閒曹十餘年與公僅公所一相見自讀禮家居屬疾杜門足跡不踰郡郭顧

獨辱公厚意大雪中造廬敦勸俾主紫陽書院兩年矣余性褊隘平昔交游中合者無幾公非舊交而相待如此可不謂之知己乎今公之去不敢以一方之故一己之私欲滯大賢亦不敢效世俗頌禱之詞以塞酬應思所以報知己者願陳愚悃焉天下之事局外者雖知之而無益當其事者可以有為矣然或知之不審或知之審矣而阻於時勢牽于利害亦終罔濟韓子有言善醫者不視人之肥瘠察脈之病否善計天下者不視天下之安危

察其紀綱之理亂天下者人也安危者肥瘠也紀綱者脈也脉不病雖瘠不害脉病雖肥難治今天下承平百年矣幅員之廣人民之衆上下又安文恬武嬉之象自漢唐來有不及者譬之人身可謂肥矣然而風俗波靡禮教廢弛財用匱乏法令雖密而緩急莫分文具徒繁而專事粉飾揆厥所由得毋紀綱尚有未善乎自古有治人無治法故論治者以用賢才為最急用之之道必使之各展所長而後可收實效今人才日以未聞破格旁求而

又事權過分牽制太甚內而宰輔六卿外而督撫監司皆下親細務郡縣有司奉行文書日不暇給而遠者大者轉忽焉彼此因循日復一日曾不思變通之道竊恐由此以往威消於上民玩於下雖有豪傑之士亦束手解體一籌莫施此賈長沙所謂厝火積薪而安寢其上有心者念此能勿慮乎吾聞汀漳邊閩界粵憲使駐漳州轄二郡一州地濱大洋設重兵廈門歲修戰艦以扼海道其民强悍樂戰鬪小有忿爭輒至持兵相殺蒞斯土者號

為難治以公之才猷德量其有宜民善俗之方化導一路可知也顧今日朝廷需賢甚亟如公者料不久守一官必將游膺鉅任有整齊紀綱之責圖萬年根本之計則余區區所見固非公莫可言者遂書以贈行

記

陞任福建汀漳道前蘇州郡侯覺羅雅公
去思碑記

大江之南郡多衝劇蘇州為撫藩臬駐節地賦稅訟獄倍他郡號尤劇近例太守官闕率選他守之才猷傑出者調任朝廷錄其勞不數載輒得美擢然非有深仁實績結於人心與夫素行積于平日著于中外者雖遷去民亦不甚思歲壬戌覺羅雅公自松江移守蘇越二載政成在朝大臣交章舉公自代江南督撫亦上計報最民方慮公之去俄有詔擢分巡福建汀漳道于時吳中士大夫及耆老子弟咸惻惻若失所依欲籲留不可欲即請為本路監司則格于例乃共述公之績曰惟

吾蘇省會所在賦重政繁為守者承接上下辦理簿書猶左支右詘日不暇給若乃一方利病民風士習鮮有計及者自公之來以仁厚居心以勤敏應事以清正肅官箴以精明燭奸弊而尤以維風俗興教化利益斯人為已任吳民多黠好訟弊業而巧法頃歲財殫穀貴民生情窳風俗日媮頑者漸生凌競公聽斷如神務持大體每消遏萌芽歸於無事小者即時遣決不淹旬日故作奸者莫敢犯勞心整飭見屬員誨導諄諄接紳士必開誠布

良齋文集卷三

九

公諮以利病凡所設施應機立成金閭南濠四方商貨輻湊閭閻鱗接塗巷綫通樛埃密連鬱攸時作公闢康莊三以通汲便行火災用息蘇城民戶繁庶貧家子弟鮮能負笈從師公度城中央及六門砌建義學七所慎擇塾師厚其脯脩嚴立課程屬邑間風競勸所在多置書塾紫陽書院為吳中大學四方士子肄業其中公尤所留意暇日常至訓諸生以敦行讀書之道蘇州府志歷五十餘年未修事蹟多湮公與撫軍陳公謀禮聘儒紳蒐羅

重纂崑山玉帶河久淤形勝非昔人物凋耗公以至誠勸導人人踴躍四萬工齊舉不踰時告成一邑利賴焉他如重整虞山書院復商相二巫公祠建湯文正公專祠葺蘇子美滄浪亭賙助汪鈍翁先生後人所以昭典禮敬前賢事事有裨名教嗚呼公治吳裁兩年所樹立如此惠澤及人如此使得久於其任必有移風易俗之大效今公去矣雖攀轅遮道亦復何益庶幾南山片石永留遺愛惟深知公不肯阿所好者言足徵信焉敢以是請余

良齋文集卷三

十

文辭固陋愧無以闡揚德美既又思兩年來辱公道義之知每相見歷叙生平傾瀉肝膈始知今日之居官行政能深入人心者端由積于平素夫豈一時要結使然耶 國家重熙累洽仁漸義摩振振公族篤生偉人公自少胚胎前光切劘師友既天性忠孝又深以學問年十七冠翻譯科案筆禁近與聞機密甫壯歷御史學士通政使銳于報國屢上封章跡其行事早不為一身一家謀而為宗社蒼生計矣 天子滋欲試以民事自蜀而

吳而聞所以益練其才爲他日密勿經綸地耳古
人有言鳳凰芝草賢愚皆以爲美瑞青天白日奴
隸亦知其清明加之以惠愛在人仁政可指人焉
得不思思焉得不深且久然亦烏足以盡公之爲
人哉因略公之事復寫吳民思慕之情而韻之公
名爾哈善字蔚文家世具 國史玉牒中辭曰

明明我

后軫念南州惠我人斯畀賢郡侯郡

侯伊何維覺羅公毓粹宗潢有美在躬學優而仕
侍 帝左右 帝曰汝才往試郡守公在松

良齋文集卷三

主

江普濟有堂公來泣吳惠澤洋洋維公精明奸猾
帖伏民以無冤案不滯牘維公豈弟匪怒伊教悃
幅中含文采外耀我有室家我有童稚安之誨之
繫公是恃檐帷所臨載以膏雨凡厥墜典靡有弗
舉吾民仰公如仰父師公今去矣我心傷悲思公
之德山川不隔千秋萬年視此樂石

潯陽義莊記

潯陽義莊者吳門陶氏倣范氏義莊而置者也陶
氏之先系出潯陽世籍鳳陽之定遠明洪武初有

蟹哥者以校尉歿王事贈都督僉事世職正千戶
其孫俊字靖侯調任蘇州衛右所遂家於吳入

本朝百餘年族姓蕃衍有贈徵仕郎諱世魁以勤
儉自持宅心仁厚每念族中有貧窶者思法鄉先
賢范文正公義田事而力不克逮雍正九年其子
篠命從子輩集族姓爲敦族會各出貲置田歷年
漸增至乾隆十一年篠繼先人遺志獨捐田千畝
通前所置總千一百五十餘畝又出銀一千八百
兩建義莊於長洲縣之因果巷於其中奉祀遷吳

良齋文集卷二

主

始祖靖侯公凡田租所入皆貯焉立莊正一人掌
其事二人副之佐以司莊司倉每月之朔分贍族
人一切出入之數多寡之宜悉倣范氏義莊規例
既成篠之從子之鐔請余爲記余惟義田之事於
古無聞自宋文正范公始買田千畝以養族人其
後子孫能修其業歷今七百餘年田益廣族益盛
義莊之規條不改書院之俎豆如新仁賢流澤之
長未有如此者故明季吳中申氏近歲松江張氏
並聞風而起捐置義田以贍族然皆由貴顯後力

所優為今陶氏位未登於朝家業粗饒乃於敦本睦族之道孜孜汲汲若飢渴之於飲食惟恐後時非誠心慕善無所為而為之能如是乎記曰尊祖故敬宗敬宗故收族凡今之人視同族如路人甚有相怨相爭若讐敵皆由不敬祖宗故至此耳今陶氏初置義田義莊即立先祠其中於以奉烝嘗序昭穆蓋不獨調卹之誼猶見古者敬宗合族之道焉信可以挽頹風砥薄俗矣抑余聞之范氏自文正之後世有賢者故義莊之設歷久不廢陶氏既有此善舉天必將篤生賢嗣昌大其門他時族姓日蕃義廩加廣范莊陶莊前後相望並垂永久豈非吳中之盛事哉

復園嘉會圖記

蔣君誦先攜長卷眎余曰此吾十二年前會戚友於園中洞庭葉震初以龍眠妙筆繪為此圖沈少宗伯歸愚雖書大略於前然卷中諸人之姓字觀者未盡知也我為子言之子為我記之手撫卧樹頽然獨立者為家叔桂官少年二人並立水榭長

者為蔡封千幼者為吾兒元熙撫松而遙睇者為張嘉起水亭中四人紫袷衣倚柱而坐者為唐星轂垂釣者為從兄寶林把卷者為陸位昭坐于其後者為妻兄申尚處獨坐小軒中畫橫卷者為唐士安水邊松下兩人角奕老者為家伯觀存對奕者為褚楸枰倚樹旁觀者為盛用和坐石上拈鬚神采翛然有童子抱琴侍於側余曰此非君耶君笑曰是也其並坐者為陸賡起稍後坐而倚樹者為陸叔平三人共觀圖少者為胡錫臣長者為顧

屢開黃冠道服者為沈廷璋藍袍踞石者為顧簡臣倚桐抱膝者為郭道原草亭中憑闌獨坐者為沈歸愚濯足澗中者為妻兄王松叔最後戴笠攜杖而坐者繪圖之葉震初也凡二十有三人并家僮六人皆各肖其神貌其間水石清幽竹樹蒼蔚煙雲縹緲迥非塵境昔蘭亭之會四十有二人西園之會十有六人萃海內之名賢勝侶而又有右軍東坡二公為之領袖宜其震耀一時流傳千載今謂是會足以繼之人未必信雖然當此親族不

相顧朋友不往來之日覩茲羣從長幼至戚故交
雍容灑落聚于一園涼薄之風亦可少挽何必一
觴一詠徵逐詩酒始稱雅集哉余未得與此會今
以作記附名於後亦所願也

重建崇教興福寺塔碑記

崇教興福寺有浮圖俗曰方塏者在常熟縣治東
今隸新分之昭文縣其制四方而九成初自宋建
炎間成於咸淳中其建造之由謂縣依山為治右
高而左下客主之勢不敵因於蒼龍左角作浮圖

良齋文集卷三

主

以勝之事詳元盧知州鎮琴川誌及明釋妙聲記
自建塔之後縣中風氣益完人才蔚興民物富庶
咸謂塔之陰相使然故有明以來凡有圯壞輒為
修葺乃乾隆十一年九月丁巳夜不戒於火全塔
燼焉瓴甓僅存勢將傾陟居人惴懼維時督糧使
者考威程公見之歎曰茲塔不復兩邑其衰矣首
捐俸倡率於是邑中士大夫共請三峰貫一禪師
董其事財施漸集厥工乃興經始于十二年五月
木架甫就又壞於颶風季秋復構至十三年九月

中告成相輪金剎加高於昔層欄重設欄楯周施
金碧丹雘煥然天半遠近來觀罔不嘉歎凡縻白
金六千餘兩客戶王克明獨出三千六百餘皆眾
施住持受菴禪師請書其事以垂永久余觀自宋
以來汴京臨安之宮觀王侯將相之第宅皆已毀
廢無餘而下邑浮圖乃能久存而不替非惟地運
實賴人力焉舊誌謂茲塔之興由釋文用與縣令
李闡之厥後僧淵再建相傳即用師之後身今貫
師之力肩其任備嘗勞勩固與用淵兩師輝映後
先而程公之諄切勸導其功不較之李令為更大
乎余家近塔幸其暫燬而即復也遂不辭而為之
記

良齋文集卷二

去

王艮齋文集卷之三

常熟王 峻次山著

長洲蔣 榮誦先刊

傳

楊維斗傳

楊廷樞字維斗吳人孝子大滌子舉崇禎庚午鄉試第一自爲諸生即以文章氣節負重名倡應社於吳中與太倉張溥張采等諸名流分經立課集漢唐以下諸儒義疏傳說辨其源流得失爲文章

艮齋文集卷三

一

必傳經義力矯世俗詭譎之習四方學者奉爲楷模因其所居臯里稱臯里先生領解後聲譽益盛門弟子著錄者二千入初周順昌被逮廷樞身左右之幾被禍甲申聞變北向慟哭誓以死殉福王立貽書執政所言十事皆天下大計奄黨阮大鍼者崇禎時廢居金陵復社士爲南都防亂揭討之大鍼遣使求解於廷樞廷樞拒不納至是大鍼方得志欲修宿怨御史王實昂阿大鍼意上復社渠魁疏專指廷樞將搆大獄會南都破事得解乙酉

後隱居鄧尉山不復入城市丁亥四月蘇松提督吳勝兆反爲之運籌者戴之偶廷樞門人也事敗連廷樞被執於舟中賦絕命詞十二首裂衣幅作遺書自題其後曰吾自少讀書慕文信國之爲人今日之事乃其志也五月朔巡撫土國寶會鞠於蘆墟泗州寺廷樞南向挺立國寶好言相慰命薙髮廷樞終不屈乃殺之臨刑大呼曰生爲大明人行刑者急揮刃首墮於地復曰死爲大明鬼時年五十三門人私謚忠文先生

艮齋文集卷三

二

錢牧齋傳

錢謙益字受之常熟人萬歷三十八年進士第三授編修尋丁父憂天啓元年補原官主浙江鄉試遷左中允初謙益登第時黨論方起與同年生韓敬不相能至是敬以行人考察罷家居令人詭稱謙益門客徧授關節於士之有文者榜發有錢千秋者得所授俚俗詩七字分置七義結尾爲給事中顧其仁所摘謙益亦自檢舉法司戍千秋謙益坐奪俸因移病歸四年起爲左諭德進少詹事魏

忠賢羅織東林諸人謙益以黨魁削籍歸崇禎元年召為詹事轉禮部右侍郎十一月大學士劉鴻訓罷詔會推時禮部尚書溫體仁以望輕不與侍郎周廷儒方以召對稱旨謙益慮其先已也力尼之二人皆銜刺骨體仁遂借浙閩舊事訐謙益不當與閣臣選帝見會推無延儒名已不能無疑及體仁疏入次日召對閣部科道諸臣於文華殿命體仁謙益皆入謙益不虞體仁之劾已也及廷辨體仁氣蠱厲言如湧泉而謙益辭頗屈時助體仁

良齋文集卷三

三

者止一延儒廷臣皆言謙益無罪吏科都給事中章允儒爭尤力帝怒下允儒獄并切責諸大臣即日罷謙益官命議罪允儒及給事中瞿式耜御史房可壯皆坐黨謙益降謫千秋獄上謙益坐杖論贖竟廢不用而延儒體仁遂相繼入閣矣家居九年體仁讐之不釋奸民張漢儒者揣知其指遂訐謙益及瞿式耜家居不法事體仁擬旨逮二人下刑部獄嚴訊謙益危甚求解於司禮監曹化淳漢儒偵知之告體仁體仁密奏帝請并坐化淳罪帝

以示化淳化淳懼自請案治乃盡得漢儒等奸狀及體仁謀獄上帝始悟體仁有黨於是漢儒及其黨陳履謙王璠俱立枷死體仁遂去位謙益式耜得放還十七年四月京師陷報至謙益赴南京與諸大臣議立君謙益欲立潞王議未定而鳳督馬士英及劉澤清諸將擁福王至福王立士英與阮大鍼用事謙益懼不見容遂附二人得為禮部尚書又上疏頌士英且為大鍼訟冤修好然二人終疑之狂僧大悲獄起大鍼欲假以盡誅清流造為

良齋文集卷三

四

十八羅漢五十三參之目謙益亦列焉士英不欲興大獄戮大悲而止順治二年五月王師定江南謙益入朝以禮部右侍郎管秘書院學士事尋以老病乞歸四年復以江陰黃毓祺事牽連下獄事白得釋康熙三年年八十三卒謙益顛頓仕途立朝不滿五載當時忌者謂其標榜黨人把持朝局然以文章擅天下又與楊李文黃諸正人友善雖見廢而名不衰惜乎縈情利祿溺志聲色不克保其晚節其於書經史百家下及稗官釋典無

所不讀盡能驅使詩宗少陵出入韓白義山蘇陸
元虞諸家文法韓歐下逮金華震川旁及六朝初
唐才力富健兼綜衆長嘗論有宋淳熙以後以腐
爛爲理學其失也陋有明弘正以後以剽賊爲古
學其失也俗於李何王李之模擬鍾譚之詭僻排
擊不休至李東陽之詩歸有光之文則力推奉焉
海內以其言爲質的厥後攻之者雖多然才思之
雄亦無有能及之者家有絳雲樓藏書甚富晚歲
里居以明史自任屬橐未就一夕悉燼於火乃歸

心佛乘以自遣云所著初學集一百卷有學集五
十卷列朝詩集一百卷開國羣雄事略三十卷楞
嚴金剛心經蒙鈔共十四卷並行於世

顧亭林傳

顧炎武字寧人初名絳崑山人贊善紹芳孫諸生
同應仲子出後從叔同吉生稟異質自幼篤志古
學九經諸史皆能背誦年十四爲諸生入復社有
名明季屢試不遇見時多故遂棄去舉業屏居山
中講求經世之學取家藏經史累朝實錄及天下

郡縣志書一代奏疏文集徧閱之有得即錄積四
十餘帙名曰天下郡國利病書後以貢薦授兵部
司務再薦職方主事皆不就明亡後絕意仕進北
游齊魯燕趙西入關中所至交其賢豪長者考其
山川風俗古今治亂之迹證以金石碑碣自是聞
見益廣凡所論述皆上下古今貫穿精核卓然成
一家言當代咸推爲通儒性耿介絕俗少與同邑
歸莊齊名有歸奇顧怪之目嗣母王未嫁守節及
聞國變不食而卒臨終誠炎武以世食明祿毋仕
二姓炎武奉母教厲節終身每念故國舊君發爲
詩歌悲壯激烈展謁諸陵至於再三晚寓關中庚
申元日作一對曰六十年前二聖升遐之歲三千
里外孤忠未死之人其老而彌篤如此卒年七十
無子學者稱亭林先生所著書共數十種日知錄
三十二卷積三十餘年而成於經義史學官方吏
治財賦典禮輿地藝文之屬一一疏通其源流考
正其誤謬最有補於學術世道者於六書音義尤
有獨得撰古音表三卷易音三卷詩本音十卷唐

韻正二十卷音論三卷統名音學五書大學士李光地以爲自漢晉以來所未有二書皆久行於世又文集六卷詩集五卷并左傳杜解補正九經誤字石經考金石文字記吳才老韻補正昌平山水記等諸雜著皆門人潘耒梓行其天下郡國利病書一百卷肇域記一百卷及二十一史年表歷代宅京記等書又百餘卷並藏其甥徐乾學家今多散佚

徐俟齋傳

良齋文集卷三

七

徐枋字昭法號俟齋長洲人少詹事汧長子少有才名年二十一舉崇禎壬午鄉試南都失守汧將殉國枋日夜號泣欲從死汧曰吾不可以不死若長為農夫以沒世可也乃奉父命拮据營葬遁跡不出初居鄧尉山中後隱靈巖之上沙土舍數椽讀書其中布衣草履終身不入城市家貧常賣畫自給雖藜藿不繼而莫能強以一錢之餽平日往來同志數人外雖至戚罕得見面時以枋與宣城沈壽民嘉興巢鳴盛爲海內三遺民川湖總督蔡

毓榮慕其名具書致名藥厚幣託幕下友馮羽道意謝不受遺書馮生略曰僕年二十四守先人沒世之言長往避世今已五十一矣親知故舊都謝往還絕問遺顧敢與當世之公侯卿相通交際邪且當世之公侯卿相亦安用此衰悴廢民爲也幸爲我善辭以安我素拜賜多矣睢陽湯斌撫吳尤欽其節嘗屏騶從兩詣山中訪之卒不得見歎息而去所著居易堂集二十卷文辭健拔大抵主於扶世教植綱常無一諛墓應酬之作又有二十一

良齋文集卷三

八

史文彙通鑑記事類聚讀史稗語讀史雜鈔建元同文錄管見等書山水宗董巨間法兒黃當其得意自謂前無古人書善行草俱爲世所重康熙甲戌年七十三卒

黃端木傳

黃向堅字端木先世自常熟遷吳父孔昭字含美崇禎癸酉舉人明末授雲南大姚知縣罷官後兵阻不得歸流寓白鹽井教授自給音問隔絕向堅家居日夜涕泣目盡腫順治八年十二月拜祖墓

別妻子誓不得父母不歸攜一囊一蓋獨行冰雪中涉溪踰嶺自武岡而西從間道出洪江開歷鎮遠平越至貴陽爲孫可望戍兵所執疑爲間諜將官程萬里者詢知其故歎曰孝子也給以令符乃得前其間懸崖絕壑豺虎蠻箐兵馬之虞無所不歷繭足黥面幾死者數明年五月尋至白鹽井得見父母留五月奉二親歸明年六月始抵里門吳人以其事播之樂府世所傳萬里緣傳奇是也還家後孝養二十年而母歿孔昭優游林泉爲吳中耆舊年九十無疾而終向堅年六十五矣猶孺慕哀號尋以病卒乾隆四年巡撫許容題旌

楊易亭傳

楊元咎字震百一字易亭父廷樞死國難時元咎年甫十二痛未從死杜門隱居歷八十年如一日與澗上徐枋崑山朱用純稱吳中三高士三人皆以先人死忠以名節相砥礪者也先是元咎嗣叔父廷楨後及執廷樞喪泣血三年或疑非降服之禮元咎曰先人大故非尋常人之喪其親者比禮

以義起予天下之鮮民雖終身喪可也當廷樞被難日賴門人吳江進紹原力得收殮後歲時家祀必以紹原配享徐枋臨歿以孤孫相託元咎不避嫌怨卒保其孤家貧藜藿不充廷樞門生故舊遍海內或登華要元咎義不往間有以書幣招者亦謝不應也所著談經錄辨析經傳譌謬多前人所未發其補正三易卦位圖說獨探千古不傳之秘詩文稿有楊仲子三百篇及小宛集年八十九卒學者私謚正孝先生

徐立齋傳

徐元文字公肅號立齋崑山人太僕少卿應聘曾孫少端重有大志與兄乾學秉義倡爲古學順治己亥進士第一授修撰甚被恩遇會江南奏銷案起奸胥竄名其中謫鑾儀衛經歷居四年事白復爲修撰丁外艱歸康熙己酉起元官進侍讀主試陝西所錄多策力學之士明年遷國子祭酒尋充經筵講官元文以養士莫大於太學極陳納粟之弊請倣順治時舊例於郡邑各庠選取文行

兼優者及每科鄉試副榜送監肄業部議著為例
在監四年規例嚴肅學政大飭侍講 經筵敷陳
剴切多所啓沃進內閣學士改翰林學士教習庶
吉士丁母憂歸己未 召監修明史仍爲內閣學
士庚申擢左都御史時滇孽將平元文疏陳善後
之宜以安反側又疏請除三叛虐政俱下九卿議
初御史劉安國請察隱占田畝部議凡察出者分
別甄錄州縣官利其升叙多捏報累民元文力言
其弊凡欺妄害民者請加等科罪自以身總風紀

良齋文集卷三

十一

尤以澄肅吏治爲務疏劾福建總督姚啓聖妬功
害能啓聖皇恐待罪乃免又條列督撫不職四弊
時捐納漸廣吏途益雜元文再疏爭之滇南既定
疏言保泰之道詞甚切直事關八旗者人多不敢
言元文獨持之嘗劾浙江副都統高國相藐法害
民得 旨察審將軍馬哈達以民間多匿逃人
請自勾攝不移有司元文不可曰必不得已當令
督撫會同將軍 上從其言府部院寺筆帖式
三千人求開例捐納典州縣滿大臣以好言相勸

元文力持不可卒從其議而罷二十二年大計羣
吏元文掌計典一切餽遺不敢及門是年舉行軍
政請命提鎮次第入覲以重閭寄是後提鎮悚息
多請陞見又言滿洲漢軍官員丁憂者宜無分內
外一體守制二十七月外官丁憂不許候代治事
又請申行律文居喪釋服作樂筵宴嫁娶之禁候
補御史蕭鳴鳳居喪挾妓久不回旗劾罷之在臺
三年數條上便宜知無不言不畏強禦俄坐舉湖
北按察使不當鑄三級將歸有 旨留京專領

良齋文集卷三

十二

監修明史二十七年復起左都御史遷刑部尚書
尋改戶部銳意革除舊弊胥吏無所措手部中肅
然二十八年五月拜文華殿大學士仍兼翰林院
事明年兩江總督傅臘塔希忌者意疏劾元文兄
弟鄉里事元文奏辨遂力求罷以原官致仕舟過
臨清權關者欲構其罪登舟大索惟圖書數千卷
而已家居未一年病卒年五十八元文立朝三十
年清介剛直始終一節有古大臣風天性孝友篤
於師友與兄乾學並好獎誘後進而性方嚴不苟

言笑動必以禮每與其兄異趨所著有含經堂集三十卷

汪鈍翁傳

汪琬字苔文長洲人少孤自奮讀書五行俱下舉順治十二年進士觀政通政司假歸銳意為古文辭以起衰自命尋授戶部主事分司大通橋進員外郎改刑部遷郎中河南民張潮兒以報母讐殺其族兄三春巡按御史論潮死琬為復讐論引律文罪止杖為據以奏銷案降北城兵馬司指揮兵

良齋文集卷三

主

馬司秩卑職冗左官者多偃蹇不屑意琬剛直不撓理冤誣決疑獄懲奸豪任滿去民炷香攜酒送者塞道復為戶部主事權江寧西關倉以病假歸結廬堯峰山益閉戶著書家居九年以博學宏詞召試授編修與修明史在史館六十日撰史彙百七十篇即杜門稱疾踰年仍告歸歸十年而卒年六十七琬之為文根柢六經浸淫史漢取法唐宋元明諸大家立言命意皆有所本嘗自言吾文從廬陵入非從廬陵出於易書詩春秋三禮喪服咸

有發明其叙事尤有法度一時名公鉅卿誌銘表傳必以琬為歸性伉直不能容人過雖賢人文士交遊遍天下而忌之者亦眾自知不容於流俗故前後閑居二十餘年泊然自樂也所著鈍翁類稿百十八卷自刪定為堯峰文鈔五十卷並行於世

韓慕廬傳

韓莢字元少別字慕廬長洲人祖治父勣世有文行莢少失母從父讀書研精經史貫穿百家不屑為俗儒章句剽竊之學已而孤貧益甚乃入京師

良齋文集卷三

古

康熙十一年由國子監生中順天鄉試明年會試殿試皆第一授修撰初制科之文士子承明季餘習頗傷繁縟後降而為空疎浮滑自莢出而文風翕然一變尋充日講官纂修孝經衍義主乙卯順天鄉試歷贊善侍講侍講學士擢內閣學士莢在館閣凡應奉文字多出其手 聖祖眷注方深而是時南北分黨徇機將發莢中立無倚決計勇退遂以疾請假歸家居八載點勘六經凡漢唐宋儒箋疏章句靡不采獲而裁其中於史稱馬班

陳壽文宗唐宋六家詩尚唐音將著書以老三十

三年復 召還朝 命充一統志總裁還禮

部右侍郎仍掌翰林院學士調吏部 命教習

庶吉士三十九年陞禮部尚書掌院教習如故再

疏乞歸不許卒於官年六十八莢和平樂易以文

章荷 上知未嘗自矜與人言訥然不出口及

遇大事持論侃侃不阿當 廷試日吳三桂逆節

已萌莢對策力言三藩當撤無少瞻顧永定河臣

請廣開捐納事例莢獨持不可祭酒阿理瑚請以

良齋文集卷三

主

故大學士達海從祀孔廟莢言達海造國書一藝

爾於從祀之典未合御史鄭維孜請令監生各回

原籍應試莢言如此則太學一空非京師首善之

義及議海關不當設各關稅不當增私錢禁不當

過嚴所建白甚多待故舊不以貴賤異視獎拔後

進如不及初入監時受知於祭酒徐元文壬子鄉

試主考徐乾學實拔其文莢敦師生之誼及兩人

致政家居終日憂患平時故人門生避禍絕迹莢

挺身周旋百端慰藉卒亦無事也所著有懷堂集

二十卷詩六卷

何義門傳

何焯字岷瞻長洲人爲諸生即負盛名所選制義

行遠集爲學者所宗康熙乙丑拔貢入都屢試不

售壬午冬以李光地奏薦 賜舉人明年會試

下第再 賜進士選庶吉士入直南書房尋

命侍讀滿邸兼修書武英殿丙戌散館得 旨

再教習三年旋丁外艱歸癸巳冬再以光地薦召

赴闕仍直武英殿明年授編修乙未秋坐藩邸舊

良齋文集卷三

主

事逮問尋奉 旨免罪仍直武英殿壬寅夏以

修書積勞卒年六十二 上下詔軫憫 贈

侍讀學士 賜金歸葬 命有司存恤其家

焯穎悟強記博覽羣籍長於考訂評閱古人之書

必尚論其世疏通證明其剖析疑難指摘謬誤區

別妍媸皆獨具手眼不少假借插架萬餘卷悉手

自點勘見人有善本必借歸參校尤精小學字畫

源流無不洞悉書法出入晉唐正行入能品性狷

介不肖詭隨見人文章好譏議少許可以此每招

人忌其教人爲文最謹法度故游其門者多學有原本不苟合於時有集數卷繫獄時門人懼禍投諸火歿後人爭購其遺書雖殘縑斷簡莫不珍惜焉

程氏兩世孝行傳

懿孝先生諱大儒字遠之徽州郡學生也父諱遇德南渡時官內閣中書先生隨父在金陵乙酉五月父殉節先生與母汪孺人奉父柩歸阻兵不得達由姑孰抵安慶屢乏食每夜匿蘆渚中覓魚蝦

良齋文集卷三

七

野蔬以供母泣禱余忠宣祠冀早歸一夕風雨大作舟忽解侵曉已至京口乃徙蘇州依外舅朱氏一日朱氏子娶婦盛裝飾夜半盜劫之誤入先生室持刀向汪孺人先生以身蔽母復以手格刃血流仆地盜感其孝竟釋去貧困授經以脩脯供甘旨而妻孥饜藜藿養志者六年母卒晝夜號泣兩目失明又寢苦三年得痿疾遂不起年七十五里人私謚懿孝

介菴先生諱文煥字豫章國學生懿孝先生子也

懿孝哭母失明時先生方六歲日爲父舐目歷五年障翳復開弱冠遊學京師念親老即歸父疾劇徒步延醫新安六晝夜走七百里兩足盡腫先後罹父母憂毀瘠幾不勝喪既卜葬築室廬墓傍旦夕悲號哀動行路出入必告非婚祭大事不歸如是者三十年季逾大耋遇祭時猶躬捧盤匱悽愴追慕卒年八十七乾隆五年巡撫張公渠疏上父子並荷旌表祔祀虎邱二程夫子祠

良齋文集卷三

六

大孝終身慕父母二者皆非世人之常孝也方懿孝先生泣禱余忠宣祠耿耿血誠惟冀父柩與母氏獲全而已乃一念上通遂使一夕風送千餘里此豈人力所能哉介菴先生爲父病篤覓醫故鄉徒行七百里斯時非有神相之亦幾殆矣至於哭母失明寢苦得疾弱齡舐目白首廬居庶幾所謂終身慕親者余故樂書之以風世焉

勿藥居士小傳

居士姓王氏名繼良字眉督常熟縣貢生其號勿

藥者蓋壯歲嘗有疾用以自祝中年後久無疾矣
乃偶感疫氣不旬日而遽歿年五十八里中重君
者相與涕泣哀之以余知君最深請為之傳始余
年十七八時與君同受業於今見復陳先生君長
余二歲風神秀朗倜儻不羈時游酒人淋漓酣飲
不醉無歸然能折節讀書為文安詳有法又潔清
自守不屑與勢利人馳逐以故一時文士多樂與
君交家本梁溪遷虞尊人孫讓先生勤儉謙和以
淳德稱有腴田四五頃差足自給所居邑東郭下

良齋文集卷三

九

書室三楹明窗淨几圖史彛彛羅列楚楚庭中執
蘭蒔花暇日相訪坐其中熱名香進苦茗相與劇
談古今事每使人流連不忍去其於經史百家咸
涉其律詩律工穩細賦書宗唐人行楷秀整兼諳
鼓琴既久困場屋益專意於詩花晨月夕卽事多
欣勝地名山興到輒往亦時借榻僧寮與老禪靜
衲結世外契人謂君雖不遇於時而其所樂有富
貴人不能奪者晚節心益平行益醇太孺人行年
八十有六君孝養備至自八十以後每歲孟春具

酒食會親友捧觴上壽年五十時所生子痘殤立
弟之子如玉為後課以讀書既得子猶龍視如玉
仍無異所生待親黨有思為人謀事必盡忠病亟
時惟以不能終養老親為憾分撥產業琅琅屬付
無少偏私語弟佩芝以小心守分處今世之道已
問相知某某來否遂不復言其於死生之際灑然
無累又如此余少寡交游所常往來者君與亡友
宋玉才一兩人而已康熙己亥余始游京師四年
中頗走塞外鬱鬱不得意君有書來言病胃連年

良齋文集卷三

十

曾作寄懷詩有曰黑山秋老思君夜三徑依然北
郭居當風塵困頓旅舍無聊時追念舊游未嘗不
神往也乾隆戊午余丁內艱歸十餘年來里中故
交益稀惟吾師見復先生暨君與老友東溆輩歲
時過從相得甚驩余又身嬰痼疾家貧不能杜門
常扶病授課於外間從外歸接君談笑時一解悶
今君又先吾去矣正昌黎所謂人欲久不死而觀
居此世者何也君有詩集吾師既序而傳之矣余
非能傳君者惟道其實不飾一辭使後世欲知君

之為人者觀此可得其概焉

行狀

府君健修先生行狀

嗚呼痛哉不孝峻宦游二十年未嘗一日養親自聞先妣唐太孺人訃後哀傷得疾六載於今重以兩弟先後病亡煢煢子立舉目伶仃猶幸府君年雖高精神尚健庶幾永承歡優游暮齒孰謂竟棄不孝而長逝邪侍疾以來魂驚魄散五內摧裂瀕於死者屢矣顧念府君一生善行孚於宗親信

良齋集卷三

主

於州里鄉黨身歿之日聞者無不歎息倘不具述本末垂示將來則不孝之罪滋大用敢洒淚濡墨略陳梗概冀當代大人先生俯賜採擇焉府君諱志學字少陵一字健修先世本江址人元末徙居常熟明初有仕者五世祖時猶藏數世冠帶真容後失傳家益式微子孫至不能舉其諱字府君每為不孝言之輒歔歔淚下曾王父振亭公曾王母倪氏始以今從叔父古香公官貤贈奉直大夫永安州知州宜人先王父君選公諱應祥謹厚弱

良齋集卷三

主

不勝衣犯而不校鄉里稱善人先王母宗孺人仁孝勤儉享年八十有七積德彌厚以不孝官貤贈文林郎翰林院編修孺人府君為先王父第三子天資孝友為人耿直尤好行善事為童子時遇生物輒買放鮮果必種其核家素貧寡少多病年十八九聯十金會作脩脯資從師發憤讀書晝夜不怠未幾先王父暨先伯父母相繼下世府君與先王母孤姪三人獨居貧至不能舉火乃廢書改業求升斗養親及先妣唐太孺人于歸不孝生五歲三世五棺猶在殯府君力勸先叔祖奉直公共襄大事日走虞山上下相地嘗深夜獨行山巔竭力購築兩塋葬祖父兄嫂先王母自寡居後長齋三十餘年日誦佛晝夜躬紡績稍餘即以布施先妣亦甘淡泊習勤苦府君承顏定省室無交謫饘粥不繼怡然也先伯父母歿後從兄維賢始數齋府君撫之如己子長為授室予以祖父所遺今兄先歿嫂垂老其子亦成立矣曾伯祖無後柩寄祖塋暴露年久府君惻然別具棺斂骨以葬四時家祭

亦與焉春秋掃墓念族姓稀少從叔父又久宦在外西北山兩塋及叔祖父母殯舍常以一身任之此府君一生事親敦本之大凡也不孝六七歲始入鄰塾府君訓督甚嚴侵早呼之起夜歸問所讀書為陳說大義稍長習舉子業即令遠從名師不孝資庸下性又好嬉念府君先妣期望甚至減衣食為脩脯資始感奮自勵補諸生後連因場屋生計益艱會從叔父館蔣文肅公家以修書得官將出都寓書招往時不孝方成婚兩月府君遂命遊

皇朝文集卷三

重

京師雍正癸卯不孝舉順天鄉試明年成進士由中書選庶吉士尋充書館纂修府君感念國恩手書誠曰吾家本單寒汝一旦登科第歷清華皆由上天垂佑祖宗積德所致汝當竭忠盡職以上報聖明揚名顯親之道不外乎此若瞻顧身家營求非分縱得高爵適貽父母羞吾向好善愧力微德薄自今並勉行以畢吾願而已其後寄書率常類此不孝在翰林十餘年硜硜自守不敢稍墮其節者實稟家訓也素奉佛道每月朔望及斗

降日持齋晨誦經夜禮斗未嘗懈倦遇有善事必引為己責不盡力不止康熙四十六七年水旱相仍府君與先王母日出錢糴麩麩雜糶粉作大餅千百枚施餓者家故半菽未充也雍正十年海溢傍海難民流移入城府君率里中劇金人給棉衣及錢即家中分發眾至如歸所居方塔前道路為擁塞虞山巖石秀麗為兩邑之鎮然長僅十餘里舊禁採石近年奸民競利公然結隊燒鑿損傷冢墓山為之殘府君不忍坐視屢告當事勒碑嚴禁累年始克就立碑之日冒大風雨往來山之西北因此病黃疸半年然採石之禁卒賴以行他如刊布善書勸世助當事盡心散賑施藥放生全人骨月濟人急難息爭解紛消有事為無事自壯至老不可數計里閭鄉村識與不識無不信服府君者性不喜浮華言多率直見素不相知人不解作寒暄周旋語聞人好言飾說多信以為然故亦或為人所欺育嬰堂者數年前府君聞他處多奉旨建設以塔地居兩邑之中倡議買僧舍改作當

皇朝文集卷三

書

事已具牒申憲矣顧以工費重大連歲未舉今秋有勸府君再向當事請行者欣然與俱已而其人見助者頗多即攘去別謀建南門外府君歎人情叵測並感憤欲成之遂典衣借貸獨出七十餘金先建大門及堂而伙助者卒少以此日常鬱鬱致疽發右耳後不孝竭力延醫調治竟至莫挽嗚呼痛哉府君少遭窮困讀書未就然明於大義好觀史書往事每遇忠孝義烈之士流連往復津津樂道閒吟詩雖或聲調不諧而真樸處多自在派出

良齋文集卷三

三

少喜彈琴中年未暇操習今夏買琴一張將理舊曲以娛老今琴故在不孝尚忍覩耶鄉風惡薄賭博尤甚府君深惡痛絕生平未嘗一近衣服惟取布素衣食不願過豐年近八十未嘗用杖早起晏眠不肯一日稍耽安逸凡此皆今士大夫之所難可以垂法子孫者獨憾不孝前此浮沈薄宦於吾母已抱終天之痛歸里以來又以家貧之故惟藉研田以供甘旨不獲朝夕常侍左右疾發之前無由先事護持馴至今日不孝之罪尚可逭哉府君

生於康熙六年十一月十一日丑時卒於乾隆八年十月二十四日丑時享年七十有七以今

上登極覃恩封文林郎翰林院編修配先妣唐太孺人 勅封孺人明忠臣葉令堯仁公後瑞甫

公女年七十前卒平生懿行詳府君所撰行略子

三長即不孝峻雍正癸卯 恩科舉人甲辰科進

士由翰林院編修改授協理山東道事江西道監

察御史加二級娶馮氏候選經歷保之公女次嶠

前歿娶繆氏介臣公女次嶸國子生亦前歿娶沈

良齋文集卷三

三

氏貞士公女女三一適庠生鴻遠徐公子國子生

以省一適候選縣丞景菴夏公子候選州同知之

龍一適佑賢范公子珩孫男五本仁今沒本義俱

嶠出本禮聘徐氏國子生正履公女次本智俱不

孝峻出本信嶸出孫女三一許字考授州佐嘉穗

朱公子聲不孝峻出二嶸出未字不孝苦次荒瞽

語無倫次伏冀大人先生覽而憐之賜以銘誄庶

吾父潛德幽光不至終于泯沒死且不朽

良齋文集卷之三

王艮齋文集卷之四

常熟王 峻次山著

長洲蔣 蔡誦先刊

頌

聖主躬耕耜田頌 有序

皇帝御極之三年二月辛亥率羣臣躬耕耜田禮也惟我 世宗憲皇帝重農敦本歲歲親耕為天下先自三代盛王以還未之有也 皇帝大孝三年亮陰而敬事 天地宗廟加惠下

良齋文集卷四

十

民蠲租勸農湛恩滂流德教洋溢今肇行大典恩禮有加宜有撰述以摹臣庶之歡心揚太和之景象臣職在拜颺不辭固陋謹獻頌曰

惟天生民育之在食惟君養民先知稼穡翳惟耜田國之鉅典代有儀文克勤則鮮禮經所垂有待明聖於惟 世宗殫厥誠敬三推加一歲修以教爰及我 皇承以大孝三年不言言必為民或蠲之租或除其緡或平其糴又賜之困如春之澤如天之仁仁惠既周人各含哺 皇帝曰

咨其勤本務九州牧伯郡縣長吏勤課農桑咸喻

上意惟三年春時大和懌慶賜畢行遂耕帝耜吉

日辛亥大陳鹵簿裡於農壇爰即田所天田砥平

百爾雲從各襄厥儀肅肅雍雍其儀維何鞭左耒

右其數有常三五及九王卿攸之庶人終畝勞賜

禮成小大稽首於斯之時神人胥浹霖霖應期祥

風翕習咸願自今時暘時雨嘉禾九穗登我籃簠

普天率土有富無窶孝弟力田風俗還古凡此諸

休由 皇之德勤求賢良屏遠聲色常懷永圖

良齋文集卷四

十

無安逸樂監於舊章慎乃興作 一人恒勞萬

方以寧至治馨香永觀厥成

聖駕臨雍頌 有序

惟我 國家尊師重道稽古右文自 列聖

表章絕業崇祀尼山鉅典隆儀超越記載 皇

上生安天縱道備君師曩者典學宮中金聲玉振

兼綜條貫嗣位以來文教誕敷人材蔚起德澤涵

濡萬物咸遂三年春百禮具興遂有事太學釋奠

畢御彞倫堂宣講經書維時百辟師儒聖嗣賢裔

暨太學諸生濟濟咸在禮成恩賚溥加臣身綴班
末親親 聖天子穆穆之光多士園橋之威大
雅所美靈臺鼓鐘鎬京辟雍文武作人雅化不難
復見於今漢之永平唐之貞觀夫何足云謹拜手
稽首而獻頌曰

赫矣

皇清天啟文明

聖聖相繼集厥

業成於穆我

皇紹承景運學入聖域動合古

訓即位三年化周宸宇曰養曰教次第以舉乃詔

司空大新辟雍輝輝黃瓦煥若紫宮

帝曰欽

良齋文集卷四

三

哉朕將親詣惟尼山之德

皇祖考之制始

遇上丁躬行舍菜遂考歲儀先期齋戒季春之初

時惟大昕

鸞輿至止紀事肅陳潔我蓬豆馨

我酒醴有穆其容威秩其禮莘莘胄子橋門雲集

聖裔儒臣陪位鵠立乃御彝倫命敷講席司成司

業拜手振策稽古放勲下及孔氏唐虞至治中庸

至理邈矣微言後先一揆

帝曰俞哉勉爾多

士禮儀既備錫賚滂洋聲覃海外澤派宮牆惟聖

之道待人而傳其在於今如日中天惟

皇之

德欽明文思為君為師裁成萬類凡在臣子是訓
是行億萬斯年共襄太平

墓表

廣東道監察御史見南顧先生墓表

先生諱楷仁字晉裴號見南姓顧氏長洲人孝靖
先生諱天朗之孫河南巡撫宗人府丞諱沂之子
也世系事蹟具詳京江張相國崑山徐司寇所撰
兩代墓碑中先生為宗丞公長子生而端靜勤業
無綺襦紈袴之習年十六補邑諸生早擅文譽康

良齋文集卷四

四

熙丁卯舉順天鄉試庚辰成進士癸未以行人考
選擢雲南道監察御史掌江南道事戊子告歸省
親庚寅春以父命赴補廣東道監察御史協理河
南道事辛卯秋丁宗丞公憂明年又丁母張夫人
憂服闋遂不復出家居二十四年年七十一卒先
生之在臺每事盡職其稽察錢局也商人辦銅不
以時至因倡收廢銅以資鼓鑄之議先生洞燭其
弊執正不撓議亦因之中止其巡察通京兩倉也
例以二八月支放時一至先生往視甚勤適京倉

火災單騎往救指揮得宜及奉處分遂獨得免議
五城事繁南城尤甚先生巡視南城剖決明敏治
事悉詣公署未嘗一訊於私邸前此陋規力行裁
革夜巡非漏盡不歸一時奸宄屏跡事關民命尤
加詳慎每當秋朝兩審取各省揭帖摘錄小冊自
隨少有出入輒力爭駁正時趙恭毅公官揔憲目
為後生可畏漂陽史官詹贈以詩曰天下稱平于
定國殿中執法狄兼謨此其立朝之大畧也少侍
孝靖公在家四世一堂周旋左右能得其歡心及

民齋文集卷四

五

隨父京邸遭曾祖母歿孝靖殉孝宗丞公聞訃驚
痛欲絕先生宛轉扶持得以無恙既連遭內外艱
喪葬大事必誠必信歲時祭享淚涔涔不止嘗手
錄祖先忌辰生日酌定祭規以示子孫曰一部禮
經喪祭居半人知報本反始自去不肖遠矣初孝
靖公之變一日兩喪其禮為先儒所未詳當日崑
山徐公京江張公兩相國酌定設位之次訃帖之
序奠祭之主深得變禮之正先生慮其久而失傳
為著兩喪行禮節畧及連幕圖以為遺變之式他

如梓行祖父詩文集藏弄先世手澤皆其承先之
大者家居雖久屏跡不入公門嚴束家人毋預外
事然遇當事諮訪民間利病必昌言無隱厚遇宗
黨周恤友朋善行不可枚舉生長高門而性甘淡
泊每戒子孫禁紛華絕奔競嘗曰俗奢示儉吳下
尤有關繫不必問外論云何也其家範之可法又
如此嗟乎世道之交喪也皆由士大夫寡廉鮮恥
在朝則脂韋干進到老不休居鄉則驕矜縱恣見
惡間里求如先生之潔身勇退履行無玷者不少

民齋文集卷四

六

概見雖未究其所施亦可以挽頽風而繼前修矣
先生生於康熙四年正月二十四日卒於雍正十
三年二月二十一日娶李氏封孺人左都御史木
菴公女子三長文煥前卒次文煥文煒孫八士堯
士基士圭士堅厚璽厚垓厚坤厚堦孫女四曾孫
九曾孫女三先生以丙辰十一月葬於彭山距今
十一年矣文煥等以隧道之碑未立具狀來請余
忝臺中後進素慕高風遂次第其言以為之表

墓誌銘

陶退菴墓誌銘

先生姓陶氏諱貞一字駿文又字改之晚自號退菴其先自崑山徙常熟世有隱德六傳至先生之父昌化公諱元淳康熙戊辰進士以文章政事擅名海內世稱子師先生終廣東昌化令先生其長子也性識聰悟少就家塾與令弟太常相鏃礪聲聞浸遠康熙戊子舉順天鄉試壬辰成進士選庶吉士讀國書如素習明年散館授編修念母鮑宜人年高思致菽水歡投牒乞假部彙疏上奉

良齋文集

七

特旨槩予休致而先生名居首初請假也

聖祖謂諸詞臣不共官次干謁滋擾將有所處分大臣有知之者謂宜少緩先生曰若以養親獲罪復何憾遂歸世宗嗣位前休致者悉起用

大臣薦先生才與修明史至則條列纂修事宜上之摠裁并示同館諸君皆唯唯議以全史之半相屬先生度諸公終不能行其志分纂仁宗朝紀傳彙具復投牒歸時房師桐城張公方得政暨同里蔣文肅公固留之許以推挽先生對曰即官如老

師亦非某所願二公乃止家居十餘年及今

上初元發號施令民氣和樂先生曰吾其庶觀德化之成乎就職半載會遍試詞臣仍予休致通籍卅餘年立朝不滿一考意泊如也先生始浮湛里中縱酒不羈已乃折節自勵然磊落俊爽引義慷慨與時俗脂韋干進之習鑿枘難合其見幾明決固有大過人者惜乎未獲施於用也初昌化公歿於官先生奉太宜人萬里扶柩歸暨祖母葉太孺人下世遺貲讓不取苛慝潛消本支益睦先後執

良齋文集

八

喪及葬立祠宇共祭祀具有儀則居鄉久凡有關邑中利病者必向當事侃侃言之賴先生幹旋者甚多其於文字尤有天稟初習舉子業崑山徐司寇會課輒居前列至十六歲所為文已為人借刻及在海外早夜精思文格益進何義門先生尤所咨賞熟於史事漢唐宋事迹與其治忽之幾皆能疏舉晚而學易頗有所得為古文詞波瀾意匠最近廬陵然不規規形似今所存二百篇許易簣前手自刪定者也余在都與太常為古道交最深歸

里後見先生精神如少壯時心氣益和平杯酒相邀必勸盡歡閒談及經史娓娓不倦方意里閑過從藉以析疑解惑而先生遽病且不起矣悲夫先生生於康熙某年月日卒於乾隆某年月日以萬壽覃恩加一級階承德郎配俞氏吳縣丞諱健說女封安人性賢明事姑以敬養佐治家有法度年五十六前卒子二承和承勛俱太學生女三一適諸生王來節一適太學生趙尊光一適諸生郭兆蓀孫五壘埤塤塤塤女孫一以今年月日葬先生於大河之新阡承和等奉其叔父太常所撰行述謁銘於余同里後進不敢以不文辭銘曰維昌化公學者所尊位不稱德乃耀後昆英英先生少挺頭角肆力於文汗瀾卓犖詞垣再入人樂久居先生曰嘻賦我遂初拍浮酒船徜徉山水時或直言以衛桑梓吁嗟先生與世超然謂宜難老隕也忽焉有文在篋可以不朽我銘其藏微諸永久

陳少章先生墓誌銘

吾吳昔多博聞好古砥節勵行之碩儒 本朝百年來位不大而名最著者則有義門何先生何先生及門無慮數百人其最相契如晦翁之於蔡季通呼為老友者是為少章陳先生自何先生歿後先生獨以名德見推為中吳文獻之重輕者幾三十年乾隆十二年十月十三日以疾卒於家典型凋謝遠近為之嗟嘆卜葬有日故人門弟子咸謂先生有道而文宜按古私謚之義謚曰文道先生其孤具狀徵銘於余按狀先生諱景雲少章其字先世家常熟代有聞人所謂河東陳氏也自曾大父天麟始遷郡城大父明義喜藏書深禪理多與明季遺民故老游父治昌慷慨尚義拯人之急母朱氏孺人先生生而穎異初就塾時同塾諸兒所課皆能背誦年十七睢州湯文正公撫吳試士拔置第一十九從義門先生游益講求通儒之學窮究經史晝夜無間學遂大殖父喪服闋補吳江縣學生康熙癸酉試京兆不售而歸再至京館藩邸三年復辭歸時年甫四十以母老遂絕意宦遊後

藩邸再遣使敦促漕帥赫公命淮安守造廬延請
皆堅謝不赴此先生出處不苟之大畧也其為學
如飢渴之於飲食終日丹鉛不離手凡經史四部
書從源及委貫串井然地理制度考據尤詳下及
稗官說家無不綜覽而尤深於史學早歲溫公通
鑑畧能成誦前明三百年事談之更僕不倦若身
列其間能剖決其豪芒得失者為文章簡嚴有法
所著有讀書紀聞十二卷綱目辨誤四卷兩漢訂
誤五卷國志校誤三卷韓文校誤三卷柳文校誤

良齋文集卷五

七

三卷文選校正三卷通鑑胡注正誤二卷紀元考
畧二卷文集四卷皆能有功前哲嘉惠後來其他
少時帖括之文及應聘所修通志等書非先生所
留意故不復紀也性孝友居父母憂每慟輒絕歲
時祭事必涕泗沾衣與人交有始終外和内剛不
因人熱所居老屋數椽朝蓋暮鹽人不能堪處之
怡然晚歲名益高迹益晦終年杜門足不踏塵市
蓋先生視世絕少可語世亦鮮知之者所謂不食
之碩果讀書之種子豈與世之工聲貌營華靡者

爭一時之得失哉享年七十有八配吳孺人吳江
兩司寇後諸生景槐女劬窮守約奉姑至孝雍正
十年先卒年五十子男二昇長洲縣學生黃中吳
縣學生入國子監女一歸國子生張爾樸孫男四
慶曾文雍文寬慶餘以是年十二月某日葬於吳
山北麓之新阡奉吳孺人祔黃中為人耿介博學
有文為先生克家子以余不能取容當世顧獨重
焉余雖不獲親炙先生然與其子交深且久遂不
敢以不文辭銘曰

良齋文集卷五

七

惟道與文立德立言於時不偶於古獨有彼富貴
者磨滅忽焉先生有書後世永傳吳山之麓鬱鬱
新阡我銘幽宮微在萬年

跋

跋米元章墨蹟

昔人評米老書下筆痛快如駿馬斫陣健利難方
然今世所有墨蹟大抵後人撫仿形迹似而精爽
不存矣此卷穠纖相間墨采煥發勢極奔放而轉
折圓勁自然合度信超邁入神之作也所書黃帝

堯舜符瑞語攷書譜及收藏諸錄俱不載當是祕府中物不知何時又出人間一瓢薛君博雅好古此帖歸之為得所矣

跋趙松雪畫蘭

松雪翁竹石墨蘭皆冠絕當時曩於京師見蕙蘭長卷神采索寞意其非真此幅蕭疏生動對之如有幽香襲人歎識筆畫道美尤非作偽者所能一瓢有此奇珍宜其游戲翰墨超然出塵也

跋董思翁臨顏魯公裴將軍詩橫卷

良齋文集卷

十一

吳道子觀裴旻舞劍畢其畫一揮而成有若神助弇州謂魯公送裴將軍詩筆勢雄強勁逸有一掣萬鈞之力意其書此歌時親見裴之劍舞故能如此思翁平生得力於顏今觀此卷使轉生動頓挫有力放筆若一瀉千里兜裹處宛如屋漏痕又繪本宜墨神采四射亦似有神助者魯公真蹟既不可見此卷在今日亦希世之珍也

跋何義門摹樂毅論

董思翁言世傳樂毅論有梁摹唐摹之異淳熙祕

閣所刻為梁摹本其餘人間傳刻皆唐摹本思翁又以梁摹白麻紙真蹟為新安吳生所有為恨今觀義門先生所摹含道媚於淳古其敬側處似跋而實駿與外間傳本絕異意即思翁所謂梁摹本但未知當日所本者為淳熙祕閣耶抑白麻紙真蹟耶先生於晉唐名蹟臨撫最多用功極深今殘縑縑紙皆為世寶後生淺陋對之惟有讚歎而已

跋義門摹褚河南陰符經

良齋文集卷

苗

河南陰符經小楷宋南渡後真蹟猶存樓攻媿跋謂在三茅寧壽觀者是也近世所傳刻者多細瘦失真義門先生此本筆畫純用正鋒結體完固直入右軍之室宋潛溪謂登善初師永興晚法右軍人徒見所書或與薛稷類者疑之不知先哲有兼人之才作字初不拘一體張顛善草書至其小楷極端謹有法觀登善者宜以是求之義門此書正與潛溪論合益得褚公之深矣

良齋文集卷之四

王良齋集十四卷

江蘇巡撫
採進本

國朝王峻撰峻字次山常熟人雍正甲辰進士官至

江西道御史是編凡詩十卷文四卷其吳中先哲

諸傳則修蘇州府志時所撰亦併附之集中云